

# WANTOK

NIUSPEPA BILONG OL PAPUA NIUGINI STRET

Print & Young adults  
circulation 15,177

36 pes

Namba 882

Wik i stat long 30 Me, 1991

40 toea

## Nesenel Kot bilong Diro long 25 Jun

### SAM VULUM I raitim

NESENEL Kot bai sindaun long harim toktok bilong Ted Diro long 25 Jun.

Na sapos Diro na loya bilong em, Loani Henao i win, Traibunel husat i wok long harim kot pastaim bai pinis na Komisn ov Enkwairi bai lukluk gen long ol sas bilong Diro.

Nesenel Kot bung bilong 25 Jun bai inap tokaut sapos Komisn i bin bihainim stret ol rot na lo bilong sasim Diro na makim Traibunel bilong harim toktok bilong em o no gat.

Traibunel i bin makim 27 Me olsem de bilong harim kot, tasol dispela i no kamap bikos loya bilong Diro, Henao i bin askim Nesenel Kot long glasim gen rot em Ombudsmen Komisn i bihainim long sasim Diro.

Henao i askim Nesenel Kot long lukluk long ol dispela samting:

- Ol rot em Komisn i givim ol sas bilong Diro long Pablik Prosekyuta;
- Lidasip Traibunel i kamap olsem wanem;
- Diro i pinis long wok olsem namba tu praim minista.

Henao i tok Komisn tu i no givim inap taim long Diro long bekim ol askim bilong ol yet taim Komisn i mekim ol wok painimaut bilong en. Na tu Komisn i no laikim bai Diro i kisim ol witnes bilong helpim em.

Na dispela ol askim i supim Nesenel Kot long sindaun na skelim ol toktok long las wik Trinde. Henao i tok Nesenel Kot i mas painimaut sapos Komisn i bin bihainim lo long

sasim Diro. Bihain orait Lidasip Traibunel i ken go het.

Nesenel Kot i bin sindaun gen long Mande na skelim dispela kot pepa bilong Henao na tu ol pepa bilong Komisn. Jastis Sheehan husat i bin harim kot i skruim taim i kam long Trinde. Dispela bai givim em inap taim long autim tingting bilong em.

Long Trinde, Jastis Sheehan i rausim planti komplem em Henao i mekim. Tasol em i tokaut olsem Komisn i no givim inap taim long Diro long bekim ol askim em Komisn i laikim pastaim long em i givim ol sas long Pablik Prosekyuta.


Long wankain taim tu, Siev Jastis Sir Buri Kidu i makim pinis wanpela nupela komiti. Wok bilong Komiti em long lukluk long hevi olsem kot i no save harim hariap ol kot na stapim dispela.

Komiti bai lukluk tu long wok bilong olgeta kot na ol Traibunel. Sampela ol narapela hap em komiti bai lukluk long en em:

- Kot i no harim hariap ol apil;
- Distrik kot i no hariap long salim ol sas i go long Nesenel Kot;
- Sampela senis i ken kamap long ol kot long no ken westim taim long harim ol kot; na
- Ol lo bilong Nesenel Kot i ken helpim ol Distrik na Lokal kot olsem wanem.

Ol i no makim wanpela taim bai komiti i kamap wantaim ripot bilong en, tasol komiti siaman, Jastis Hinchliffe i tok em i bilip bai ol i redi long I Mas, 1992.

## Namaliu tok long daunim pe long mun Julai



• Dispela gavman ka bilong PTC i no gat rot bilong go. Em i go na salim stret long maus bilong pukpuk long UPNG. Ol studen i protes long pe bilong ol memba na minista.


PRAIM Minista Rabbie Namaliu i bin tokaut long asde olsem em bai muvim vot bilong rausim tingting bilong apim pe bilong ol memba. Dispela bai kamap long taim palamen i holim kibung bilong em long mun Julai.

Em i tokaut tu olsem Gavman bai sapotim dispela mosen bilong en. Na em i laikim wanem samting i kam long Oposisen.


"Olsem spika i tok, ol lain bilong Salaris na Remuneresen Komisn bai bung pastaim bilong toktok long rausim gen tingting long apim pe bilong ol memba."

Praim Minista i tok olsem long nau yet, ol minista na memba i no inap kisim nupela pe. Ol bai stap yet long wankain pe bilong bipo. Em i tok kabinet bai askim tu palamen long skelim gen komisn na putim tu wanpela sas husat i no wok nau long bod.

Em i tok, "Dispela i go moa long pes 5



• Ol studen bilong Yunivesiti long Mosbi i protes bikos ol i no amamas long palamen i oraitim pe bilong ol memba ba minista long go antap. Na long poto antap, em wanem samting em ol studen i mekim long wanpela gavman ka. Ol poto: Misako Elemiah.



## DAIHATSU STRONGPELA

DISPELA DELTA TRAK  
I GUTPELA LONG OL  
KAIN ROT BILONG YUMI.  
LUKIM DISPELA LONG  
ELA MOTORS NAU!



ELA MOTORS



PORT MORESBY 229400 - LAE 433005 - RABAU 921988 - MADANG 822188 - GOROKA 721844 - MT HAGEN 521888 - WISAK 862755  
POPONDETTA 292766 - KAVIENG 942132 - KIMBE 935155 - TABULI 589060 - VANIMO 812544 - PORCERA 582021

ELA MOTORS I SAPOTIM  
YUN JUNG DO

MEMBA BECING BEHNS PHO P (PNS) 1401711

EM 3817

# Seken han ka bisnis i bilong ol Papua Niugini pipel - NIDA

SAM VULUM i raltim

PLANTI bikpela kampani long kantri i go het yet long salim ol sekenhan ka maski ol i kisim tok save pinis long stapim dispela.

Nesenel Invesmen Developmen Atoriti (NIDA) i bin askim ol dispela kampani long np ken salim ol sekenhan ka long 31 Desemba 1990, tasol ol kampani i go het yet long salim ol ka.

Dairekta bilong NIDA, Nigel Agonia i tok ol i bin toktok wantaim ol sampela bilong ol dispela kampani na askim ol long salim ol sekenhan ka tasol ol kampani i go het yet.

Sampela long ol dispela kampani em New Guinea Motors, Boroko Motors, PanPacific (PNG) Pty Ltd, Meridien Motors, Toba Motors na Ela Motors.

Len Trensport Bot (LTB) i tokaut long 1989 ripot bilong en olsem dispela kain bisnis bilong salim ol sekenhan ka i bilong ol manmeri bilong PNG tasol, aninit long lo bilong NIDA. Tasol sampela long ol dispela bikpela kampani nau i wok long salim ol ka, bikos ol i kisim laisens pastaim long senis i pasim ol manmeri bilong ovasis long ranim ol kain bisnis olsem aninit long ol bilong NIDA.

LTB i bin toktok long dispela samting long wanpela miting bilong en long 7 Septemba, 1989. Long dispela kibung, Bod i askim sapos em i ken go het na givim ol nupela laisens long ol dispela kampani. Tasol Dipatmen bilong Tred na Industri i tok ol i wetim yet bekim bilong NIDA.

Long narapela kibung bilong Bod long 1 Mas, 1990, Bod i painimaut olsem NIDA i bin tokim pinis ol kampani long stapim wok bilong ol long 31 Desemba, 1990.

Bod i no inap rausim laisens bilong ol kampani long salim sekenhan ka inap ol yet i brukim lo. Olsem na Bod i lusim NIDA bai em yet i traim long stapim ol dispela long go het na salim ol sekenhan ka.

Tasol dairekta bilong NIDA, Agonia i tok ol kampani i traim pinis long helpim sampela PNG manmeri long ranim dispela kain bisnis. Tasol planti taim, ol kain bisnis i pundaun. Long wanem kain bisnis i kos bikpela mani tru long statim na lukautim.

Tasol em i tok em i save long tupela PNG man nau i ranim dispela kain bisnis. Wanpela i wok long Rabaul long Is Nu Briten na narapela long Mosbi yet.

## PNG sainim tok orait bilong ol wok bisnis

PAPUA Niugini gavman i bin sainim foapela bikpela tok orait wantaim ol narapela kantri long las yia na dispela yia.


Dispela ol tok orait em tupela wantaim Australia, wanpela wantaim Saina na narapela wantaim Yunaited Nesen.

Namba wan tok orait em Minista bilong Foren Afeas, Sir Michael Somare i sainim wantaim gavman bilong Australia long Kenbera long 12 Februeri. Nem bilong agrimen em PACTRA II o Agrimen namel long Papua Niugini na Australia long wok bilong Tred na Bisnis.

Dispela tok orait i mekim i fri long tupela kantri long salim na baim samting namel long tupela yet. Dispela i min olsem tupela kantri bai i no inap long baim takis taim o i salim ol baim ol samting.

Namba tu tok orait namel long Papua Niugini na Australia em bilong larim moa wok bisnis long kamap. Minista bilong Tred na Industri, John Giheno i sainim dispela agrimen wantaim Hai Komisina bilong Austrlia long Mosbi long mun Septemba 1990. Dispela tok orait i larim ol kampani bilong tupela kantri wantaim long wok bung wantaim na kamapim ol wok.

Papua Niugini i sainim tu tok orait wantaim Saina long 12 Epril, 1991 long Beijing. Minista bilong Edukesen, Utula Samana i sainim wantaim Gavman bilong Saina.



**MOSBI:** Ol plisman i holim na sasim pinis wanpela man Hanuabada long sas bilong stilim K99,000 long Lae. Ripot i tok dispela man i bin stap namel long wanpela grup husat i bin stilim mani ya. Ol plisman i bin go long Hanuabada viles bilong painim narapela man husat i holim wanpela sotgan na no gat laisens. Tasol dispela man i ranawe na ol i holim narapela man. Bihain ol i painimaut olsem ol plisman long Lae i wok long painim dispela man long sas bilong stilim K99,000. Ol i holim pinis dispela narapela man husat i bin ranawe wantaim sotgan.

**MOSBI:** Ol plisman wantaim ol lain bilong Dok Yunit na CID grup bilong Boroko Plis Stesin i bin bung wantaim na holim wanpela man bilong Madang. Dispela man i bin haitim ol sampela stil samting long haus bilong em. Ol plisman i bin holim na sasim tu narapela man bilong Nesenel Kapitel Distrik long stilim ol samting.

**MOSBI:** Paia i bin kukim wanpela haus long Tubuserea viles long las wiken. Dispela paia i bin kamap bihain long bikpela nait taim tupela marit i painim kerosin bilong putim long lam. Meri i abrus na pulimapim narapela marasin olgeta i go insait long lam na dispela i pairap. Dispela meri i bin kisim bagarap long skin bilong em taim em i laik helpim liklik pikinini husat i slip insait. Olgeta samting i lus long paia na ol inap sevim tasol wanpela televisen masin.

**LAE:** Ol plisman long Lae i wok long painim yet ol man husat i bin sutim wanpela plisman long 3 Mail Plis Stesin. Dispela plisman wantaim ol pren bilong em i bin stap duti long dispela taim na ol i harim meknais long wanpela stua klostu. Ol i laik go sekap long dispela na ol man ya i sutim dispela plisman long han na het bilong em.

**LAE:** Wanpela man i bin katim wanpela raskol long naip na bihain dispela raskol man i go stap long bus na em i dai. Ol plisman i tok olsem dispela raskol man i bin dai bikos em i lusim planti blut long bus. Ol ripot i tok olsem dispela man wantaim sampela pren i bin spak pinis na laik kam stil long wanpela stua. Ol lain bilong stua i kirap tasol na katim dispela man long naip. Em i ranawe i go stap long bus i go na i dai long hap. Ol plisman i holim na sasim pinis tupela man long kilim dispela man.

**SIMBU:** Kundiawa Distrik Kot i bin sasim tripela man long brukim lo. Kot i bin sasim Konstebol Francis Wagry long baim K200 long paitim wanpela man na K100 bilong tok nogutim primia bilong Simbu, David Mai. Wagry i bin spak na mekim olsem. Konstebol James Makap i bin kamap tu na baim kot long K150 bilong spak na draivim ka. Na narapela K50 long mekim nabaut long pablik taim em i stap yet long yunifom. Long wankain kot, distrik mejistret Rick Giddings i bin sasim Konstebol Dudlee Kilori long baim K250 na narapela K40 long sas bilong bagarapim skin bilong wanpela sekyuriti wokman.

**WEWAK:** Ol plisman bilong Maprik i bin holim na sasim wanpela man long paitim na kilim meri bilong em. Dispela man Bernard Wanjikau, husat i gat 29 krismas na i bilong ples Saina long Yangoru, Is Sepik provins i bin paitim meri bilong em long hap diwai na kikim em. Na bihain liklik tasol dispela meri i dai. Ol plisman i holim na sasim em pinis long kilim man.

**MAPRIK:** Wanpela man i bin pretim na bagarapim wanpela yangpela meri long Drekiaker long las wiken. Dispela meri i gat 21 krismas na i bilong Drekiaker yet. Ripot bilong ol plisman i tok olsem dispela meri i bin wokabaut i go long ples taim dispela man i kamap long baksait wantaim naip na pulim em i go insait long bus. Bihain em i bagarapim em. Ol plisman i holim na sasim pinis dispela man.

**WEWAK:** Long Sepik Haiwe, 7-pela man i bin stapim wanpela PMV wantaim ol pasindia na stilim ol samting bilong ol pasindia em kos bilong en inap long K500. Plis ripot i tok olsem dispela ol man i bin karamapim pes na yusim sotgan wantaim naip long pretim ol pasindia. Ol plisman i holim pinis 6-pela man husat ol i ting i bin stilim samting bilong ol pasindia.

## Hevi bilong graun stapim Hides projek

WOK bilong Hides Gas Projek long Saten Hailans i no kamap yet long wanem Lens Taitels Komisn (LTC) i no tokaut long husat tru i papa bilong graun.

Membra bilong Komo/Magarima Albert Kaiabe i tok i no gat divelomen agrimen bilong Hides Gas olsem ol arapela bikpela projek long Kutubu Wel, Porgera Gol na Misima Gol.

Kaiabe yet wantaim ol papa bilong graun i bin lukim Praim Minista, Rabbie Namaliu long wari bilong ol. Na Namaliu i bin tokim ol olsem em bai kamapim wanpela kibung long olgeta grup long wok bilong Hides Gas i mas bung na toktok.



Stap fri gen - Viles Kot long Westen Hallans na Enga i bin putim sampela meri long kalabus. Tasol bihain long Nesenel Kot i harim kot bilong ol, em i rausim ol. Sampela bilong ol i sanap hia em lephan i go long raithan, Pea Kome, Oposona Yambai, Rosa Wanarin, Korowa Poss, Ted Joe, Rumbugi Kimbe na Anna Raima. Long baksait em ol CIS opisa.

## Kopra bisnis bai pinis long yia 1992

KOPRA Maketing Bod i ting olsem mak bilong kopra long kantri bai pundaun yet. Na long 1992, kopra bisnis bai pinis olgeta long Papua Niugini.

Jenerel menesa bilong bod, Joseph Bae i tok long las 12-pela mun, mak bilong ol kopra em kantri i save kamapim i pundaun olgeta. Long 1991/1992 sisen, Papua Niugini bai kisim tasol 90,000 tan. Stat long 1959 i kam inap nau, dispela em i namba wan taim bilong kopra long pundaun aninit long 100,000 tan mak.

Dispela i kamap bikos wol prais bilong kopra i pundaun na gavman tu i no laik sapotim wok bilong kopra.

## Ol Yunitek studen i bruk long tupela hap

OL studen bilong Yunitek long Lae i bruk nau long tupela grup long hevi bilong pe bilong ol palamen memba i go antap.

Dispela i kamap bihain long ol Hailans studen i kukim ka bilong Morobe rijnal memba na Edukesen minista, Utula Samana long Mandenait. Ol Momase studen i no amamas long dispela pasin. Long wanem ol i laik wokabaut isi na protes i go long provinsal gavman opis.

Dispela ol protes i kamap bihainim tingting bilong Salari na Rinumeresen Komisn long apim pe bilong ol nesenel memba, bos bilong ol dipatmen na ol primia.

Long Tunde 28 Me, ol studen i bin kibung wantaim nesenel Edukesen minista na autim tingting bilong holim dispela protes.

Provinsal Edukesen minista Isaac Narol i tok olgeta i orait pinis long dispela na ol bai raitim wanpela protes leta i go long nesenel gavman long dispela samting.

Em i skruim toktok olsem ol studen bilong Lae i autim pinis tingting bilong ol tu long askim ol arapela yunivesiti long Goroka na Mosbi long skelim na kamap wantaim wankain samting.

Em i tokaut tasol olsem planti ka bilong gavman i stap yet long han bilong ol studen. Na ol studen i no tokaut long wanem taim bilong go bek long skol. Dispela ol ka tu bai stap yet wantaim ol inap long nesenel gavman i givim gutpela bekim.

Wanpela bikpela askim bilong ol yunivesiti studen long Mosbi em palamen i mas bung gen na

skelim gen dispela tingting bilong em long apim pe. Na dispela i mas kamap pastaim long palamen i bung long mun Julai.

Wanpela opisa bilong Morobe provinsal gavman i tok bikpela bung bilong ol pipel long Lae siti long Tunde i bin kamap tu bikos ol i no amamas long pasin em primia Jerry Nalau i mekim long rausim ol setelmen long Lae. Ol i bungim dispela wari wantaim protes bilong ol studen na laik kamapim bikpela trabel moa.

Nalau i bin tokaut tu long Tunde olsem em i amamas long bungim na toktok wantaim ol studen. Bikos dispela em i bel hevi bilong pipel bilong Papua Niugini. Tasol em i no amamas long kain rot na pasin em ol studen i laik yusim long autim bel hevi bilong ol.

Dispela kain bikhet pasin bilong bagarapim ol samting bai bringim moa hevi long ol gutpela pipel. Morobe provinsal gavman tu i no amamas long tingting bilong apim pe bilong ol memba. Olsem na ol studen i mas bihainim gutpela rot na salim tingting na ripot bilong ol i go long praim minista.

Tasol primia Nalau i strongim toktok olsem hevi bilong ol studen i no wankain olsem wanem samting em i bin laik mekim long Tunde. I mobeta long stretim wanpela hevi pastaim na bihain lukluk long narapela.



**Rausim Wabag setelmen** - Foto i soim wanem samt- ing i stap long Wabag setelmen long Lae bihain long ol bikipela masin bilong provinsal gavman i go insait.

# Timba wok long Madang i stat gen

KAMPANI i katim timba long Gogol/Naru TRP long Madang provins, Jant Pty Ltd i stat gen long mekim ol wok bilong en long Fraide las wik.

Dispela i kamap bihain long wanpela miting namel long ol papa bilong graun wantaim Seketeri bilong Fores, Michael Komtagarea long Fonde.

Ol papa bilong graun i pasim ol rot em Jant i save yusim long karim ol timba long en bihain long Gavman i no harim tok bilong ol long lukluk gen long timba agrimen. Na tu long dispela askim bilong ol long KI5 milien kompensesen.

Mista Komtagarea i tokim ol papa bilong graun olsem ol i no inap long lukluk long ol askim bilong ol sapos kampani i no statim gen wok bilong en. Dispela long wanem taim kampani i stap wok, em bai lusim mani.

Long miting olgeta grup i pasim tok long kamapim wanpela komiti long lukluk insait long dispela wari bilong ol pipel. Ol man i stap insait

long dispela komiti em ol opisa bilong Dipatmen bilong Madang, Dipatmen bilong Fores na siksipela mausman bilong ol papa bilong graun.

Komiti bai kamap wantaim ol tingting em ol i bilip bai stretim wari bilong ol pipel. Na long pinis bilong wik, grup i mas givim wanpela ripot i go long Provinsal Eksekutiv Kaunsal (PEC) long lukluk na tokorait long en.

Ripot ya bai go olgeta long Dipatmen bilong Fores na Nesanel Eksekutiv Kaunsal (NEC). Taim dispela i pinis bai ripot i go long Jant kampani long lukluk long en. Na dispela bai helpim kampani long kamap wantaim ol nupela tingting bilong en.

Na i bihainim dispela tasol bai kampani wantaim gavman na ol papa bilong graun i lukluk ken long agrimen nau i gat 20 krismas pinis. Dispela em wanpela samteng em ol papa bilong graun i askim strong bai i mas senis.

## Sam Manikot i go pas long Gazelle bai ileksen

BAI ileksen bilong Gazelle open ilektoret i pinis tasol ol opisa bai i lukluk gut long namba bilong ol kendidet bihain long ol i tok aut long wina.

Gazelle open ilektoret i bin i gat 8-pela kendidet i resis long dispela sia. Hia em nem na namba bilong vot ol i kisim long asde (Trinde 29 Me, 1991) moning na apinun.

- Rex Kapal-1 475 (moning), 1 596 (apinun);**
- Peter Karani-1 477 (moning), 1 810 (apinun);**
- Amos Tolauk-910 (moning), 951 (apinun);**
- Tony Wong-3 737 (moning), 4 225 (apinun)**
- Urban Gavul-951 (moning), 922 (apinun);**
- Vincent Toliman-2 362 (moning), 3 382 (apinun);**
- Sam Samuel Manikot-4544 (moning), 5394 (apinun);**
- Henry Tokubak-2 499 (moning), 4 463 (apinun).**

Ilektrel opis bai i tokaut long nem bilong ol wina bihain long ol i sekim gut namab bilong vot wan wan kendidet i kisim.

## Wokman i tok Kolonel Nuia i paitim em

WANPELA wokman bilong Gavma Tas Fos, Bernard Simiha i tok Komanda bilong ol Sekyuriti Fos long Bogenvil Ailan, Kolonel Leo Nuia i paitim em nogut tru long Rabaul las wik.

Dispela i kamap bihain long sampela toktok Simiha i mekim long redio Not Solomons i go long ol pipel bilong Saut Bogenvil olsem ol i no ken wok wantaim ol sekuriti fos.

Mista Simiha i tokim Wantok olsem dispela samteng i kamap long

samteng olsem 8 klok long Sarere moning. Wanpela opisa i go long haus bilong Simiha na tokim em olsem Kol. Nuia i laik lukim em baksait long Rabaul plis stesin.

Em i bin kisim narapela memba bilong Task Fos, Steven Buri-an na tupela i go wantaim. Long wanem dispela em i namba wan taim tru Kol. Nuia i laik lukim em.

Tasol taim ol i kamap, wanpela opisa i tokim Simiha olsem Kol. Nuia i laik lukim em wanpela i go moa long pes 16

## Butibam na Ahi asosiesen tingim ol papa bilong graun

MENESA bilong Butibam Progres na siaman bilong Ahi Asosiesen long Lae, Sam Moses i laikim nesanel gavman long makim sampela graun bilong sanapim haus projek bilong ol papa graun.

Em i tok gavman i yusim pinis planti graun bilong en, tasol ol i gat bikipela hap graun bilong ol i stap yet. Na long ol dispela kain projek, nesanel o provinsal gavman i mas helpim ol papa graun long resistaim graun bilong ol.

Sam i bin mekim dispela singaut bihainim wanem samteng i kamap pinis long Isten na Westen Hailans provins.

Em i tok, "Sapos gavman inap lukluk na helpim mipela long dispela, mipela inap lukluk na makim graun bilong gaden, wok eirikalsa na

wanem hap graun bilong yusim long ol kain projek olsem.

"Mipela i ken givim tu ol hap graun i go long ol kampani bilong kirapim ol haus projek bilong ol."

As tingting bilong Moses long resistaim graun i bilong helpim na kirapim ol setelmen we ol i luksave long en. Dispela em long givim ol kain sevis olsem bilong wara, lektrik pawa saplai na stretim rot bilong rausim ol pipia. Sampela bilong ol dispela setelmen i stap long Bumbu, Talair kompaun na Hanta.

Long dispela rot, em i tok, ol bai inap lukaut gut tu long ol setelmen i no ken kamap bikipela olgeta.

"Nau yet provinsal gavman i laik klinim Lae siti na rausim pinis ol pipel long Voco Poin na Wabeg setelmen.

## Nesanel Kapitel Distrik tieta grup raun pilai long Popondetta

BIKPELA toktok i kamap nau em lukautim bus na graun na abus.

Long tok save gut long dispela, Nesanel Kapitel Distrik Awenes Tieta (NCDAT) grup bilong Mosbi i bin go pilai na putim kamap ol kain kain drama long Popondetta.

Na ol i soim kain kain pilai bilong toktok long bus, graun, wara, na ol animel. Ol drama i sut tu long pasin bilong lukautim bus na wokim bisnis.

Wanpela pilai bilong ol i sut long wanpela bikipela bataflai em Kwin Alexandra. No gat narapela hap bilong kantri o wol i gat bataflai olsem. Popondetta tasol. Kos bilong dispela bataflai em K100,000.



• Ol memba bilong Nesanel Kapitel Distrik Tieta grup i raun long putim drama bilong ol long ol ples. Ol drama i toktok long lukautim bus, graun na wara.

**Calculators**

20% OFF Some Models

**ALU SIGNS** PTY LTD

PO BOX 7081, BOROKO PH: 25 4800  
STORE: NEAR BOROKO POLICE STATION

**FRI BAIBEL KOS YU KEN KISIM SKUL LONG SALIM PAS**

Salim nem na edres long: WORLD BIBLE SCHOOL, Dept. VD21, P.O. Box 9346, Austin, TX 78766 USA

VD22

**TOR**

**EM BIKMAUS NA MEKIMPLANTI NOIS TRU...**

TORO PUTIM UNIFOM BILONG OL NIU SAUT WELS (BLUES) NA EM SO-OP RAUN I STAP...

**BLUES BLUES BLUES**

**EM KIRAP NA KAP-SAITIM RABIS DRUM...**

BLUES BAI KAPSAITIM OL MAROONS OLSEM RABIS DRAM, HIA!!

**INO LONG TAIM NA OL SAPOTAS BILONG KWINS-LAN (MAROONS) KAMAP...**

!?!?

**MAROONS MAROONS MAROONS MAROONS**

**MAN, TORO LUKIM OLSEM OL SAPOTAS BILONG OL MAROONS I MUMUT I KAM. EM GIVIM SIKSTI OLSEM ETINSAUSEN BILONG BLUES!!**

MAROONS! MAROONS! MAROONS!

**HOLIM BLUE LANG YA!! G\*!?**

# WANTOK

NIUSPEPA BILONG OL PAPUA NIUGINI STRET

## Gavman i mas tingting gut

GAVMAN i autim stret pret bilong em long aste taim Praim Minista Rabbie Namaliu i tokaut long daunim gen pe bilong ol minista na memba.

Dispela i bihainim bikpela protes em ol yut long olgeta hap bilong Papua Niugini i mekim bihain long palamen i tok orait long tingting bilong apim pe. Mipela i no inap tok olsem ol yunivesiti studen i autim dispela protes. Dispela protes i bilong Papua Niugini. Ol studen i makim tasol dispela bikpela namba bilong ol pipel husat i no inap toktok.

Na wanem samting ol i mekim i bilong nem bilong Papua Niugini na ol pipel bilong en.

Bilong wanem na oltaim gavman bai tokim mipela olsem em i no gat mani. Tasol long taim toktok bilong apim pe i laik kamap, olgeta memba na minista i givim sapot bilong ol. Long dispela as tasol na planti samting bilong kantri i bagarap. Bikos ol dispela papet i save sindaun tasol na bihainim wanem samting em ol nara-pela i mekim o tokaut long en.

Long taim sampela memba i bin askim long mani long bung bilong palamen, Fainens minista Paul Pora i tokaut olsem gavman i no gat mani bilong givim long kopi, kakao, kopra na welpam. Bikos gavman na kantri i sot tru long mani. Tasol long taim bilong toktok long apim pe bilong ol papet long palamen, olgeta wantaim i givim tok yesa.

Dispela kain ol man i no lida tru bilong Papua Niugini. Ol i olsem ol sipsip tasol. Sapos wanpela i go we, olgeta bai bihainim.

# Ona na Kauona i redi long kibung tasol

## KONIO SENEKA i raitim

LIDA bilong Bogenvil Revolusineri Ami (BRA), Francis Ona i askim nesanel gavman nau long rausim Malti Nesanel Supevaisori Tim (MST) bipo ol i kibung gen wantaim gavman.

MST em ol wokman bilong kain kain ovasis kantri husat i stap wok long Bogenvil Ailan long lukautim wok bilong bringim sevis i go bek long ailan.

Ona i laikim olsem MST i mas lusim ailan bipo ol lida bilong Bogenvil Ailan wantaim em yet i kibung gen wantaim ol mausman bilong gavman.

Dispela kibung em bai i kamap long Julai, 1991 i bilong sekim ol tok orait bilong stretim sindaun, na bringim sevis i go bek long ailan. Ol dispela tok orait i bin kamap long namba wan kibung bilong gavman wantaim sampela Bogenvil Ailan lida long Honiara "Honiara Dikleresen".

Francis Ona i askim ol ovasis kantri olsem Nu Silan, Kanada, Solomon Ailan na Vanuatu long rausim MST hariap. Em i tok dispela bai i kamapim gutpela ples long Bogenvil bai ol i ken kibung.


Francis Ona wantaim namba tu bilong em, Sam Kauona i tok tupela i redi long joinim ol arapela Bogenvil lida long dispela kibung.

Ol Bogenvil lida i askim pinis Nu Silan

gavman long yusim sip bilong ol long holim toktok long solwara bilong Bogenvil Ailan yet.

Francis Ona yet i askim pinis Komonwel Seketeriet, na ol

memba kantri bilong em long pusim Papua Niugini gavman long rausim hariap MTS long Bogenvil Ailan. Dispela em long stapim moa pait namel long ol BRA na sekyuriti fos bilong gavman.



Taim bilong kisim pe • Dispela poto i solm ol wokman bilong wanpela timba kampani husat i go wok long Irian Jaya i redim mani bilong baim ol papa graun. Mani i slip long fran bilong ol tripela ya olsem ol pepa nating.

# WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO  
Telepon Namba: 25 2500  
Feks Namba: 25 2579

## PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

## Moa long 200 Kieta pipel kamap long Rabaul

### KONIO SENEKA i raitim

MOA long 200 manmeri bilong Kieta i bin kalap long MV Sankamap na i kamap long Rabaul long las wik.

Dispela em ol pipel husat i gat bikpela sik o bagarap long bodi, na i kamap long Rabaul long kisim marasin. Tasol sampela i kam long bungim wantok na pren bilong ol long Rabaul, na arapela hap bilong kantri.

Dispela i bringim dispela warai nau long sampela gvaman opisal long Rabaul. Bikos planti manmeri i pulap kapsait olsem long taim toktok na wok bilong stretim sindaun i wok long kamap nau. MV Sankamap bai i go bek long Kieta sampela taim long Jun, 1991.

## Bikpela kempen bai i kamap egensim pe bilong ol memba

BIKPELA kempen bai kamap long olgeta hap insait long kantri. Dispela kempen ol studen bai putim kamap long neks wik. Insait long dispela kempen ol bai tokaut long hamas mani ol memba bilong palamen bai ikisim long wanpela fotnait.

Nesanel Yunion ov Studen (NUS) Vais Presiden, Tony Kludapalo i tok em bai i askim olgeta studen insait long kantri long putim kamap dispela kempen.

Neks wik Nesanel Yunion ov Studen (NUS) bai i go pas long holim wanpela bikpela kibung bilong olgeta bikpela skul long Yunitek long Lae

long Fonde na Fraide long painim sampela gutpela rot long stapim ol memba kisim kain mani olsem long poket bilong ol.

Mista Kludapalo i tok wanpela rot we ol bai i toktok long en long dispela kempen em long rausim olgeta memba husat i stap nau long palamen long neks yia ileksen.

Ol studen bilong Goroka Tisa Koles husat i stap long holidde bai kamap long Sande apinun long putim kamap tingting bilong ol.

Kludapalo i tok planti studen bai i no inap kamap long skul inap ol i stretim dispela hevi bilong ol pipel.

## Wok bisnis long Bogenvil mas kisim sapot - Kenehe

WOK bisnis insait long Buka na ol arapela ailan long Not Solomon provins i mas kisim helpim na sapot long go het.

Siaman bilong Turisim Developmen Kopresen, Simon Kenehe i tok gavman i no ken tingting long putim ol bikpela bisnis olsem beng na ol arapela indastri i go hariap long ailan yet. Mista Kenehe i tok gavman i mas skelim gut ol arapela wok bisnis we ol pipel i ken mekim. Em i tok sapos wok bisnis namel long ol pipel i go gut orait, wok bisnis olsem beng na indastri i ken go bek.

Em i askim gavman long givim helpim long ol pipel long karim aut ol wok bisnis olsem kopra, kakao na ol arapela moa. Sapos ol dispela wok bisnis i kamap bai ol bikpela wok bisnis i ken kam insait long strongim.

Mista Kenehe i tok edministrata Sam Tulo, na ol lida bilong em i wanbel long kamapim kain wok bisnis we i stap insait long wanpela han tasol. Olsem na sapos olgeta samting i go bek orait long Buka bai ol manmeri i ken bungim ol yet wan-

taim na ranim wok bisnis bilong ol.

Toktok bilong statim wok long main i no bikpela samting long dispela taim, Mista Kenehe i tok. Gavman i no ken kisim ol kain pasin bilong politik i go insait long wok bisnis. Bikos em bai i kamapim hevi long hevi i stap pinis. Olsem na toktok bilong maining long dispela taim i no bikpela samting long ol pipel yet. Ol i mas pusim ol bisnis we ol i ken mekim i go het long nau.

Em i tok bikpela samting em strong bilong ol manmeri long kirapim wok bisnis gen, stretim ol helt sevis wantaim sevis bilong skul, na stretim toktok long wanem samting bilong mekim long bihain.

Mista Kenehe i tok nau em taim bilong sindaun gut na toktok wantaim long wanem samting bai ol i mas kisim i go bek long ailan long kirapim gen wok bisnis na ol arapela samting. Em i tok wok bisnis long turisim i wanpela bikpela wok ol pipel long Bogenvil i ken kisim i go bek long kirapim provins na kantri tu wantaim.





□ WANPELA man i dai na ol i karim em i go long matmat long planim em. Ol i putim bokis bilong man ya long sait bilong hul na ol i askim wanpela bikman long prea antap long em. Olgeta i daunim het na bikman i statim prea, "Atus bikman, bage ya mipela i salim i kam long yu. Yu sekim rekot bilong em. Sapos rekot bilong em i gutpela, orait, holim em i stap. Sapos rekot bilong em i nogut, salim em i kam bek bai mipela i mekim save long em."

Sape Metta Goroka.

□ WANPELA manki Tolai i maritim wanpela meri Sepik. Tupela i raun i go arere long wara Sepik na bol Tolai i laik pekpek. Em i go sindaun arere long Sepik Wara na givim i stap. Pinis na em i painim diwal bilong kiln-in as. Luluk i go na al bilong em i pas long wanpela bikpela diwal i silp i stap. Bol i no save olsem em pukpuk. Em go bendaun na laik rabim as stret na no gat pukpuk i kirap. Pukpek i tok, "Al poro, yu laik mekim wanem a?" Manki Tolai lukim olsem laik kirap ranawe tasol nmo gat, pukpuk asde yet pulim tripela liklik pren bilong bol Tolai namel long lek. Tasol sore tumas, bai yu go we, wara i katim.

Peter Paimba, Bayside Pelpels.

□ WANPELA man Simbu wantaim pren bilong em i save wok wantaim wanpela wokman. Olgeta taim Simbu i kam wok, waitman ya i save kolim nem bilong em Tom taim em i tok moning long em. Dispela i mekim pren bilong em i kros. Olsem na wanpela taim pren ya i kirap na askim Tom sapos em i save long mining bilong Tom. Simbu i tok nogat na pren bilong em i tok waitman ya i save bagarapim nogut tru. Simbu i harim olsem na em i belhat nogut tru. Long neks de, Simbu i go wok na bos i tok moning long em. Tom i kirap tasol i tanim na tok, "Yu tu yu Tom, yu harim. Ol dok, pik, pusi, kakaruk na olgeta samting long haus bilong yu em Tom....Tom.....Tom.....tasol."

Sape Metta Goroka.

□ WANPELA yanpela manki Morobe i raitim pas long Manus gelpren bilong em. Insalt long pas em i tok, "Dear Darling, weather or fine? Yesterday I love you, tasol nau mi les long lap."

Allan Waimba Lae

# Lihir gol bai stap 43 yia long PNG

## SAM VULUM i raitim

LIHIR gol main long Nu Ailan provins i wanpela bilong ol bikpela gol projek long wol. Ripot bilong wanpela

kampani long wok bilong main, Niugini Maining Limited i tokaut olsem wok bilong main i wok long kamap gut. Ol i wok long painim moa gol na

toktok tu namel long ol papa bilong graun wantaim provinsal na nesenel gavman nau i wok long kamap gut tu. Niugini Maining Limited. i bung wantaim ol


narapeia kampani na ol i kamapim Join Venja olsem long Porgera. Nem bilong ol dispela kampani long wok bilong projek em Kennecott Niugini Maining

Join Venja. Niugini Maining Limited, long ripot bilong en, i tok olsem em i gat bikpela bilip olsem wok bai i go het maski i gat planti hevi i wok long kamap long holim bek ol wok. Ol nupela senis tu nau i wok long kamap.

Join Venja bai kamapim 34.8 milien gol insait long namba wan 8-pela yia taim wok tru bilong painim gol i stat.

Na tu wok bilong painim gol bai stap long ailan map long 43 yia olgeta na i no 40 yia olsem ol i bin tokaut pastaim long en.

Join Venja i go het tu long mekim ol stadi long graun na ol bus long wok bilong main. Join Venja i wok bung wantaim ol lokal pipel long givim ol bisnis developmen na ol trening program.



• Dispela em plksa tasol i soim ol manmeri long Lihir gol bai luk olsem wanem long bihain taim

## Posmasta kot long stilim K22,000

POSMASTA long Oro provins i kisim sas long stilim K22,000 bilong Westpac beng.

Popondeta posmasta, Francis Weitau, 39 krismas bilong Lumi long Wes Sepik provins i bin kamap long kot long Mande 3 Me. Ripot i tok em na tripela arapela man, Rex Koni, 24, bilong Yangoru, Is Sepik provins, John Gombo, 21, bilong Tufi na Wilford Willie, 18, bilong Waseda long Oro provins i bin stilim dispela mani.

Westpac beng i bin laik salim disela mani i kam long Mosbi bilong kukim bikos ol i doti. Tasol 4-pela ya i kirap na stilim.

Ka bilong PTC i bin kisim dispela mani i go long ples balus taim ol lain

ya i stapim ka na kisim ol dispela mani.

Ol i bin holim Weita long ples balus taim em i laik baim tiket bilong Rex Koni bilong go long Lae. Ol wokman bilong Talair i luksave long mani i doti na ringim ol plisman. Ol i sekap wantaim beng bihain na namba antap long mani i wankain olsem ol dispela long doti mani.

Ol dispela man bai stap wet kot long haus kalabus na i no inap baim yet. Tasol long las wik Fraide, ol i bin kamap long kot na sinia mejjstret Wenge i lusim ol long K600 beil mani. Olgeta bai kamap long plis stesin olgeta Fraide long 8 klok moning na 4 klok apinun.

## Namaliu i tok long daunim pe long Julai

i kam long pes 1

kain komisn we i gat memba long olgeta hap inap daunim ol kain hevi olsem, long wanem ol pipel bai i gat tras long toktok bilong ol."

Em i tokaut tu olsem

dispela tok save nau i mas kolim bel bilong ol studen na ol i no ken go het long bagarapim ol samting na pretim komyuniti. Sapos ol i go het long protes, dispela i soim olsem i gat narapeia as bilong

mekim olsem.

Tasol ripot i kam long UPNG i tok olsem ol studen i strong yet long palamen i mas kibung pastaim long mun Julai na rausim dispela tingting bilong apim pe bilong ol memba.

## "Tewel" pukpuk i kilim man Madang

PUKPUK i bin kisim wanpela man bilong ples Garim long Madang las wik.

Nem bilong dispela man em Dadau Yangur. Em i gat 25 krismas, i marit na i gat tripela pikinini

Ol plisman i tok dispela birua i bin kamap taim Dadau i go painim pis long wanpela liklik wara klostu long bikpela wara Gogol.

Provinsal Plis Komisina (PPC), Pius Sipelung i askim olgeta man, meri na pikinini long lukaut gut tru taim ol i laik go painim pis long ol liklik han wara nabaut.

Em i tok, "Pukpuk i kisim man pinis na smel i stap yet. Olsem na olgeta arapela manmeri na pikinini bilong Garim na Ohuru i mas lukaut gut."

Samting olsem 12-pela plisman, ol opisa bilong Didiman na ol lain bilong ples yet i bin go painim bodi bilong dispela man taim em i lus. Long taim ol pipel i painim bodi bilong Dadau, pukpuk i bin kaikaim tasol wanpela lek na han bilong em. Olgeta arapela hap bilong bodi i stap orait.

Long bilip bilong tumbuna bilong ol yet, ol pipel i ting olsem dispela pukpuk i no enimal nating bilong wara. Dispela pukpuk em i masalai o tewel pukpuk.

Bikos long las yia, papa bilong Dadau tu i bin dai long wankain birua. Na long dispela, bikpela toktok i go raun olsem i gat sampela toktok i sut edensim dispela famili.

# Papua Niugini Nesenel Ileksen, Me-Jun, 1992

Nem bilong ol olupela na nupela kendidet bai kamap bilong resis long ol sia long olgeta ilektoret. Dispela em i bikpela samting olsem na olgeta man na meri bilong Papua Niugini i mas save gut tru long olgeta samting bilong mekim long taim bilong ileksen.


Sapos yu laikim helpim, go lukim ol Distrik Menesa, na ol Distrik Opisa-In-Sas (DOIC).

Askim ol long wok bilong ileksen em yu no klia long en.

**Tingim gut, ol gutpela lida i kamap long stretpela vot**

## TASOL HUSAT I KEN VOT?

Ol Papua Niugini man na meri husat i givim nem tasol long 1992 ilektorel rol bai tromoi vot. Na dispela i min olsem olgeta sitisen husat em krismas bilong ol i winim 18 yia na i bin stap insait long wanpela ilektoret moa



Authorised by Reuben Kaiulo, Electoral Commissioner Papua New Guinea

long 6-pela mun na mama i bin karim em pastaim long 27 Jun, 1974 bai tromoi vot.

Sapos yu winim olgeta dispela toktok na i no givim nem yet, pulimapim wanpela fom long Provinsal Ilektorel Opis, Distrik Menesa o Opisa-In-Sas long hap bilong yu.

**Tingim ... lo i tok olsem olgeta Papua Niugini man na meri i mas givim nem bilong vot.**

## OL NUPELA LAIN BILONG VOT

Sapos mama i bin karim yu pastaim o long 27 Jun, 1974, yu mas givim nem bilong vot. Yu i no inap vot long neks yia sapos nem bilong yu i no stap long ileksen rol.

Go long Provinsal Ilektorel Opis i stap klostu long hap bilong yu na pulimapim wanpela fom bilong vot nau!

**Tingim gut, givim nem nau! Olsem bai yu gen vot long 1992 ileksen.**



# TU MINIT TINGTING MI OLSEM SUT I HOLIM HAUS

*"Nem bilong em i mas kamap bikpela, na bilong mi i mas go daun." (J 3:30).*

TUDE mi laik toktok long olkain sut i save strongim samting. Long taim ol i wok haus, sampela sut i save holim banis. Bihain haus i pinis, ol i rausim ol sut. Ol i bin mekim wok bilong ol pinis.

Long taim yumi planim yam o mami, yumi save subim wanpela stik i go insait long graun bai yam i ken gro antap long en na kisim gutpela win long ol lip bilong en. Bihain yam i mau pinis, yumi rausim dispela stik. Em i bin mekim wok bilong em pinis.

Long taim yumi sanapim wanpela longpela pos o mambu na yumi laik simenim insait long graun, yumi save taitim em long sampela baklain bai em inap sanap stret. Bihain simen i strong pinis, orait, nau yumi save tekewe ol dispela baklain.

Ol i mekim wok bilong ol pinis.

Sapos yumi planim wanpela naispela liklik tri na yumi laik bai em i mas gro stret olgeta, orait, yumi save helpim em na saposim em long wanpela strongpela stik bai win na ren i no ken brukim na krungutim em. Bihain em i strong pinis, bai yumi rausim dispela stik helpim.

Dispela tu em i lo bilong kamapim gutpela pikinini. Taim em i gro yet na em i yangpela yet, em i mas gat sampela sapot i holim em bai em i no bruk o pundaun o kamap krungut na bagarap. Ol dispela stik bilong strongim na holim ol pikinini na sumatin na yangpela, em ol tok stia bilong papamama na tisa; em ol lo bilong skul na taun na famili na kantri; em ol lo bilong God. Sampela taim ol papamama na tisa i mas yusim strongpela han bilong stretim bek pikinini i stat long gro krungut.

Dispela bai givim pen long em. Tasol em i helpim em.

Ol papamama i save larim ol pikinini bilong ol i bihainim ol laik bilong ol tasol, ol i krungutim na bagarapim ol tru. Bihain bai ol i no inap stretim ol bek. Bai ol i kamap raskol na stilman na i pinis long kalabus tasol.

Em i hatwok tru long save long wanem taim ol yangpela i bin kisim inap strong, bai ol inap stiaim laip bilong ol yet. Olsem na ol yangpela i no ken kros long taim papamama i pasim ol liklik. Papamama i gat save na eksperiens pinis. Ol i no save pasim ol yangpela nating. Ol i save pinis bilong wanem ol i mekim olsem.

Yangpela i save harim gut skul na tok bilong papamama, em i no ken lus. Em bai win. Yupela yangpela, yupela askim ol bikpela manmeri i gat nem na

namba tude, sapos ol i bin win long taim ol i bin sakim tok bilong papamama.

Wanpela bikpela sapot ol papamama na tisa i mas givim long ol yangpela, em i gutpela eksampel bilong ol yet long bihainim ol lo bilong God. Yu papa, yu mama, yu tisa, yu bikpela - yu yet yu mas skulim ol yangpela long wanem samting i gutpela na wanem samting i tambu long mekim. Em i pasin bilong ol pikinini na ol yangpela: ol i no save harim nating na mekim. Nogat. Ol i save LUKIM na mekim. Ol inap lukim eksampel bilong yu na bihainim, o nogat? Nau yu yet yu wanpela sapot, yu wanpela stik bilong holim ol, o nogat? Bihain bai yu no stap, na long dispela taim bai ol inap sanap long lek bilong ol yet?

Ol yangpela i wok long groap, ol i olsem liklik bebi i lainim wokabout. Mama i skulim em, mama i holim em liklik, na bihain mama i larim em yet i traime wokabout.

Olgeta taim em i pundaun, mama i save litimapim em bek... na i holim em na larim em i traime traime gen. Em tu i pasin bilong skul long wokabout long rot bilong lo bilong God. Ating wan wan taim yumi save pundaun, tasol oltaim papamama i sambai long litimapim yumi bek na skulim yumi, bai yumi yet inap long sanap stret na wokabout longwe long stretpela rot tasol.

## Ol meri Lutheran strong yet long skul bilong rit na rait

**ELIZABETH SOLOMON i raitim**

NESENEL opis bilong ol meri long Lutheran Sios bilong Papua Niugini i strongim yet wok bilong skulim ol meri long rit na rait. Dispela em olsem wanpela bikpela projek bilong ol long narapela tripela yia.

Wimens kodineta Gabby Gedisa i tok long las yia, opis i bin ranim wanpela woksop bilong ol trena. Dispela woksop i kamap olsem wanpela aweanes kempen bilong autim as tingting bilong projek.

Dispela i bin kamap gut tru. Olsem na ol bai holim moa woksop long ol distrik. Na ol distrik opisa yet bai ranim ol kos bilong helpim ol meri

bilong ples long lainim rit na rait.

Em i tok ol meri bilong Goroka, Mosbi na Kaiapit long Morobe provins i holim ol kos bilong ol.

Long mani bilong ranim ol distrik kos, ol meri yet long ol dispela hap bai lukautim dispela.

Gedisa wantaim ol arapela opisa bai go na helpim long lainim ol meri long rot bilong yusim buk "Kisim na Mekim". Wanpela bilong ol dispela buk i bilong tisa na narapela i bilong ol studen.

Narapela Lutheran grup bilong ol meri long Popondetta i wok long redi nau long skul bilong rit na rait. Skul bai stat long 3 na pinis long 7 Jun, 1991.

## Morobe na Oro kisim helpim bilong sios

WOK i kamap nau long tupela ples we wara i bin bagarapim long boda bilong Morobe na Oro provins.

Lutheran Sios bilong Papua Niugini i bin givim K32,000 bilong wokim haus lotu na

klasrum bilong ol lain long Saire Ainse na ed pos long Popoe. Wok bilong haus lotu bai kisim K1,500 na ol klasrum bai kisim K31,000.

Bikpela ren i bin pundaun las yia na

bagarapim haus lotu long Saire Ainse na ol klasrum long Popoe.

Dispela mani i bin kam long Lutheran Sios bilong Amerika na Jemani, wantaim narapela hap bilong ol pipel na wan wan sios bilong Papua Niugini.

## Ol yut helpim Daru long stap isi

**IAN KAKARERE i raitim**

OL yut bilong Daru yet i go pas nau long wok bilong daunim hevi bilong lo na oda long hap bilong ol.

Dispela ol yangpela manki bilong biktaun bilong Westen provins yet i save raun long nait na was long ol bikhet man. Wanpela man bilong Daru, Gem Gigiba i tok olsem long olgeta nait, dispela ol yangpela manki bilong Daru long wan wan hap bilong ol na lukim olsem no gat pairap o bikhet pasin i kamap.

Em i skruim toktok olsem dispela rot bilong yusim ol yut long traime daunim hevi bilong lo na oda i wok long kamap gut tru. Bikos i no gat moa pairap na bikhet nabaut olsem long bipo.

Em i tok long olgeta foitnait, wan wan man o famili bilong Daru i save

givim K5 long ol dispela yangpela man bilong ol long raun na wok. Gigiba i tok ol yut i save yusim dispela mani long baim ol ti na suga bilong ol. Olsem bai ol i no inap slip long nait.

Ol i brukim Daru i go long 4-pela hap. Na long ol dispela 4-pela hap, ol yangpela bilong wan wan kona bai wok long hap bilong ol yet.

Sapos ol i lukim wanpela man o meri i wokabout long narakain pasin, ol bai tok save long ol plisman. I luk olsem dispela wok bilong ol yut i bin pretim tu ol raskol bilong Daru husat i ranawe pinis lusim ailan.

Dispela wok bilong yusim ol yangpela i bin kamap las mun bihain long bikpela hevi na trabel long ailan. Tasol nau dispela olgeta samting i go daun tru. Daru i stap isi tru na ol pipel i sindaun amamas tasol.

## Ol Moru pipel tingim yet namba wan misineri

YUNAITED Sios bilong Papua Niugini long Mosbi i bin kisim piksa bilong namba wan misineri husat i bin kam na wok wantaim ol pipel bilong Moru.

Ol pipel bilong Moru na Koaru i bin givim mani bilong wokim dispela piksa bilong namba wan misineri, Dokta H.A. Bert Brown long bronz. Dispela medal i strong moa na inap stap winim taim.

Ol lain bilong Kaunsil bilong Wol Misin long Yunaited Kingdom i bin wokim. Bert Brown i bin kam long Papua Niugini long 1938 na stap wok wantaim ol Koru pipel olsem wanpela misineri bilong London Misineri Sosaiti. Em i stap wok yet long dispela hap long namba tu Wol Woa.

Em i stap wok long dispela hap tasol i go inap long taim em i dai. Na ol pipel i planim em yet long Moru.

Bert Brown i bin statim ol wok bilong em long nambis. Tasol em i gat bikpela laik long go insait tu long bus. Orait long 1952, em i kirapim misin stesin bilong em long Suasi.

Wanpela man i bin tok olsem Bert i save tok, sapos wanpela sios i no wok olsem wanpela misin (dispela i min bilong go na autim Gutnius na bringim ol man i kam insait long banis bilong God), dispela em i no sios tru. Em i man bilong wokabout longpela rot na planti wik long bus. Em i ken helpim ol sikman olsem wanpela dokta, tanim tok ples long Baibel, bringim sipsip na gutpela pasin bilong wok fama long ol hailans pipel, helpim long raitim sampela stori long laip bilong Papua Niugini

pipel na tu long droim sampela piksa antap long ol stem.

Bikpela wok bilong Bert long tanim tok em long wok bilong Toaripi tok ples. Long 1970, em i lusim Moru na kam stap long Mosbi na go het yet long tanim toktok. Bihain tasol long ol i autim Baibel we em i bin tanim, Reveren Bert Brown i dai.



• Dispela pes bilong Bert Brown em ol i wokim long bronz, olpela LMS misineri husat i bin go long Moru.



• Ol dispela 4-pela i go lukluk long ston poto bilong Bert Brown em ol i wokim long wanpela kain strongpela minnerel ol i kolim bronz. Long Iephan i go long raitan em Susana Setae, Ofae Mitaharo, na Konlo Vani bilong Yunaited Sios Asembli Opis, na Reveren Evera Meakoro, Bisop bilong Wes-Galp rijon bilong Yunaited Sios. Poto. Oria Gemo.



# HIGHLANDS DARTS CHAMPIONSHIPS

**DATES** : 7th, 8th, 9th & 10th June, 1991  
**TIME** : 12.00 noon each day  
**VENUE** : GOROKA HOTEL

## PRIZES

K500	Champion Team
K200	Runner-Up Team
K 50	Highest Scorer
K 50	Highest Checkout

*SEE YOUR LOCAL DARTS ASSOCIATION  
FOR FURTHER DETAILS.*

**SPEAR**

### Gutpela toktok bilong ol Kurdsitan i kamap nau

OL lida bilong Kurdsitan i tok orait pinis long stapim gavman bilong Saddam Hussein, na putim kamap Demokresi gavman long Irak, na stapim olgeta hevi bilong ol Kurdsitan refuji.

Masoud Barsani lida bilong Kurdsitan Demokresi i tok olsem ol i bin putim pinis 20 plen bihain long wanpela bikpela kibung ol i holim insait long tupela wik.

Na ol i tokaut long dispela bihain long ol i harim olsem Yunaited Nesen Sikyuriti fos bai i go insait long refuji kem bilong ol Kurdsitan pipek long Noten Irak.

Dispela tok orait i kamap bikos long wanpela tok orait namel long Irak gavman na ol opisal bilong Yunaited Nesen long rausim moa long 500 soldia long kem bilong ol refuji.

Tasol wanpela tok orait namel long ol Kurdsitan na gavman bilong Saddam i tok Ba-ath Pati i mas stap ausait long nupela ileksen bilong Irak gavman. Em i tok planti bikhet pasin i stap yet na stapim ol Kurdsitan na Irak gavman long sainim wanpela pepa bilong bel isi.

Barsani i no wanbel long ol plisman bilong Kurdsitan long joinim ami bilong Irak. Insait long dispela nupela demokresi gavman sampela ol memba bilong Kurdsitan bai i stap insait tu.



Taim bilong amamas - Lupita Jones bilong Meksiko long raithan i bin winim taitel bilong Miss Universe resis long Las Vegas. Sanap wantaim em long namel em Mis Netherlands, Pauline Huizinga husat i winim namba tu ples na Mis Asia. Hia ol i sanap wetim ol sas bilong tokaut long wina.

### Saut Afrika yesa long ANC

JOHANESBEG: LONG Fonde gavman bilong Saut Afrika i tok orait long askim bilong ol opisal bilong Afrika Nesenel Kongres (ANC) long stapim olgeta tumbuna samting bilong pait insait long Johannesbeg.

Askim bilong ol i sut long ol ples we pait i stap yet. Dispela tok orait gavman i putim pinis insait long lo bilong Gavman long Pritoria long Fonde 23 Me 1991. Gavman i bin tokaut long dispela bikos wanpela kibung i bin tok olsem ol pipel bilong Presiden F. W. de Klerk wantaim Sif Mangosuthu Gatsha Buthelezi, Presiden bilong Zulu Inkatha Fridom Pati i bin karim pait samting bilong ol tumbuna long ples we


pait i strong yet. Sif bilong Inkatha Buthelezi i tok dispela em i wanpela rot we ol arapela manmeri bai i luksave long ol pipel bilong em.

Tasol Afrika Nesenel Kongres i tok ol sapota bilong Inkatha Murmen i bin yusim ol kain samting tu long pait long taun bilong ol blek man.

Mista De Klerk i bin stapim ol dispela samting long bipo.

Nau yet em bai traim long stapim olgeta samting bilong pait insait long taun ya.


Ol pipel bilong Afrika Nesenel Kongres i tok olsem gavman i mas rausim olgeta samting bilong pait long Afrika.



Wanpela plisman i kalap na kikum dispela studen bilong Korea bihain long bikpela protes em ol studen i holim long las wik.



Pawa bilong ami - Dispela soldia em wanpela memba bilong "Black Cat" komando bilong India. Ol dispela lain i wokabaut raun nau bilong painim ol rebel paitman bilong Sikh husat i bin killim Praim Minista Rajiv Ghandi bilong India. Bom i bin palrap na killim em.



Raithan na daunbilo: Ol meri bilong India i paitim bros bilong ol na krai nabaut bilong solm olsem ol i wari na i no amamas long dai bilong Praim Minista Rajiv Ghandi. Dispela em sampela bilong ol planti tausen pipel husat i bin kam bung na krai long bodi bilong Mista Ghandi ausait long haus bilong em long Nu Delhi.



### Ol hindu i sapatim Ghandi

NU DELHI, INDIA: Praim Minista bilong India, Ranjiv Ghandi i bin dai, na ol pipel bilong India i karamapim em long laplap na karim em i go long ples we ol i bin planim mama bilong em.

Mista Maganbhai i tok Praim Minista Ghandi i save pinis olsem em bai i painim sampela hevi long wok bilong em. Nau yet olgeta pipel bilong India i bin sindaun long sori. Planti samting i bin senis long nait taim Praim Minista Ghandi i dai.

Bikpela ileksen bilong Indai bai i kamap na bikpela tingting i stap long Bharatiya Janata Pati long winim ileksen ya. Dispela pati em Ghandi yet i go pas long en.

Tasol ripot i tok ileksen bai i no inap kamap i go inap long namel bilong Jun. Wanpela bikpela bisnis man long Nu Delhi i tok planti memba Hindu sios i redi pinis long votim ol kendidet bilong Bharatiya Janta Pati (BJP) long dispela wik.

Ol bai i vot long dispela pati, bikos tupela pati husat i lukautim kantri taim Ghandi i go aut long gavman long 1989 i pundaun long stapim planti hevi long India. Dispela i bai stapim ol Hindu long votim tupela pati ya gen.

Bisnisan ya i tok Ghandi em i wanpela gutpela lida bilong India. Em i bilip olsem pati bilong Ghandi bai i win long dispela ileksen. Tasol indai bilong em bai i kamapim planti hevi long India, bikos ol man husat bai i kisim ples bilong em i no inap long lukautim gut India.




# Ku mas lukautim PMV!

Husat i brukim dispela lo bai lusim laisens,  
siaman bilong transport i tok.

re i go pinis long long ol PMV bas  
ng klinim na stretim olgeta  
ol pastaim long ol pilai bilong  
fik Gems i stat long mun  
insal Len Transpot

Nupela lo bilong stapim  
bilong ol PMV i bin stat  
mun yet  
"M  
ma



GLAS BILONG WINDUA EM

**K240.00**

OL TIE ROD ENDS EM  
**K25.00**

OL KLATS PLET EM  
**K77.00**

OL BREK SU KIT EM  
**K73.00**

OL KING PIN KIT EM  
**K104.00**

OL YUNIVESEL JOIN EM  
**K37.00**

OL SAMTING BILONG  
WOKIM ENSIN EM  
**K1,368.00**

OL FILTA KIT EM  
**K61.00**

NA TU OL PISTON, LAINA, OL RING, OL GASKET LONG SET,  
OL BIKPELA BEARING, OL BIKPELA END BEARING...


## SEKAP NAU LONG OL PRAIS BILONG MIPELA EM I WIN TRU!

HARIAP NAU!



**NEW GUINEA  
MOTORS**

NO GAT PLANTI  
I STAP!



9th SOUTH PACIFIC GAMES  
PAPUA NEW GUINEA 1991

PNG  
1991

# CAMBRIDGE

A MAJOR SPONSOR

# HELT NIUS bilong Papua Niugini

ME  
1991

i kam long Dipatmen bilong Helt, UNICEF, WHO na Hiri

## Posin i wok long kapsait yet long Papua Niugini

LONG planti yia nau, ol pipel i save yusim kain kain drag o marasin bilong daunim ol hevi olsem wari, les na pen long skin bilong ol. Sampela i save yusim long bilip bilong toktok wantaim ol tewel long narapela graun.

Planti lain pipel bilong ol kantri long Pasifik rijon i save yusim buai wantaim daka na kava long mekim olsem.

Inap long 400 yia nau bihain long ol waitman i kam, planti kain kain nupela marasin na

drag tu i kam wantaim ol dispela lain. Na dispela ol marasin na drag i no gutpela. Planti i bagarapim laip na septi bilong ol. Tupela bikipela kain marasin nogut olsem em bia na sigaret. Nau tasol spak brus o marijuana i kam insait.

Dispela ripot i toktok long drag na ol marasin nogut em i kamap nau, wanem samting i stap na kain pasin bilong ol man na meri long Papua Niugini. Olgeta toktok bilong

ripot i kam long wan-pela wok painimaut em Dipatmen bilong Helt na Trensport i bin kamapim. Na kampani ol i kolim long First Marketsearch (PNG) Limited i mekim ol dispela wok painimaut.

### Bia na ol Strongpela Dring

Pastaim long ol waitman i kam long Papua Niugini, i no gat wan-pela ripot olsem ol

pipel bilong Papua Niugini i save kisim bia na ol strongpela dring. Bihain ol lo i kamap na stapim ol blakman long kisim bia na ol strongpela dring.

Tasol bihain long sampela yia, dispela lo i senis na planti blakman i stat dring bia na strongpela dring na go raun long ol klab nabaut. Na long dispela taim, kain ol hevi na birua na bagarap em Papua Niugini i painim i wok long go antap. Dispela em ol kain hevi bilong paitim meri, pait insait long komyuniti, hevi bilong lo na oda, ol ka i bam na manmeri i dai, na ol man na meri bilong dring tru i painim hevi long bodi bilong ol.

Wok painimaut bilong First Marketsearch long 1989 i soim tupela samting. Namba wan wok painimaut i sut long ol grup husat i stap insait long ol dispela kain samting. Dispela em ol kain stail na rot em ol dispela grup i save bihainim long mekim ol samting.

Insait long dispela namba wan wok painimaut, ol i bin holim 12-pela grup kibung. Foapela (4) i bin kamap long Westen Hailans, 4-pela long Mosbi na narapela 4-pela i bin



• Pasin bilong smok na dring bia i save bagarapim planti yang-pela man na meri long wol tude.

## Wol No-Tobako De i laikim fri sosaiti

WOL No-Tobako De i save kamap long olgeta yia. Na 167 kantri husat i memba bilong Wol Helt Oganaisesen i luksave na save tingim dispela de.

Long dispela de, ol i save sutim bel bilong ol gavman, komyuniti grup na ol wan wan man na meri long klia gut long wanem samting smok na sigaret i ken kamapim long laip bilong man. Olsem bai ol dispela wan wan lain i ken painim stretpela rot long skulim ol man na meri bilong smok long senisim dispela kain pasin bilong ol.

Dispela em i wanpela bilong ol bikipela de we Wol Helt Oganaisesen i save makim long olgeta yia bilong skulim ol pipel long wanem kain

samting i kamap long wok bilong helt long olgeta kona bilong wol. Long dispela rot, WHO i laik kamapim tru bikipela as tingting bilong en long "Helt Bilong Olgeta Long Yia 2000".

Wol No-Tobako De i save kamap long 31 Me long olgeta yia. WHO i makim 1991 Wol No-Tobako De olsem "Ol Pablik Ples na Trensport: Larim I Stap Fri long Tobako".

As tingting bilong Wol No-Tobako De i sut long bikipela kempen bilong autim tobako olgeta long ol sosaiti na komyuniti bilong yumi.

Sampela ol bikipela toktok bilong Wol No-Tobako De i bin sut long "Wimen na Tobako" long 1989 na "Ol Pikinini na Yangpela i Stap Fri long Tobako" long 1990.

kamap long Arawa long Not Solomons provins. Na long olgeta kibung, i save gat samting olsem 8 o 10-pela man na meri i save kamap.

Namba tu wok painimaut i sut long ol wan wan man na meri. Ol i bin toktok wantaim ol 600 man na meri bilong Mosbi, Arawa na Westen Hailans provins. First Marketing i bin toktok wantaim ol dispela lain husat i stap klostu long ol haiwe.

Planti bilong ol dispela wok painimaut i tokaut long ol kain helt lo long wok bilong edukesen, rot bilong autim helt nius na tok save na ol


kain samting. Mipela i bin painimaut tu olsem man husat i stat dring nau tasol i bin stat mekim olsem tripela yia i go pinis. Liklik lain tasol i bin stat dring bipo yet olsem 7-pela yia i go pinis. Planti meri i bin stat dring tupela yia i go pinis. Na dispela i tokaut long wok painimaut long as bilong bikipela lain i save dring nau long Papua Niugini.

Planti man na meri i bin tokim mipela olsem ol i save dring olgeta taim, maski ol i save long wanem kain hevi em bia na strongpela dring i ken mekim long

ol. Dispela em long ol kain hevi bilong painim birua long rot, paitim meri, komyuniti pait na pasin bilong raskol.

Narapela 49 pesen bilong ol dispela lain em wok painimaut i karamapim i tokaut olsem ol i save painim hevi bilong dring. Narapela 21 pesen i tok olsem ol i amamas long dringim bia.

Dispela wok painimaut i soim tu olsem sampela lain i save dring bilong amamas, sampela i save dring taim ol i laik sindaun isi na lusim tingting long olgeta hevi na sampela i go moa long pes 13



Smok em i samting nogut tru long meri i gat bel. Posin smok i save go insait long blut bilong meri na i go kamap long pikinini, na em tu i kisim dispela posin. Sapos meri i pulim smok taim em i gat bel na i karim pikinini planti taim dispela pikinini i ken liklik na i no strong. Sampela taim pikinini i no stap longtaim na i dai pinis.



Ol manmeri i laik pilai gut na ran hariap tru ol i save smok i save mekim ol i sot win.



Ol long famili i save gut na ol i ken hepi sapos ol i pulim smok bikos:

1. Ol i no lusim nating mani bilong ol long ba'm sigaret
2. Pikinini bilong ol inap kamap gut na no ken kisim planti sik long posin bilong tabak.
3. Ol long famili i no ken kisim sik olsem man i save smok oltaim.
4. Ol manmeri i no smok i ken stap planti yia, winim ol i save smok. Sik bilong klok na banis win i no ken kamap tumas long ol.
5. Pikinini bilong ol inap winim arapela long kisim save long skul, na ol inap pilai gut.

Yu laik kisim gutpela sindaun na stap longtaim tru? Yu no ken pulim smok- Na tokim ol long famili bilong yu long no ken pulim smok.

DO YOU  
SMOKE  
?  
YU  
SAVE  
SMOK?

# Long Papua Niugini, ol meri i win tru long holim sigaret

PLANTI meri tru long Papua Niugini i save smok. Mipela i stap namel long narapela 10-pela developing kantri.

Samting olsem 80 pesen bilong ol meri Papua Niugini long Westen Pasifik rijon i save smok. Dispela em namba bilong ol bikpela meri. Tasol mipela i no klia yet long hamas narapela yangpela meri em krismas bilong ol i daunbilo long 18 yia tu i save

smok.

Ol narapela kantri husat i gat bikpela namba bilong ol meri i save smok tru em:

- Swazilen 72 pesen
- Kiribati 70 pesen
- Bolivia 61 pesen
- Nauru 59 pesen
- Nepal 58 pesen
- Brazil 53 pesen
- Fiji 44 pesen
- Meksiko 44 pesen
- Tonga 38 pesen

Planti bilong ol meri long Westen Pasifik rijon i save stat smok pastaim long krismas

bilong ol i abrusim 19 yia. Long ol bikpela kantri long wol, Denmark i winim tru ol arapela. Bikpela namba bilong ol meri tru i save smok. Bihain long Denmark em Nethalens.

Planti meri husat i save wok long Papua Niugini i save putim smok wantaim wok bilong ol. Ol i ting olsem sapos ol i holim wanpela sigaret long han, dispela bai soim olsem ol i wokmeri na i winim ol meri bilong

ples. Dispela i no tru long wanem ol i bagarapim ol yet tasol.

Planti yangpela man na meri husat i no save wok i save smok planti. Na dispela ol lain i ken painim hevi bilong sigaret hariap tru.

Ol meri husat i save smok bai painim wankain sik kensa olsem ol man. Tasol bikos ol i meri, ol bai inap kisim ol arapela sik bilong smok hariap tru. Tasol dispela i no min olsem ol man i ken

smok na abrusim ol dispela sik.

Ol meri i ken kisim ol narapela sik em sigaret i save kamapim olsem hat atek sapos ol i save kisim tu marasin bilong pasim pikinini.

Ol meri i mas luksave gut tu olsem sapos ol i save kisim ol marasin na bihainim arapela rot bilong pasim pikinini, ol i no ken smok. Sapos wanpela meri husat i gat bel i smok, em i ken painim hevi bilong karim pikinini, na long

sampela taim, em i no inap karim. Pikinini i ken kamap tasol bai i no gat hevi bilong em. Smok i ken banisim tu meri long kamapim kiau bilong bung wantaim wara bilong man na wokim bebi.

Dispela ol tok lukaut i kamap bihainim wanpela bikpela wok painimaut em i bin kamap long 20 kantri insait long wol. Na 16 bilong ol dispela kantri i bikpela.

Dispela wok painimaut i soim olsem ol meri i save winim tru man long smok. Wankain mak i bin kamap long narapela 4-pela developing kantri em ol wok painimaut i kamap long en. Dispela ol 4-pela kantri em Brazil, Chile, Papua Niugini na Urugwai.

Long Papua Niugini, wok painimaut i bin long ol yangpela em krismas bilong ol i stap namel long 15 na 19 yia. Na 33 pesen bilong ol dispela lain em ol meri na 22 pesen em ol yangpela man husat i save smok.

Hevi bilong Papua Niugini i ken kamap

moa bikpela i no long ol kain sik olsem lang kensa, sik bilong lewa, tasol ol i ken painim sampela narakain hevi olgeta.

Planti pipel bilong Papua Niugini i save stap long haus em i no gat gutpela rot bilong pulim win. Na long ol dispela kain haus, smok bilong paia i ken mekim ol i kisim sik bilong nek i pen na tu ol kain kain pen long lewa.

Smokim sigaret i save bagarapim skin hariap tru. Dispela i min olsem man bai lusim skin na i no inap amamas long wok bilong em.

Wanpela bikpela sik bilong kensa long Papua Niugini em kensa bilong maus. Dispela i no save kamap long sigaret tasol. Nogat. Em i save kamap tu long buai wantaim kambang.

Planti pipel bilong Papua Niugini i no save go hariap long haus sik bilong sekapan painimaut sik bilong ol. Olsem bai marasin inap wok hariap bilong helpim ol long no ken lusim skin na kisim sik.

THE 1991 PTC TELEPHONE DIRECTORY

# It's a winner for information!

Better and faster than ever with...

- ★ Emergency Numbers...
- ★ Coloured Information Pages
- ★ List of Government Departments
- ★ White Pages section with all phone numbers in PNG
- ★ Green Pages with Fax, Telex and Postal Information
- ★ Yellow Pages - a complete buying guide with the fast find index

LET'S DO IT PNG!  
USE YOUR NEW DIRECTORY



POST & TELECOMMUNICATION CORPORATION



A joint venture publication between PTC and Edward H O'Brien (Enterprises) Pty. Ltd.

11074

## Pas i go long Edita

Rausim ol sigaret kampani wantaim ol posin bilong ol

Dia Edita,

Long taim mi bin kam raun long Papua Niugini, mi no bin amamas long lukim olsem ol sigaret kampani we ol lain bilong ovasis na Papua Niugini i papa long en i wok long go antap.

Long olgeta yia long ol kantri olsem Yunaited Kingdom, Australia na Amerika, planti pikinini moa i save dai taim ol i stap long bel bilong mama yet. Dispela i kamap bikos ol mama i save smok o ol i save stap klostu wantaim ol lain i save smok. Na long wol tude, smok tasol i save kilim planti tausent man, meri na pikinini moa.

Long planti bikpela kantri long wol tude, ol pipel i luksave nau long ol dispela hevi na wanem arapela birua na bagarap em sigaret inap kamapim long ol. Olsem na long sindaun bilong ol yet, ol i no save amamas long man o meri husat i smok. Olsem na wanem samting ol dispela kampani i mekim em long bringim ol dispela samting bilong ol i kam na salim long ol kantri husat i stap hait yet.

Sigaret i save kamapim ol kain sik olsem lang kensa, sik long lewa, win i sot, strongpela kus na planti arapela pen na les nabaut. Na taim ol dispela kampani i bringim sigaret bilong ol i go long Papua Niugini, ol i wok long bringim tasol ol dispela sik.

Ol dispela sigaret kampani i mekim dispela na sutim yet bel na tingting bilong ol yangpela man na meri long ol kempen bilong ol. Dispela em long ol kain kain spot na bikpela samting em i kamap. Long Papua Niugini, tupela bikpela gutpela eksampel em long ol kain spot olsem rugby na soka.

Kirap nau long slip, Papua Niugini. Dispela ol sigaret kampani i no inap wari long husat em ol i bagarapim. Tingting bilong ol i stap tasol long kisim mani. Ol i no givim wanpela helpim liklik long kirapim Papua Niugini. No gat tru.

Sampela samting i rong liklik long Papua Niugini. I no gat mani bilong baim na stretim ol samting bilong helpim na daunim sik kensa. Tasol i gat mani bilong baim na saplaim ol samting we i save kamapim sik kensa. Na dispela em i bikpela samting stret long wol bilong statim dispela sik.

Concerned Dokta,  
Milton Keynes,  
England.

# Spak brus i mekim wanem long yanpela man na meri long kantri

MARIJUANA em i nem bilong wanpela drag o marasin o spak brus kain diwai yumi kolim Kanabis Sativa.

Dispela marijuana i gat moa long 400 marsin na 61 long ol marasin ya (Kanabinoids) yumi i no inap painim long arapela diwai. Wanpela long ol dispela Kanabinol marasin em yumi i save gut tru nau long en em yumi kolim; Delta 9 T.H.C. Strong bilong T.H.C long planti marijuana i olsem 1-2 pesen samting, tasol nau wanpela nupela haibrid diwai ol i kolim Sinemilla i gat olsem 10-pela pesen T.H.C, na dispela i stong moa yet.

Planti manki i save kisim lip bilong marjuana na wokim sigaret long en na smokim. Ol i ken smokim lip long paip tu.

## Marijuana i mekim wanem wok long bodi?

Pastaim tru man i smokim marijuana bai em i spak. Pasin bilong spak i save mekim man i pilim gutpela na bikpela amamas wantaim driman.

Dispela pilim na driman i kamap long taim T.H.C i daunim wok bilong kru long tingim wari na hevi samting na man i no inap long pilim wari na hevi samting.

Bikpela hevi long dispela i olsem, T.H.C i save laikim tumas long

miks wantaim fat olsem na i save miks bikpela tru wantaim ol kain hap bilong bodi olsem kru, na rot bilong kamapim pikinini, na narapela hap i gat fat long en. Dispela T.H.C bai i no inap lusim bodi hariap na i stap insait longpela taim liklik, 1 wik i go 3 wik samting.

Taim ol i smokim Marijuana, smok bilong en i mekim ol i pilim narakain tru. Ol i pilim bel i si na amamas, na isi long ol samting. Nogat mari moa. Ol i wok long driman long de. Ol i no laik mekim wanpela samting, nogat. Ol i laik sindaun isi tasol na wok long smokim Marijuana, na pilim gutpela driman. Dispela kain driman i pulim ol long smokim Marijuana moa moa yet.

Long dispela taim tu, ol i painim hat tru long holim sampela samting long tingting. Ol i lus tingting kwik long olgeta nupela tok i kamap. Ol i lus tingting kwik long ol samting ol yet i mekim.

Sampela taim ol i lus tingting long wanem samting ol yet i toktok long en. Tasol, ol i no wari tumas long lusim tingting. Ol i laik smokim Marijuana na driman moa yet.

## Wanem samting bilong Marijuana i save mekim ol i driman olsem?

Wanpela bikpela marasin insait long

smok bilong Marijuana, i gat nem THC. Dispela em i wanpela strongpela posin. Taim wanpela man i wok long smokim marijuana, dispela posin THC i save go insait long kru na kukim kru inap long tingting i paul na ol dispela kain driman i kamap.

THC i no save lusim bodi gen kwik, nogat. Poison THC bilong wanpela sigaret Marijuana em bai stap insait long bodi inap long 21 de samting. Na sapos wanpela mangi i save smokim 3-pela o 4-pela sigaret Marijuana long wanpela wik, olaman, posin THC i no inap pinis long bodi bilong en, nogat. Bodi bai pulap tru long dispela posin, na posin THC bai i gat longpela taim tru bilong kukim bodi na bagarapim.

Smok bilong Marijuana i wok long bagarapim 6-pela bikpela samting long husat man o meri i save smokim. Em i olsem

1. Lang (Waitlewa)
2. Kru na Tingting
3. Marit Pasin
4. Strong bilong Daunim Sik
5. Pasin bilong ol Yangpela
6. Mambu bilong Nek (kisim win).

## Smok Marijuana bai bagarapim ol lang (waitlewa)

Smok bilong ol sigaret bilong tobako i givim



• Dispela foto i soim diwai spak brus em i wok long kamap na putim plawa nau. Dispela em long wanpela spak brus gaden long Goroka, Isten Hailans provins. Tasol gutpela wok bung wantaim namel long ol pipel, komyuniti na han bilong lo i wok long daunim nau ol dispela kain gaden nogut.

planti posin long ol lang (em i Waitlewa) bilong man husat i save smokim tobako.

Tasol, smok bilong marijuana i givim yumi posin inap long 22 sigaret tobako. Na tu, poison bilong kamapim sik kensa i kamap dabol long ol sigaret Marijuana.

Olsem na smok Marijuana bai kamapim sik kensa insait long ol lang bilong planti man o meri husat i smokim long olgeta wik.

Wok bilong ol lang em bilong pulim win na miks gutpela win wantaim blut. Blut i

save karim gutpela win i go long olgeta hap bilong bodi na givim long bodi inap long bodi i ken i stap laip.

Smok marijuana i save kam insait long lol lewa na kukim nogut. Dispela i kamapim sampela kaikai nogut olsem:

1. Rot bilong pulim win i pas, na
2. Kus nogut i kamap na i stap oltaim.
3. I gat pen i kam wantaim kus.
4. Kus wantaim smok bai brukim planti hap insait long ol lewa inap long man bai stap win-sot long olgeta yia

bihain. Na man bai i no gat strong long pilai spot o mekim hatwok, long wanem, em i no inap long pulim gut win.

## Smok Marijuana bai bagarapim Kru na Tingting.

Insait long kru bilong yumi i pulap long ol liklik samting ol i kolim ol bren sels. Ol bren sels i liklik tumas. Bilong lukim ol sels, yu mas glasim long strongpela glas ol i kolim maikroskop.

Ol bren sels i gat wok bilong tingting na givim stia long yumi. Posin

THC bilong marijuana i save go pulim apim planti ol bren sels bilong kru na bagarapim ol.

Taim sampela ol bren sels bilong kru i pulap long posin THC ol i no inap wok gut. Olsem na tingting bilong man i save smokim spak brus em i sot na i save paul planti. Man bai lus ingting long planti samting olsem na tok pinis long antap.

Man i no inap long kisim ol nupela save. Em i no inap lainim nupela samting. Man bilong smok i no inap long tingting.

# Posin i wok long kapsait yet long Papua Niugini

i kam long pes 11

i tok dispela i save givim ol sans bilong bungim ol nupela pren o toktok long ol narapela. Liklik namba i tokaut olsem bia i save swit, tasol no gat wanpela i tok olsem ol i save dring bilong stretim nek i drai.

Narapela bikpela wok nau i stap em long traim daunim na stapim dispela kain pasin bilong putim ol tok save long niuspepa, redio na televisen olsem dringim bia na strongpela dring i bihainim laip na sindaun bilong ol pipel long Papua Niugini. Dispela i no tru bikos ol tumbuna bilong mipela long bipo i no save dring.

Maski i gat ol lo i stap, no gat wanpela bilong ol dispela lo inap daunim tru olgeta pasin bilong autim ol tok save. Bikos tok save bilong bia na strongpela dring i save kamap long ol sain nabaut, long ol ples bilong pilai, long ol kain kain posta, long ol "T" siot, long sapotim ol spot tim na planti arapela samting.

Wanpela bikpela kampani tru long Papua Niugini bilong salim bia em South Pacific Holdings. Dispela kampani i save yusim bikpela mani moa long salim na autim ol tok save long bia bilong en, SP. Na sapos yumi skelim dispela wantaim mani em gavman i save makim bilong skulim ol man, meri na pikinini long hevi bilong bia na strongpela dring, dispela i liklik tru.

## Tobako/Sigaret

Tobako i bin kamap long Papua Niugini pastaim long ol arapela Pasifik Ailan kantri. Em tu i kamap long taim ol namba wan waitman i krungutim ailan bilong Papua Niugini.

Long bipo, planti man i save smokim tobako em ol yet i planim long gaden. Tasol dispela i wok long senis nau. Planti pipel bilong ples nau i laikim sigaret em ol i wokim long faktori olsem Benson & Hedges na Cambridge.

First Marketsearch i bin mekim ol wok

painimaut bilong tobako, buai na spak brus (marijuana) long 1989. Long Mosbi, Lae, Rabaul na Hagen, ol i bin toktok wantaim 1,200 pipel bilong ples.

## Buai

Ol helt woka i no kla gut yet long wanem kain ol hevi em buai i save kamapim. Kensa bilong maus i ken kamap taim man o meri i yusim kambang long kaikai wantaim buai.

Long planti yia nau, ol lokal gavman i wok long traim yet long stapim dispela kain pasin bilong kaikai buai long ol taun bilong ol. Na long planti gavman opis nau, i gat bikpela tambu bilong kaikai buai. Bikos retpela kala bilong buai wantaim kambang i save bagarapim tru planti haus na opis na gutpela gras na flawa nabaut.

## Spak Brus

Bikpela lo tru i kamapim spak brus o marijuana long olge

ta kantri insait long Pasifik rujan. I gat bikpela tambu we i winim tru bia, buai na sigaret.

Ol helt woka i tok olsem spak brus bai bagarapim tingting na skin bilong man. Em i save bagarapim olgeta kru bilong man olsem bai em i no inap tingting gut. Na long planti taim bihain long em i kisim spak brus, em i no inap tingim gen wanem samting em i bin toktok pastaim.

I gat planti as bilong ol yangpela long kisim dispela smok. Tasol wanpela bikpela samting em bilong ol long amamas na lusim tingting long olgeta arapela hevi samting.

Long biktaun bilong Papua Niugini long Mosbi, ol dokta i wok long pret nau bikos bikpela lain spak brus tru i stap nating bilong ol pipel long yusim. Na dispela i winim tru mak bilong kensa em sigaret nating i save kamapim. Na sapos dispela pasin i no pinis hariap.



• Ol plisman na CID opisa bilong Goroka i soim beg spak brus em ol i kisim long ol viles pipel. Ol plisman i wok strong nau bilong banisim bisnis bilong salim na baim spak brus long Papua Niugini.

# Gavman i no bagarapim graun Ol pipel i no bus kanaka moa

**Dia Edita,**  
 Mi laik bekim pas bilong wanpela brata em i bin kamap long Wantok Niuspepa long 18 Epril, 1991. Pas i tok Gavman i bagarapim bus na samting i stap long en.  
 Brata mi laik tok olsem Papua Niugini i no stap olsem bipo long tim bilong tumbuna. Papua Niugini i lusim pinis dispela pasin, na i laik i o insait long nupela senis.  
 Kantri bilong mipela Papua Niugini, kisim Independens long 1975. Long dispela taim PNG i laik soim olsem em i ken lukautim em yet long wok na bringim em yet i kam antap.  
 Olsem na PNG i mas strong long kam antap na bihainim ol nupela senis i wok long kamap insait long ol tude.

Nau yet kantri bilong mipela i gat ol minerel insait long graun. Ol samting bilong mekim mani i stap antap long graun na long solwara tu.  
 Olsem na gavman bilong mipela i mas traim long yusim ol long mekim mani bilong ranim na lukautim kantri i go laip. Yumi i no inap long go bek long pasin bilong ol tumbuna bilong yumi long bipo.  
 Nau yet em i nupela taim, na yumi mas yusim ol samting yumi gat long developim kantri bilong yumi. Olsem na maski long kros na stapim ol wok developmen insait long kantri.  
 Em tasol na husat i laik bekim em laik tasol.

**Kaupa Egen na Lapun Tun Karkar Alain MADANG**

**Dia Edita,**

Mi wanpela yangpela komiti lida long ples.  
 Hatwok bilong kamapim wanpela lida i no isi wok. Em i bikpela hatwok sapos yu glasim gut. Mipela ol pipel i mas glasim pastaim, na bihain makim wanpela gutpela lida.  
 Na tu ol lida mipela i makim i mas man tru bilong ples. Man we mipela i bilip bai i stap wok wantaim mipela.  
 Mipela i no lukluk tasol long ol lida husat i gat save olsem bilong yunivesiti o arapela bikpela skol. Nogat.  
 Mipela i lukim tu sapos lida ya i ken mekim gutpela wok politik long bringim developmen i kam long ples.  
 Tasol long lukluk bilong mipela ol pipel long ples,

mipela i no amamas long kain politik bilong ol save em i kamap nau long kantri. Dispela em long tingting long poket mani bilong ol yet. Na kalap nabaut long tupela sait bilong palamen.  
 Mi laik tok klia olsem kantri i kisim independens long longpela taim pinis. Olsem na mipela ol pipel i no bus kanaka moa. Wantaim helpim bilong ol niuspepa na radio, mipela i save long wanem samting ol lida bilong mipela i mekim, o i no mekim.  
 Olsem na mipela bai tingting long makim em gen, o makim nupela lida.  
 Olsem na mi laik tokim yupela ol memba nau olsem planti bilong yupela i mas tingting gut.

**R. Ebo FINSAFEN-MORobe**

## Ol Boana pipel i gat singsing bilong ol

**Dia Edita,**  
 Mi wanpela manki Wain long Boana eria long Morobe provins. Mi laik bekim pas bilong Sista ya i eduks Baroang i bin kamap long Wantok Niuspepa No 852.  
 Sista ya i tok ol Wain save stilim singsing Munge bilong ol Finsafen. Sista ating yu toktok long rong man bikos mi wanpela manki bilong dispela eria, na mi no save singsing dispela rabis Munge bilong yupela ya.  
 Yu mas toktok long ol Kabwum bikos ol i stap long boda. Na dispela singsing bilong yupela ting ol i bihainim. Ating yu wanpela longlong

meri. Yu mas askim gut ol arapela man bipo yu toktok na maski long opim maus nating.  
 Sista mi sot long pepa na sapos yu gat tupela bikpela pepa i stap orait salim i kam long mi na bai mi raitim nem bilong singsing mipela. Yu mas rait long Wantok Niuspepa na askim ol long givim wanpela spes bilong mi yet bikos bai mi raitim olgeta singsing mipela i gat na yu ken lukim.  
 Nau mi ken givim yu tupela tasol. Wanpela em SINGSING PAIT, na narapela em SINGSING SOMBOLE.

**Gilling Yawing. MORobe**

## Ol kimbe plisman mas yusim plis dok

**Dia Edita,**  
 Mi laik autim wari bilong mi long pasin bilong ol plisman long Kimbe taun.  
 Planti taim ol pasin raskol i save kamap, tasol ol plisman i no save hariap long holim ol. Planti raskol i save stil pinis na ranawe.  
 Mi save olsem i gat tupela plis dok i stap long Kimbe. Tasol tupela i no

save mekim wok bilong tupela.  
 Mi laik askim ol plisman long Kimbe long yusim tupela plis dok ya, bai ol manmeri i ken lukim stret. Na bilip long wok bilong lo na oda long provins.  
 Em tasol, na husat i laik bekim em laik tasol.

**Thomas Loi KIMBE**

## Ol meri ken putim trausis

**Dia Edita,**  
 Mi wanpela manki Sepik tasol nau mi stap raun long Lae sit. Mi gat liklik bel hevi long ol manmeri husat i save rait tumas long niuspepa na toktok planti long ol meri i save putim tait trausis.  
 Panti taim mi lukim kain pas olsem na mi les pinis long lukim gen. Traim na stap isi liklik, bikos em i no bisnis bilong yupela. Lusim ol kain meri olsem mekim long laik bilong ol. Na wanem samting kamap long ol em wari bilong ol.  
 Mi sapotim ol meri long putim trausis. Tasol wanpela liklik toksave tasol long yupela. Baim bikpela trausis bikos em bai i karamapim skin bilong yupela gut. Dispela bai i stapim ol man long mekim pasin nogut long yupela.  
 Planti taim ol meri i save putim tait trausis na sampela hap bilong bodi i save kamap klia. Na dispela i bagarapim sindaun bilong ol man, na ol i kamapim kain pasin olsem.

**Stevie Deedee LAE**

## Kisim moa soldia

**Dia Edita,**  
 Mi wanpela manki Sinasina long Simbu, tasol nau mi stap long Lae, Morobe provins. Mi laik bekim pas bilong brata Laitak Enenge. Pas bilong em i bin kamap long Wantok Niuspepa bilong 14 Epril, 1991.  
 Em i tok olsem gavman i mas kisim moa yangpela man long joinim ami. Mi sapotim tru toktok bilong brata ya.

long mipela olsem Indonesia i gat planti soldia tru.

Olsem na gavman i mas lukluk hariap long dispela. Dispela bai i wanpela gutpela we bilong daunim raskol pasin insait long kantri.  
 Bikos planti yangpela man i save stap nating. Na tingting long mekim raskol pasin.

**Simon Drekore LAE**

**Dickson Mamafi BULOLO**

## Ol meri noken bikhet

**Dia Edita,**  
 Mi wanpela manki bilong Is Sepk provins. Mi stap long Morobe provins. Na mi save skol long Wau Vokesinel Senta.  
 Mi laik sapotim pas bilong brata Peter Kuni. Em i tok ol meri i mas putim stret ol klos laplap bilong ol. Na maski long putim bilong ol man olsem longpela na sotpela trausis.

Mi save lukim ol meri husat i save putim trausis na save les stret.  
 Ol dipela kain meri i save hambak tumas. Taim ol i marit, dispela hambak pasin bai i stap yet.  
 Long dispela kain pasin na planti marit i save bruk.  
 Yupela ol manmeri husat i skelim gut dispela bai i save.  
 Olsem na mi laik askim nau ol meri long mekim stretpela tingting. Na putim stret klos laplap bilong yupela ol meri.

**Thomas Kwialumen WAU-MORobe**

## Madang gavman i mas stretim ol rot

Mi laik autim onipen bilong mi go long Madang provinsal gavman long stretim ol rot i go insait long taun.  
 Planti taim mipela i an long ka na bas, na at i save gat planti hul long en. Olsem na ol asindia i save kalap alap insait long bas ligeta taim.  
 Sapos provinsal gavman i luksave long dispela orait, pusim ol daun kaunsil o kontraktup o no gat Works and Supply long stretim

**Samuel Tonoly MADANG**



## Ol bikman yet asua Pasin pamuk i bikpela

**Dia Edita,**  
 Nau yet gavman i toktok long daunim hevi bilong o na oda long dispela kantri. Hevi bilong lo na oda bai i no inap pinis long dispela kantri sapos sampela bikman long gavman i go pas long kamapim hevi insait long ol yet.  
 Planti politisien i kamapim pasin bilong raskol insait long gavman. Na nau ol i toktok long stapim o na oda hevi. Yupela ol politisien, harim gut, olsem lo na oda hevi bai i no inap pinis long dispela kantri.  
 Bikpela as i stap olsem yupela yet i save tokaut long olgeta bikpela operesen ol plisman na ami i laik putim kamap. Na dispela i givim taim long ol raskol long ranawe i go hait, bipo ol plisman na ami i kamap.

**Dia Edita,**  
 Long bipo Madang i no gat kain samting olsem, na ol i save kolim naispela Madang taun. Tasol nau i no gat dispela nem moa. Bikos ol pamuk meri i bagarapim ples pinis.  
 Olgeta manmeri long Madang i laik raun long mekim pasin pamuk tasol. Bikos ol pamuk meri i kamap planti long Madang.  
 Mi laik askim gavman bilong Madang long stapim dispela, na kamapim gutpela nem bilong Madang gen.  
 Em tasol na husat i laik bekim em laik tasol.

**Daerus Bonny MADANG**

## Ol referi bagarapim pilai

**Dia Edita,**  
 Mi save pilai long Verave soka klap. Taim mipela i save go sanap long pilai graun, referi i save holim mipela i stap tu o tripela minit nating na wetim lainsmen long kamap.  
 Narapela samting tu em planti taim ol lainsmen i save tromoi flek nating nating long ol samting mipela ol pilaia i mekim. Ol i save apim flek klostu klostu na mipela ol pilaia i

save paul tru. Bikos ol lainsmen na referi i laikim mipela i pilaim wanem kain stail stret?

Dispela em wanpela sik mi lukim long Mosbi Soka Asosiesen long olgeta wiken.

Olsem na mi ting PMSA i mas lukluk long dispela samting na kamapim sampela senis long en.

**Jimmy Malka Liba MOSBI**

Taim ol i kamap, ol i stat long paitim ol gutpela man na mekim hevi i go bikpela moa yet.  
 Sampela taim ol i hangre na yusim gan o wanem samting bilong pait long ol gutpela man. Dispela em i wanpela bikpela samting gavman i no luksave long en.  
 Plis ol bikman, traim na mekim gut wok na maski long giaman nabaut na kisim mani nating.  
 Em tasol liklik bel hevi bilong mi

**Kalaligini Helaligiri WEWAK**



# MI L O V I M

*Isuzu bas bilong mi!*

- PUTIM OL WINSKRIN K295.00
- PUTIM OL BREKSU K147.50
- PUTIM KLATS PLET, BERING, NA PRESA PLET K351.50
- WIL BERING, OL SIL NA WIL K420.00
- PUTIM OL KING PIN K216.50
- FUL SEVIS NA SEKAP LONG WEL NA FILTA K128.50
- TOK SAVE LONG KOS BILONG WOK, OL PATS NA OL NARAPELA SAMTING FREE

OL PRAIS I KARAMAPIM KOS BILONG WOK, OL PATS NA OL NARAPELA SAMTING.

**Hariap! Ofa bai stap inap mun Julai tasol**

*Lusim mipela PMV bilong yu!*



**NEW GUINEA MOTORS**

## Musik bilong liklik brata pulim meri bilong bikpela

LONG bipo tru long wanpela ples long hap bilong Melkoi insait long Pomio eria long Is Nu Briten provins, i gat tupela brata i stap. Papamarna bilong tupela i dai pinis na liklik brata i stap wantaim bikpela brata bilong em bikos bikpela i marit.

Oi i save stap gut tru olgeta de na wok wantaim long painim kaikai, wokim haus, singsing, gaden na ol samt-ing olsem.

Long wanpela apinun, yangpela brata i go sindaun ausait long haus long wanpela kona na i wok long mekim musik long mambu. Em i putim hap mambu long maus na winim. Oi finga bilong em i wok long pasim ol hul long mambu na mekim kain kain gutpela musik stret.

I no longtaim na meri bilong bikpela brata bilong em i kam sanap long arere na i wok long harim musik bilong yangpela tambu man bilong em i stap. Tasol long sait bilong haus tu, man bilong em i sindaun na i wok long harim musik bilong yangpela brata bilong em na i lukim pinis pasin meri bilong em i mekim.

Bikpela brata i kros nau long yangpela brata bilong em bikos meri i wok long aigris long liklik bilong em. Olsem na bikpela brata i bungim olgeta belhat i stap.

Wanpela taim bikpela san i kamap na ples i drai olgeta. Oi wara tu i drai na planti manmeri i go long wara bilong painim ol kindam, pis, malio na ol arapela abus bilong wara. Tupela brata tu i go daun long wara na mekimsave long wanpela hap bilong wara i stap. Tupela brata i digim wanpela bikpela hul tru na ol wara i go daun long en. Tupela i mekim olsem bai wara i drai olgeta long daunbilo na tupela i ken kisim ol abus bilong wara isi tasol.

Tupela i digim hul i go daun stret na bikpela brata i askim liklik brata long go daun long dispela hul na stretim rot bilong wara i ron go daunbilo. Liklik brata i yusim rop na wel i go daun na bikpela



brata i sanap antap na holim pas rop taim brata bilong em i wok long wel i go daun. Liklik brata i stretim maus bilong wara pinis long hul ya na i laik kam antap. Em i hangamap long rop i kam antap liklik na bikpela brata i lusim han long rop na liklik brata bilong em i pundaun i go daun bek long hul na i hap indai.

Bikpela brata i go long ples long apinun na tokim ol manmeri long dispela birua liklik bilong em i kisim long wara. Olgeta manmeri i sori na kra i nogut tru bikos yangpela manki ya em wanpela gutpela manki tru na i save toktok na mekim gutpela pasin long planti manmeri.

Insait long bikpela hul, yangpela brata i slip i go na em kirap na painim ples long kam antap tasol i no gat rot bilong go. Olsem na em i wok long bihainim rot bilong wara insait long dispela hul tasol i go.

Em i bihainim wara i go i go inap em i kamap long maus bilong hul we lait bilong san i sut i kam long en.

Em i kam ausait na i painim planti pikinini diwai na kaikai. Man ya i bagarap tru long hangre bikos em i no kaikai taim em i wok long bihainim rot bilong wara insait long hul ya.

Em i kisim ol kaikai pinis na i wokabaut i go. I no longtaim na em i kamap long wanpela

wara na lukim tupela yangpela meri i wok long redim kaikai bilong pik. Man ya kisim wanpela ston na tromoi long tupela meri ya. Tupela i lukim man ya na i laik ranawe tasol em i kolim tupela i kam bek. Em i tokim tupela meri ya olsem em i man tru na i no tewel. Em i askim tupela long kaikai na tupela i givim em. Em i stori long wanem samt-ing i bin kamap long em wantaim brata bilong em. Tupela meri ya i harim na sori nogut tru long yangpela man ya. Tupela i kisim em na ol i go long ples bilong tupela na ol tripela i stap wantaim. Oi bikman na meri long ples ya i orait na man ya i maritim tupela meri wantaim.

Wanpela taim tok save i raun long olgeta ples olsem bikpela brata bilong man ya i laik wokim bikpela kaikai bilong lusim olgeta manmeri long ples husat i bung long soim wari bilong ol long dai bilong yangpela man ya. Bikpela brata i askim olgeta manmeri long arapela ples tu i mas kam wantaim sampela kaikai na bung na rausim dispela taim bilong sori.

Yangpela man ya i harim pinis na em redim spia na bunara bilong em na i go long ples bilong bikpela brata. Em i lukim olgeta manmeri i bung gut tru long wokim kaikai.

Man nogut ya i go tasol na planim spia long bros bilong bikpela brata bilong em long ai bilong olgeta manmeri stret. Olgeta manmeri i kirap nogut tru na i no mekim wanpela samt-ing.

Bikpela brata i dai na ol manmeri i mekim bikpela kaikai bilong tingim sori na kra i long em i stap. Liklik brata i kirap tasol na tanim i go bek long tupela meri bilong em na ol stap gut tru.

Long gaden bilong ol, ol i save planim kukumba na dispela kukumba i wok long kamap bikpela na planti long hap bilong Mamusi long Pomio eria, Is Nu Briten provins.

Benedict Lot Oliver  
Kimbe, W.N.B.P.



WANPELA lapun man i kisim balus na i laik go long Mosbi. Insait long balus em i sindaun klostu wantaim wanpela yanpela manki. Taim balus i go antap na meri hostes i karim ol ti na kopi i kam long ol pasindia long dring. Meri i askim lapun, "Yu laikim wait kopi o blek kopi? Yanpela manki i harim olsem na em i lap nogut tru long em. Lapun i lukim yanpela i lap na tok," Yu ting mi longlong bilong yu a?" Lapun i kirap na tokim meri hostes, "Mi laikim grin."

Michael Waimba  
Lae.

WANPELA taim ol yanpela manki i stori i stap na i no long taim wanpela lapun i kam. Em i kirap na askim mipela, "Yupela i laikim sampela stori mi lukim long piksa?" Na mipela i tok yet. Em i kirap nau i tok, "Atus loket, kandre mi save lukim wanpela man his nem Bruce Lee. Em i save pait long leklek na han." Man mipela lap nogut tru

Rose Komgoi  
Rabaul

WANPELA apinun manki Tari i wokabaut wantaim wanpela hal skul meri i go long haus long Kavieng. Manki Tari i no save klap long bual o kokonas. Tupela i go klostu long ples na manki Tari i askim meri Kavieng long kalap long bual.

Taim em i klap, manki Tari i sanap na lukluk i stap. Meri i kamap klostu long kisim buai na Tari i tokim em long kam daun. Meri i go long haus na mama bilong em i askim em. Yu mekim wanem na yu kam apinun tru long haus.

Em i tok wanpela manki Tari i tokim mi long klap long bual. Taim mi kamap klostu pinis long kisim buai em i tok, maski yu kam duan. Mama bilong em i harim na tokim em, pikinini man ya i laik lukim kala bilong liklik trausis bilong yu.

Pikinini meri i kirap na tokim mama bilong gutpela na mi no putim. Mama i lukluk long pikinini na i lap na tok, BILONG AI TASOL, samt-ing tru bai nogat.

David H. Tege.  
MENDI

## Kot namel long Ombudsmen Komisin na Invesmen Kopresen i stap yet

### SAM VULUM i raitim

KOT namel long Ombudsmen Komisin na PNG Invesmen Kopresen (PNGIC) i no kamap yet bikos ol loya bilong kopresen i no givim kot pepa bilong ol long Surpim Kot.

Suprim Kot i mas tokaut long tingting bilong en long 17 Me, tasol nau i no gat. Kot i bin sindaun liklik taim tasol na bihain i skruim taim i go long narapela taim.

Olpele menesing dairekta bilong PNGIC, Eliakim ToBolton i kotim komisin bihian long komisin i laik sekap long wok bilong em. Kot pepa bilong ToBolton i tok Komisin i no gat pawa long sekap long wok bilong em.

Loya bilong Komisin, David Cuning i tok i no gat wanpela samt-ing i kamap yet. Kopresen i mas bekim kot pepa em Komisin i bin givim pinis long Suprim Kot.

Cuning i tok em i laik redim gen

narapela kot pepa long bekim liklik toktok em loya bilong PNGIC i mekim long 17 Me. Tasol kot i tok i gat inap ol stori we kot yet i ken skelim na mekim tingting bilong en.

Kot bai painim aut sapos Komisin i gat pawa long sekap long wok bilong ToBolton o nogat.

Long wankain taim tu, Minista bilong Fainens na Plening, Paul Pora nau i rausim ToBolton olsem menesing dairekta bilong Nesenel Providen Fan (NPF).

Pora i bin rausim ToBolton olsem menesing Dairekta bilong PNGIC bihain long sampela paul wok i kamap na olsem nupela menesing dairekta bilong NPF.

Em i kisim ples bilong John Noel em Pora i rausim em long las ya. Wanpela kampani bilong Australia, McIntosh Assets Management i tekova long lukautim NPF. Pora i putim ToBolton long wok aninit long dispela kampani long stretim NPF.

## Edukesen dipatmen tromoi moa mani

BIKPELA mani tru bilong Edukesen Dipatmen long 1991 baset i bin go long ol provins.

Dispela mani em Dipatmen i givim aninit long edukesen program bilong wan wan provins. Antap long dispela, i gat samt-ing olsem K20 milen em Dipatmen i yusim long edukesen long Nesenel Kapitel Distrik (NCD) tasol.

Long wankain taim tu mani Dipatmen i makim long yusim long dispela ya i bin go antap long 11 pesen moa long mani em i yusim long 1990. Dipatmen i yusim moa long K50 milien.

Dipatmen i yusim samt-ing olsem K4.4 milien long stretim ol hai skul na ol nesonel

hai skul long kantri. Dispela mani em dipatmen i yusim aninit long publik invesmen program.

Edukesen minista, Utula Samana i tok bikpela hap bilong 1991

## Wokman i tok Kolonel Nuia i paitim em

i kam long pes 3

tasol. Olsem na Simon i go bek na Simiha wanpela i go insait long opis. Taim em i go insait, em i lukim Kol. Nuia i stap insait wantaim wanpela plisman na narapela soldia.

"Mi go insait na tok moning tasol em i no bekim. Mi no save wanem samt-ing bai i kamap long mi. Na bihain nau ol i pasim

baset em ol i yusim long stretim ol liklik wok long kamapim gutpela edukesen bilong olgeta manmeri.

Samana i tok ol i yusim moa long K7.8 milien long ol komyuniti

dua na tingting i kisim mi pinis olsem wanpela samt-ing bai i kamap long mi.

"Kol. Nuia i askim mi sapos mi tasol i mekim ol dispela toktok long redio Not Solomons, na askim ol lokel pipel long noken wok bung wantaim ol sekyuriti fos.

"Mi tok yes na taim mi laik tok klia long

skul. Dispela i karamapim tu K2.2 milien em ol i yusim long kisim 294 nupela tisa. Na narapela K174,000 em ol i yusim long wokim ol liklik projek long ol komyuniti skul.

wanem as na mi mekim dispela toktok, Kol. Nuia i paitim mi long pes bilong mi stret. Ai glas bilong mi i pundaun na taim mi laik kisim em i kikim i go lonawe.

"Bihain em i stat long paitim na kikim mi long ami su bilong em. Em i sutim tok long mi long planti samt-ing."





# Pacific Gold MUSIC

NAMBAWAN 24 TRACK REKODING STUDIO INSAIT LONG PACIFIC

## Uwai i kam bilong kirapim das long Moitaka So Graun

### YAKAM KELO i raitim

TENO UWAI i kam bek gen long Mosbi bilong katim namba tu kaset bilong em.

Teno em wanpela musik man bilong Hailans yet long hap bilong Kainantu long Isten Hailans provins. Taitel bilong namba wan kaset bilong Teno em Lait Uwai.

Kaset Lait Uwai i bin stap long planti stua long las yia. Long Isten Hailans provins yet, ol manmeri i pinisim tru kaset long ol stua long Goroka.

Teno yet i bin wanpela man bilong laikim tru musik taim em yangpela manki na i save stap long ples. Taim em i stap insait long 12 na 15 krismas, em i no bin skul gut bikos em i save ronawe i go long haus na mekim save long pilai gita i stap.


Long 1970, Teno i joinim wanpela letrik ben grup ol i kolim long Dark Roamers bilong Goroka. Dispela em wanpela namba wan ben

insait long Isten Hailans provins. Ol i pilai gut i go inap planti memba bilong ben i bruk lusim ben bikos ol i marit nabaut.

Long yia 1980, Teno i no laik stap olsem na em i go het na pilai wantaim narapela lektrik ben grup gen ol i kolim Break Down Company. Break Down Company i go het long pilai na i save raun long planti hap bilong Hailans rijon.

Long dispela taim, planti manmeri i luksave long Teno olsem wanpela musik man na ol i save sapatim em olgeta taim em i go pilai. Insait long Isten Hailans provins yet, em i save go pilai long planti liklik ples. Planti manmeri i askim em long katim kaset bilong em wantaim ol studio nau i stap long Papua Niugini.

Teno i redim demo bilong em na salim i go long wanpela studio husat i no orait long em. Olsem na em i lusim na salim i kam long CHM long Mosbi. CHM i



Teno Uwai i redi long namba tu kaset bilong em. Em bai pilai long Mosbi So.

orait long em na em i kam long las yia na katim namba wan kaset bilong em. Lait Uwai.

Ol kaset bilong Teno bai Hot Rock stail bilong Hailans stret. Planti singsing bilong em bai kamap long tok ples Hailans yet na sampela long tok ples Morobe na long Tok Pisin.

Teno i tok em i man bilong laikim long helpim ol arapela long pilai musik bikos em i laik helpim long kirapim musik insait long kantri. Teno i tok em i amamas long lukim planti ol wan pilai bilong

em long katim kaset bilong ol yet. Wanpela bilong ol eks memba bilong em yet em Diyos.

Wanpela ben memba bilong Teno tu em Logen Olapi bilong Morobe provins. Em i save pilai bes gita long Break Down Company.

Teno yet i save holim lid gita. Nau Logen i katim pinis wanpela kaset bilong em wantaim CHM na bai i kam ausait liklik taim long mun Julai tasol. Nem bilong kaset bilong Logen em Kunai 55.


Logen i pinisim kaset bilong em na i laik helpim pilai lid gita bilong Teno wantaim namba tu kaset bilong em. Ol song bilong Logen i stap long tok ples M a k h a m, Madang, Kainantu, Tok Pisin na sampela hap

bilong Morobe Teno Uwai bai pilai wantaim Dee Jays long Jun So bilong Mosbi.

Sapos yu laik harim o lukim em, yu ken tromoi lek tasol i go long Moitaka So Graun na lukim dispela boi Kainantu i

autim sampela stua bilong em.

Nau em olgeta ben memba bilong Break Down Company i bung wantaim na i laik katim ol kaset bilong ol olsem na lukaut long ol bikos ol i no bruk daun yet.



Logen Olapi i pinisim namba wan kaset bilong em na i redi long helpim Uwai.

THURSDAY 30TH MAY, 1991

6.00 TEST PATTERN AND MUSIC  
6.27 STATION OPEN  
6.30 ITN WORLD NEWS  
7.00 TODAY SHOW (G)  
9.00 STATION CLOSE  
3.27 STATION RE-OPEN  
3.30 KIDS KONA FAT CAT  
4.00 THUNDER THE BARBARIAN (G)  
4.30 TEENAGE MUTANT NINJA TURTLES (G)  
5.00 THE FLINTSTONES  
5.27 EMTV TOKSAVE  
5.29 NATIONAL EMTV NEWS BREAK  
5.30 HOME AND AWAY  
6.00 NATIONAL EMTV NEWS  
6.30 A CURRENT AFFAIR  
7.00 NEIGHBOURS (G)  
7.25 EMTV NEWS UPDATE (G)  
7.30 HEY DAD (G)  
8.22 EMTV TOKSAVE  
8.25 EMTV NEWS UPDATE  
8.30 21-JUMP STREET (PGR)  
9.24 EMTV NEWS UPDATE  
9.29 EMTV NEWS MAGAZINE  
9.30 SPORTS ACTION  
10.30 CHARLIE'S ANGELS: "Angels In Wings" (PGR)  
11.30 EMTV NEWS (REPLAY)  
11.57 MEDITATION WITH PASTOR WALO ARNI  
12.00 STATION CLOSE

FRIDAY 31ST MAY, 1991

6.00 TEST PATTERN AND MUSIC (G)  
6.27 STATION OPEN  
6.30 ITN WORLD NEWS (G)  
7.00 TODAYS SHOW  
9.00 STATION CLOSE (G)  
2.12 STATION RE-OPEN  
2.15 MIDDAY WITH RAY MARTIN (PGR)  
3.30 FAT CAT (G)  
4.00 THUNDER THE BARBARIAN (G)  
4.30 TEENAGE MUTANT NINJA TURTLES "The Incredible Shrinking Turtles" (G)  
5.00 THE FLINTSTONES (G)  
5.27 EMTV TOKSAVE  
5.29 NATIONAL EMTV NEWS BREAK (G)  
5.30 HOME AND AWAY (G)  
6.00 NATIONAL EMTV NEWS  
6.30 A CURRENT AFFAIR  
7.00 NEIGHBOURS (G)  
7.25 EMTV NEWS UPDATE  
7.30 FAMILY TIES "A My name is Alex" Part 1 (G)  
8.00 AUSTRALIA'S FUNNIEST HOME VIDEO SHOW  
8.26 EMTV TOK SAVE (G)  
8.29 EMTV NEWS UPDATE (G)  
8.30 SPORTS SPECIAL "Rugby League"  
10.24 NATIONAL EMTV NEWS UPDATE

SATURDAY 1ST JUNE, 1991

8.00 TEST PATTERN AND MUSIC  
11.57 MEDITATION  
12.00 STATION CLOSE  
SATURDAY 1ST JUNE, 1991  
8.00 TEST PATTERN AND MUSIC  
12.57 STATION OPEN  
1.00 WIDE WORLD OF SPORTS (G)  
5.00 SPECIAL: "Wreck Diving in Rabaul"  
5.27 EMTV TOKSAVE (G)  
5.29 NATIONAL EMTV NEWS  
5.30 GILLETTE (G)  
6.00 NATIONAL EMTV NEWS  
6.30 HEY HEY IT'S SATURDAY  
8.22 EMTV TOKSAVE  
8.25 EMTV NEWS  
8.30 HAWAII 5-0: "The ways of Love" (PGR)  
9.29 EMTV NEWS MAGAZINE  
9.30 SATURDAY NIGHT MOVIE: "Station Six Sahara"

SUNDAY 2ND JUNE, 1991

8.00 TEST PATTERN AND MUSIC  
10.55 STATION OPEN  
11.00 WIDE WORLD OF SPORT  
1.00 BUSINESS SUNDAY  
2.00 SUNDAY (G)  
4.00 SPORTS SUNDAY  
6.00 NATIONAL EMTV NEWS  
6.23 THE ROAD TO THE 1991 SOUTH PACIFIC GAMES  
6.30 SPORTS ACTION "Rugby League"  
7.55 CHIT CHAT WITH SIR PAULIAS MATANE  
8.00 60 MINUTES  
8.52 EMTV TOK SAVE (G)  
8.55 NATIONAL EMTV NEWS UPDATE  
9.00 SUNDAY NIGHT MOVIE "Red Badge of Courage" (PGR)  
10.30 EMTV NEWS REPLAY  
10.57 MEDITATION  
11.00 STATION CLOSE  
MONDAY 3RD JUNE, 1991  
6.00 TEST PATTERN AND MUSIC

TUESDAY 4TH JUNE, 1991

6.00 TEST PATTERN AND MUSIC  
6.27 STATION OPEN  
6.30 TIN WORLD NEWS  
7.00 TODAY SHOW  
9.00 STATION CLOSE  
1.42 STATION RE-OPEN  
1.45 MIDDAY WITH RAY MARTIN (PGR)  
3.00 KIDS KONA (G)  
4.00 THUNDER THE BARBARIAN (G)  
4.30 TEENAGE MUTANT NINJA TURTLES "The Mean Machines" (G)  
5.00 THE FLINTSTONES "Fred's Flying Lesson" (G)  
5.27 EMTV TOKSAVE  
5.29 EMTV NEWS BREAK  
5.30 HOME AND AWAY (G)  
6.00 NATIONAL EMTV NEWS  
6.30 A CURRENT AFFAIR (G)  
7.00 NEIGHBOURS (G)  
7.25 EMTV NEWS UPDATE  
7.30 THE GREAT MOROBEEN TV GIVE AWAY GAME  
8.00 THE YOUNG DOCTORS (G)  
8.52 EMTV TOKSAVE  
8.55 NATIONAL EMTV NEWS  
9.00 FLYING DOCTORS (PGR)  
9.54 EMTV NEWS UPDATE  
9.59 EMTV NEWS MAGAZINE  
10.00 SPORTS ACTION "Australian Football League"

WEDNESDAY 5TH JUNE, 1991

6.00 TEST PATTERN AND MUSIC  
6.27 STATION OPEN  
6.30 ITN WORLD NEWS (G)  
7.00 TODAY SHOW  
9.00 STATION CLOSE  
1.42 STATION RE-OPEN  
1.45 MIDDAY WITH RAY MARTIN (PGR)  
3.00 KIDS KONA SESAME STREET (G)  
4.00 THUNDER THE BARBARIAN (G)  
4.30 TEENAGE MUTANT NINJA TURTLES "Curse of the Evil Eye" (G)  
5.00 THE FLINTSTONES "Fred's Second Car" (G)  
5.30 HOME AND AWAY (G)  
6.00 NATIONAL EMTV NEWS  
6.30 A CURRENT AFFAIR (G)  
7.00 NEIGHBOURS (G)  
7.25 EMTV NEWS UPDATE  
7.30 THE YOUNG DOCTORS (G)  
8.25 PNG WINFIELD LEAGUE 1991  
8.35 THE EQUALIZER (PGR) "Memoirs of Manon Part 1"  
9.29 EMTV NEWS UPDATE  
9.34 EMTV NEWS MAGAZINE  
9.35 BEYOND 2000 (PGR)  
10.34 EMTV NEWS MAGAZINE

THURSDAY 6TH JUNE, 1991

10.35 CHARLIE'S ANGELS: "Magic Fire" (PGR)  
11.35 EMTV NEWS (REPLAY)  
12.02 MEDITATION WITH PASTOR WALO ARNI  
12.05 STATION CLOSE  
WEDNESDAY 5TH JUNE, 1991  
6.00 TEST PATTERN AND MUSIC  
6.27 STATION OPEN  
6.30 ITN WORLD NEWS  
7.00 TODAY SHOW  
9.00 STATION CLOSE  
1.42 STATION RE-OPEN  
1.45 MIDDAY WITH RAY MARTIN (G)  
3.00 SESAME STREET (G)  
4.00 THUNDER THE BARBARIAN (G)  
4.30 TEENAGE MUTANT NINJA TURTLES: "Enter the Fly" (G)  
5.00 THE FLINTSTONES "The Rolls Rock Capor" (G)  
5.30 HOME AND AWAY (G)  
6.00 NATIONAL EMTV NEWS  
6.30 A CURRENT AFFAIR (G)  
7.00 NEIGHBOURS (G)  
7.25 EMTV NEWS UPDATE  
7.30 MEKIM MUSIK (G)  
8.27 SOCCER ROUND-UP (G)  
8.30 WEDNESDAY NIGHT MOVIE "Victory At Sea" (G)  
10.30 CHARLIE'S ANGELS: "Sammy Davis Jr Kidnap Capor" (G)  
11.30 EMTV NEWS (Replay)  
11.57 MEDITATION WITH PASTOR WALO ARNI  
12.00 STATION CLOSE

## EMTV

G - General Exhibition Required PGR - Parental Guidance Required AO - Adults Only

**WANTOK**

NIUSPEPA BILONG OL PAPUA NIUGINI STRET

**PABLIK NOTIS**

Sapos yu laik advertais, telepon 25 2500 na askim long

MIRI AIORI long Ext 203  
JOHNATHAN BONEPE long Ext 215  
KOSINTO FOSAGU long Ext 216


# OL NUPELA MAK BILONG OL ILEKTORET

Mi laik toksave save long pablik olsem aninit long Seksen 36 bilong Ognanik Lo long Nesenel Eleksens, mipela i wokim pinis ol mep i soim ol dispela ol nupela mak bilong ol ilektoret. Sapos yu laik lukim, yu ken kisim fri long hetkwata bilong Elektorel Komisn long ol Provinsal o Kistrik Ilektorel Opis insait long olgeta hap bilong kantri. Sapos yu gat sampela toktok ol senis long mep, yu ken rait long:

The Chairman,  
Electoral Boundaries Commission,  
C/- Electoral Commission,  
P.O. Box 5348, BOROKO  
National Capital District.

Komisn bai lukluk tasol long ol pas em Komisn i kisim stret long Jun 25 o b po long Jun 25, 1991.

REUBEN TUAKANA KAIULO  
Chairman Electoral Boundaries Commission



POT MOSBI SO SOSAITI

KAM NA LUKIM BIKPELA SO LONG  
TAUN!!!

1991 POT MOSBI  
YUNITI SO  
JUN 8, 9, 10. LONG  
MOITAKA SOGRAUN

Namba wan taim nau bilonglukim ol man i apim  
ain, boksen na ol kung fu pilai nabaut.  
Mosbi atletiks asosiesen bai soim olsem ol kain  
kain pilai olsem tromoi discus, ol bal we i hevi tru,  
tormoi spia, resis bilong wokabaut, ol longpela  
resis na planti moa.  
Amritieta bai pairap wantaim kain kain musik  
bilong ol lektrik na stringben.  
Ol kain kain singsing grup bilong olgeta hap  
bilong kantir.

Olsem sospen, bilum, piksa em ol pikinini i droim  
olgeta bai stap long haus bilong ol at na krav.  
Nupela kalsarel viles intanesenel haus kaikai  
bilong olgeta hap haus bilong ol narapela kalsa.  
Nupela kain samting bilong ol pikinini long ol pilai  
graun.

Ol dau bai op: 8 klok moning  
Ol bikpela manmeri: K3  
Ol liklik manki: 50 toea.

Kamap na lukim dispela namba wan so.

POT MOSBI SO SOSAITI



1991 POT MOSBI YUNITI SO MEMBA

OL MEMBA I MAS SAVE OLSEM OLGETA FI BILONG STAP YET I MAS  
KAMAP LONG MIPELA PASTAIM LONG 31 Me, 1991.

OLPELA MEMBA FI - K10 BIKPELA MANMERI, K5 WAN WAN PIKININI  
NUPELA MEMBA FI - K14 BIKPELA MANMERI, K8 WAN WAN PIKININI

Olgeta askim na mani bilong fi i go long:

The Hon. Seketeri, Pot Mosbi So Sosaiti, P.O. Box 6958, BOROKO

Telipon: 25 6579

**WANTOK**

NIUSPEPA BILONG OL PAPUA NIUGINI STRET

**PABLIK NOTIS**

Sapos yu laik advertais, telepon 25 2500 na askim long

MIRI AIORI long Ext 203  
JOHNATHAN BONEPE long Ext 215  
KOSINTO FOSAGU long Ext 216

## Papua New Guinea National Party

LONG olgeta demokratik Palamen, mama lo o konstitusen bilong kantri i no save karamapim sampela samting em i kamap. Dispela ol kain samting i save bihainim lo bilong tumbuna o bilong bipo.

Wanpela bilong ol dispela kain pasin bilong bipo em ol memba bilong Palamen long wanpela politikal pati i gat pawa bilong makim wanpela lida bilong go pas long ol. No gat wanpela lo o oganaisesen o kot inap toktok long dispela samting.

Dispela pawa na rait i no bilong ol eksekutiv bilong pati. Long taim ol Nesenel Pati memba bilong Papua Niugini i bin winim ileksen, ol yet i save bung na makim lida bilong ol yet long palamen.

Sir Iambakey Okuk, Ted Diro, Steven Tago na Mista Mel i bin kamap olsem ol lida bilong Nesenel Pati. Bikos ol pati memba yet i makim ol long holim ol dispela wok. Dispela samting i bin stap inap long 16 yia nau na bai i go het yet.

Mista Mel i bin holim wok olsem presiden bilong pati taim ol memba i bin makim ol dispela lida. Na em yet i klia gut tru long wanem samting i bin kamap long bipo na wanem rot bilong bihainim. I save gat toktok na wok bung wantaim namel long ol eksekutiv na ol memba bilong palamen. Tasol olgeta samting i save stap long han bilong ol memba taim ol toktok i sut long pati lida.

Em i wanpela bikpela wok bilong ol lida bilong palamen olsem ol yet i makim lida bilong ol.

Mista Mel yet i save gut tru olsem ol palamen memba bilong Nesenel Pati i no save toktok long ileksen bilong ol pati eksekutiv na bilong presiden, Mista Skate.

Olsem na ol memba bilong palamen i no laikim ol eksekutiv long kam insait na toktok o supim nus long taim bilong makim palamen lida.

Na Mista Mel, olsem wanpela memba bilong palamen olsem olgeta arapela memba bilong Nesenel Pati, i mas mekim stretpela samting long gutpela wok bung wantaim na nem bilong pati, na i mas kamap long kibung long 21 Me na resis long kamap lida bilong pati. Tasol i luk olsem Mista Mel i wok long abrusim dispela bikos em i no gat namba na sapot nau bilong ol memba bilong palamen.

Na nau em i laik askim Nesenel Kot long makim em olsem pati lida na tokaut long wanem mining bilong palamenter i demokrasi. Wanpela longlong pasin tru.

Em i wok long hait baksait long wanpela lo bilong pati em ol memba yet i no toktok liklik long en. Tasol em na Mista Skate i bin kamapim pastaim tasol long kibung bilong 21 Me.


Wanpela bikpela save bilong demokrasi em grup husat i gat bikpela namba i win na i mas go pas long olgeta samting. Tasol Mista Mel i gat mining bilong em yet long dispela hap tok-tok.

Mista Mel i ken bringim dispela nupela lo bilong em i go long taim bilong 1992 ileksen na larim ol pipel yet i autim tingting bilong ol. Em i no palamen lida bilong Nesenel Pati. Em i no bin kisim dispela pawa long han bilong ol memba bilong Nesenel Pati na ol memba bilong nesenel palamen.

Long olgeta 17 memba bilong Nesenel Pati, 15 i bin givim dispela namba na pawa i go long Paul Pora na Brown Sinamoi olsem ol palamenter i lida na deputi lida.

Ol memba bilong Nesenel Pati long palamen husat i givim sapot bilong ol long Mista Paul Pora, lida bilong Nesenel Pati na Mista Brown Sinamoi, namba tu lida bilong Nesenel Pati.

**1. Hon. Paul Pora MBE MP, 2. Hon. Brown Sinamoi CMG MP, 3. Hon. Babadi Sawasi MP, 4. Hon. Benais Sabumei MBE MP, 5. Hon. Wiwa Korowi MP, 6. Hon. Thomas Negints MP, 7. Hon. Gai Duabane MP, 8. Hon. Wagi Merimba MP, 9. Hon. Castan Maibawa MP, 10. Hon. Mathias Ijape MP, 11. Hon. William Wii MP, 12. Hon. Joel Paua MP, 13. Hon. Peter Gai MP, 14. Hon. Jeffrey Balakau MP, 15. Hon. William Ank MP.**




**Hon Paul Pora, MBE, MP**  
Lida bilong Nesenel Pati.



**Hon Brown Sinamoi CMG, MP.**  
Deputi Lida bilong Nesenel Pati.



# SOFBAL



• Ol meri Mosbi husat i autim 1991 Nesanel Wimens sofbal taitel hia long Mosbi.

## Klap sempionsip ba' kamap long Sir Hubert Murray stedium

### SAM YAKAM I raitim

SAMPELA wik tasol i stap bipo long 1991 Benson & Hedges Nesanel Sofbal Klab sempionsip bai i kamap long Mosbi long Kwins Betde wiken.

Sempionsip ya bai i kamap long Fraide 7 i go inap long 10 Jun, 1991.

Ol ripot i kam nau long ol primia na rana ap tim bilong ol memba ser.ta long pilai insait long sempionsip. Tasol ol tim bilong Mosbi i painim wanpela hevi nau. Ol i nogat fil bilong trening.

Ol fil long Bisini em bikpela wok bilong stretim bai i kamap, bikos ol sofbal resis bai i

kamap long en long 1991 Saut Pasifik Gems long Septemba.

Olsem na ol opisal i tokim pinis ol tim husat i save yusim Bisini sofbal graun long graun, long painim narapela hap bilong trening.

Tupela tim bilong Mosbi husat bai i pilai insait long sempionsip em Grin Allan Gazelle (man na meri), Brown Eagles (man) na Mazda Carps. Grin Allan Gazelle bai i redim tupela tim, wanpela bilong ol man na wanpela bilong ol meri. Brown Eagles wantaim Mazda Carps bai i redim wanpela tim tasol bilong ol man.

Long dispela as na bikpela bilip i stap olsem sempionsip ya bai i kamap long Sir Hubert Murray stedium.



• Carps tim bilong ol meri husat i go insait long gren fainal bilong Mosbi Wimens sofbal resis long las sisen. Ol i redi nau long Nesanel Klap sempionsip.

## Yangpela Alice autim Malangan taitel

### Mona Tagune I raitim

1991 SOFBAL sisen i bin pinis long Mas. Planti klab i bin holim pinis sofbal presentesen bilong ol na i malo-lo nau, na i wetim 1992 sofbal sisen long kik op.

Tasol Malangan sofbal klab bilong Mosbi i bin holim presentesen bilong ol long tupela wik i go pinis. Dispela presentesen i bin kamap long Dril Hol bilong Yunivesiti bilong Papua Niugini, Waigani.

Long taim bilong presentesen, klab i givim prais long ol pilaia husat i bin traime hat long sisen long pilai. Wanpela bilong ol dispela pilaia em ol opisal bilong klab i luksave long hatwok bilong em, na givim prais em Mis Alice Uraria.

Uraria i gat 20 krismas, na em i bilong ples Paruai long Nu Ailan provins. Em i kisim prais olsem namba wan pilaia bilong yia long C Gret tim.

Tropi ol i givim Alice em Veronica Somare, meri bilong Forens Afeas na Rijinel Memba bilong Is Sepik, Sir Michael Somare i baim. Alice i tok em i kalap nogut long dispela prais.

"Mi no ting ol bai givim dispela prais long mi. Tasol mi kisim pinis dispela prais, na bai i helpim mi long tingting strong long pilaim sofbal nau," Alice i tok.

Malangan i gat C gret tim tasol long Mosbi Wimens sofbal resis.

Het kosa bilong Malangan, Joe Lumaris i tok klab i tingting long kamapim wanpela A gret tim bilong narapela sisen. Tasol dispela tingting em klab i no pasim tok orait yet long en.

Lumaris em pilaia na kosa bilong Malangan A gret tim bilong Mosbi Mens sofbal resis. Long las sisen Malangan A gret tim i pilai i go insait long semi fainal egensim Elcom.

Long pilai bilong Alice, Lumaris i tok Alice i gat gutpela stail bilong pilai long A gret. Em i ken pilai long A gret sapos em i gat laik. Tasol em i wanpela pilaia husat i gat bikpela laik long stap yet wantaim Malangan klab inap i goap i go pilai long A gret tim.

Alice i givim bikpela tenkyu long ol wan pilaia husat i sapatim em long dispela sisen.



• Pitsa bilong Elcom i pitsim bal egensim Country long Goroka Wimens sofbal resis long las sisen. Wet tasol long lukim kain stail olsem long Nesanel Klap sempionsip em klostu bai i kamap.



# BENSON and HEDGES

**MADANG SOKA DRO**

SARERE 1 JUN, 1991.

Taim	Div.	Pilai	
11.00am	WOM	PX	vs M/Blues
12.30pm	WOM	Panafun	vs Spiders
2.00pm	WOM	Momase	vs Waskia
3.25pm	U19	Nomads	vs Kurti Andra
4.40pm	U19	PX	vs Panafun
• Olgeta pilai ya bai i kamap long YC fil.			
11.00am	U19	PTC	vs Watabag
12.30pm	RES	PX	vs Gala
2.00pm	1ST	Panafun	vs Kurti Andra
4.00pm	1ST	Tarangau	vs Nomads
• Olgeta pilai ya bai i kamap long Yapong Park.			
11.30am	RES	Momase	vs KPI
1.00pm	1ST	PTC	vs Spiders
2.35pm	PREM	PX	vs Gala
4.30pm	PREM	Momase	vs KPI
• Olgeta pilai ya bai i kamap long Laiwaden oval.			

SANDE 2 JUN, 1991.

11.00am	WOM	Mimlon	vs Watabag
12.30pm	WOM	DWI	vs Admiralty
2.30pm	U19	Tarangau	vs Waskia
3.25pm	U19	KPI	vs Mimlon
4.40pm	U19	DWI	vs Admiralty
• Olgeta pilai ya bai i kamap long YC fil.			

11.00am	U19	Safico	vs M/Blues
12.30pm	U19	Momase	vs Spiders
2.00pm	RES	Mimlon	vs Adguria
3.25pm	1ST	Waskia	vs DWI
• Olgeta pilai ya bai i kamap long Yapong Park.			

11.30am	RES	Watabag	vs M/Blues
1.00pm	1ST	Paramed	vs Safico
2.35pm	PREM	Watabag	vs M/Blues
4.30pm	PREM	Mimlon	vs Admiralty
• Olgeta pilai ya bai i kamap long Laiwaden Oval.			

**Las wik nau bilong Medics long baim fain**

**WEWAK RIPOT**

MEDICS klab bilong Wewak Soka Asosiesen i mas baim K150 fain fi bipo long dispela wik. Sapos nogat bai em i no inap kik moa long resis.

Wanpela mausman bilong Wewak Soka Asosiesen, Davic Pandi i tokaut olsem long dispela wik.

Asosiesen i bin givim dispela mekimsave bikos ol pilai na sapota bilong Medics bin statim wanpela pait egensim KTC. Dispela em long wanpela kik bilong namba war divisen long tupela wik i go pinis.

Ol eksekutiv bilong asosiesen i bin givim dispela mekimsave stat long Sarere 18 Me, 1991. Na i askim Medics long baim K150 fain bipo long Sande 1 Jun, 1991. Samare Sil.

"Sapos Medics i no baim dispela fain bai

gren fainal long Ogas, 1991 bipo long Saut Pasifik Gems em bai i kamap long 7-21 Septemba, 1991.

**Somare Sil**

Nau yet em wanpela moa mun i stap yet bipo bikpela kik bilong Somare Sil i kamap. Dispela kik i save kamap long olgeta yia.

Kik bilong dispela yia bai i kamap long namba 22, 23 na 25 de bilong mun Julai, 1991. Na Wewak Soka Asosiesen bai i lukautim.

Wanpela moa tim long ausait i givim nem pinis. Tim ya bai i kamap long Manus Ailan. Dispela i skruim nau namba bilong ol ausait tim i go long tripela olgeta.

Tupela tim husat i givim nem pinis em Simbu Guria, na Medics Mendi.

Pandi i tok em i amamas long lukim ol ausait tim i amamas long kik long dispela resis. Na dispela em wanpela samting dispela tonamen i laikim long apim na promotim stended bilong soka.

Nau yet Pandi i askim ol ausait tim na bilong Is Sepik wantaim long givim nem. Na tu long baim K180 membasip fi bipo long pinis bilong mun Me, 1991.

Pandi i askim nau olgeta tim long Is Sepik na ausait provins wantaim long givim nem hariap wantaim fi. Bikos dispela bai i helpim ol long redi hariap.

Bikos ol bai i save gut long hamas tim i kamap, stretim ol ples slip na trenspot wantaim kaikai bilong ol pilai.



• **Bros o ?**: Fulbek bilong Golo i stapim wanpela kik bilong Rapatona long antap wantaim bros bilong em long las wiken gem. Skoa 0-0. Poto Ivan Bayagau.

**De bilong bikpela kik i senis**

**KIMBE RIPOT**

**LEO WAFIWA i raitim**

BIKPELA kik bilong Lae Bisket Kap tonamen bai i kamap gen long Kimbe long dispela yia. Tasol de em kik bai i kamap i senis pinis.

Dispela kik i save kamap long Septemba, tasol ol ogenaisa i skruim i go long Oktoba 5, 1991. Bikpela as bilong dispela senis em long 1991 Saut Pasifik Gems em Papua Niugini bai i lukautim long Septemba.

Dispela wik ol ogenaisa wantaim go pas bilong Siaman Stanis Tau i kibung. Kibung ya i bilong stretim tok long ol wok redi bilong tonamen. Seketeri bilong Ogenaising Komiti, Mathias Ire i tok olgeta wok redi i bihainim tasol pien.

Arapela bikman insait long ogenaising komiti em tresera Polaiap Kisakiu.

Dispela resis i save kamap long olgeta yia na Lae Bisket kampani i save sponsarim. Ire i tok Lae Bisket kampani i tok orait long sponsarim gen resis bilong dispela yia.

Wes Nu Briten provins i gat 21 konstituensi olgeta. Na wan wan konstituensi bai i salim tim long dispela tonamen. Tasol Ire i bilip olsem 12-pela konstituensi tasol bai i salim tim. Dispela em bikos long hevi bilong bungim inap mani.

Nau yet 4-pela konstituensi i givim nem, na baim pinis K150 afiliens fi. Nem bilong ol em Kendrian Kostel, Kini Rauto, Bialla, na Kilenge Lotto.

Afiliesen fi bilong las yia em K105. Tasol ol ogenaisa i apim. Bikos dispela bai i helpim ol long bungim inap mani bilong redim ka wantaim kaikai na haus slip bilong ol pilai.

Narapela samting em dispela resis i bilong ol tim insait long Wes Nu Briten provins tasol. Ating long sampela yia bihain bai ol ausait tim i kik tu.

Kik bilong dispela yia bai i kamap yet long Kimbe taun. Bikos Kimbe tasol i gat ol pilai graun na samting olsem.

Tasol wanpela hevi i bin kamap long kik bilong las yia we i nogat inap taim. Long dispela as na ol namba wan kik bai i kamap long tupela fil ausait liklik long Kimbe taun.

Na olgeta kik bilong fainal bai i kamap long Kimbe taun stret. Dispela bai i givim inap taim long ol gem i pinis long taim. Bikos las yia olgeta gem i kamap long wanpela fil, na i nogat inap taim long pinisim ol hariap.

em i no inap kik moa long resis, "Pandi i givim strongpela tok lukaut olsem.

Narapela samting em namba tu raun bilong sisen propa resis bai i stat long dispela wiken. (lukim dro long pes 21). Na asosiesen i askim olgeta klab long baim hariap graun fi bilong ol.

Bikos asosiesen bai i yusim dispela mani long baim hariap ol referi. Long wanem ol referi i komplem nau long noken lukautim moa pilai bilong raun tu sapos asosiesen i no baim ol.

Pandi i bilip olsem asosiesen bai i pilaim

**RAMU SUGA SOKA ASOSIESEN DRO BILONG WIK 3**

SARERE 1 JUN, 1991.

Taim	Div.	Graun	Pilai
2.00pm	Prem	G2	Luteran Yut vs Kapindi
2.45pm	Prem	G2	Buresong vs Momase
3.30pm	Prem	G2	Surinam vs Dampier

SANDE 2 JUN, 1991.

12.20pm	Prem	G2	Guria vs Momase
1.00pm	Prem	G1	Aigob vs Bismak
1.00pm	Prem	G2	Buresong vs Surinam
2.40pm	Prem	G1	Luteran Yut vs Dampier
2.40pm	Prem	G2	Kapindi vs Puga

SKOA BILONG WIK 2

SARERE 25 ME, 1991.

Momase def Surinam	0-0
Kapindi def Dampier	0-0
Luteran Yut def Buresong	1-0

SANDE 26 ME, 1991.

Guria def Surinam	3-1
Dampier def Puga	1-0
Momase def Aigob	6-1
Kapindi def Bismak	3-0
Luteran Yut def Buresong	1-1

**WEWAK SOKA LATA**

Primia divisen lata:

TIM	GP	W	D	L	GF	GA	PTS
Wewak Utd	6	6	0	0	27	5	12
Tarakum	6	5	0	1	23	7	10
Sunam	6	2	1	3	12	13	5
Medics	6	2	1	3	6	26	5
Guria	6	2	0	4	12	11	4
Wullet	6	1	2	3	5	12	4
Passam	6	1	0	5	5	18	2

**B&H**

**BENSON**  
and  
**HEDGES**

**B&H**



# Lae i redi long Momase tonamen

## YAKAM KELO I raltim

FOAPELA provinsal gavman bilong Momase rijon bai i sapatim 1991 Momase Rijonal soka tonamen. Dispela tonamen bai i kamap long Oktoba, 1991 long biktaun bilong Is Sepik provins, Wewak.

Ol primia bilong Momase rijon i bin givim dispela sapat insait long wanpela kibung bilong ol, em i bin kamap long Lae long Epril, 1991.

Insait long dispela kibung, Lae Futbol Asosiesen (LFA) i makim maus bilong ol arapela soka asosiesen, na i putim dispela askim i go long ol primia.

Het kosa bilong Lae soka, Richard Nangai i redim pinis tim bilong Lae long pilai insait long dispela tonamen. Richard i tok em i gat 40 pilaia insait long trening tim bilong Lae. Na ol save trening long olgeta Mande, Trinde na Fraide. Nau yet ol i trening long 5-pela wik nau.

Trening tim bilong Lae bai i pilai tu wantaim PNG nesenel trening tim bilong 1991 Saut Pasifik Gems em bai i kamap hia long 7-21 Septemba.

Dispela em long taim nesenel tim i holim namba tu trening kem bilong em long Lae long Jun, 1991.

Dispela bai i helpim long redim tim bilong Lae long Momase Rijonal tonamen, em Lae bai i kamap olsem wanpela bikpela birua. Ol pilaia husat i stap insait long nesenel trening tim bai i no inap kik long dispela tonamen.

Trening tim bilong Lae i gat planti primia na namba wan divisen pilaia. Ol opisal i makim tu wan wan pilaia bilong namba tu divisen. Ol i kisim kosa klinik tu we em i non setifiket klinik.


Narapela samting em LFA yet i nogat inap man long lukautim tim bilong em long Momase Rijonal sempionsip. Olsem na nau yet seketeri Philip Awak grisim ol bisnis kampani insait long Lae long sponsarim tim.

Momase rijonal tonamen bai i gat 8-pela tim i kam long 4-pela rijon. Nem bilong ol dispela tim em Lae, Morobe Kantri, Madang, Madang Kantri, Wewak, Wewak Kantri, Vanimo na Vanimo Kantri.

Richard i tok olgeta rijon i soim pinis olsem ol i redi long dispela bikpela sempionsip.



• Golo na Rapatona i mekim save long Bisini Graun long las wiken tasol tupela wantaim i strong na no gat skoa i bin kamap.



## Ol meri Madang i trening nau

MADANG Soka Asosiesen i stat pinis long trenim trening tim bilong ol meri long pilai insait long 1991 Nesenel Wimens sempionsip.

Sempionsip ya bai i kamap long Lae long namba 8, 9 na 10 de bilong Jun, 1991.

Presiden bilong asosiesen, Peter Angasa i tok skwat bilong ol meri i wok long mekimsave long trening nau. Na ol i no makim fainal tim yet.

Peter Angasa i tok long stat bilong Jun, 1991 bai ol i tokaut long fainal tim.

Madang Soka Asosiesen i luksave pinis long sampela arapela bikpela tonamen we em bai i kamap long bihain taim. Olsem na asosiesen i redim tim bilong em nau long ol dispela sempionsip tu.

Wanpela bilong ol dispela tonamen em 1991 Momase Rijonal sempionsip. Dispela sempionsip bai i kamap long Oktoba, 1991 long biktaun bilong Is Sepik provins, Wewak.

Angasa i tok nau yet MSA i no makim tim bilong dispela tonamen. Tasol asosiesen i kisim toksave pinis. Na bai i redi nau long makim wanpela tim.

Madang Soka Asosiesen tonamen bai i salim wanpela tim tu long Nesenel Anda 19 sempionsip. Tasol wok bilong makim na redi dispela tim i no stat yet.

Peter Angasa i tok Madang Soka Asosiesen bai i traim long makim ol pilaia bilong Anda 19 long ol klap husat i pilai nau long resis bilong Anda 19 divisen.

Em i tok asosiesen i bin lusim Nabassa soka klap long stat bilong 1991 sisen. Nabassa em i bin wanpela strongpela klap insait long primia resis.

Bikpela bilip i bin stap olsem planti pilaia bilong Nabassa bai i makim Madang long Anda 19 na Anda 23 sempionsip. Tasol bikos long hevi bilong pait em i bin kamap long 1990 Benson & Hedges Nesenel Klap sempionsip, na olgeta junia na sinia pilaia i ranawe i go pilaim arapela spot.

Tambu em PNGFA i givim i bilong ol sinia pilaia husat i bin pilai long klap sempionsip tasol. Tasol olgeta pilaia na opisal i no amamas long mekimsave ya.

Olsem na olgeta i ranawe nambaut.

## Gol bilong Betty Ronuc i daunim Goro

### LAE RIPOT

by ELIZABETH SOLOMON

YANGPELA Betty Ronuc bilong Borabora i bin kamapim gutpela smatpela pilai, na givim wanpela gutpela bal long wan nem blong em, Betty Tano long skoarim wanpela isi gol egensim Goro, na ol i winim dispela gem 1-0.

Tupela tim ya i bin bung long wanpela gutpela gem bilong ol meri bilong Lae Futbol Asosiesen (LFA) long las Sarere.

Bikpela ren i bin pundaun long moning, na wara i stap yet long fil. Tasol dispela i no stapim ol meri bilong Borabora na Goro long pilaim gutpela gem.

Yangpela pilaia bilong Borabora, Betty Ronuc i bin pilai strong tru long stat bilong gem i go inap long ful taim. Bikpela hat wok bilong em na Betty Tano i skoarim dispela gol long strongim win bilong ol.

Long namba wan hap

bilong resis, tupela tim wantaim i pait strong i go, tasol nogat wanpela i gol i kamap. Tupela i kam bek long namba tu hap na taitim bun yet long skoa. Tasol banis bilong tupela wantaim long beklain i strong tru.

Tasol ol meri Goro i asua liklik long las minit we ol i opim liklik spes na larim Borabora i skoa, na winim dispela gem 1-0.

Ol arapela kik bilong Sarere long lig divisen em Morobe Yunaitet i bungim ol manki Gaziga bilong Makam. Tupela tim wantaim i pilai strong wantaim na i dro long 2-2.

### Enga Soka Asosiesen Poin Teble 6th. May 1991.

#### Sinia Man

Tim	Plaia	Win	Draw	Lus	For	Ag	Goals	Goal	Poin
Moku	8	6	2	0	20	2	18	18	14
Tarakum	8	5	1	2	13	9	4	7	11
Buresong	8	4	1	3	15	9	6	6	9
United	8	3	3	2	12	6	6	6	9
Teachcom	8	4	1	3	13	11	2	2	9
Enga Blues	8	3	2	3	14	16	2	2	8
Amagan	8	2	3	3	12	17	5	5	7
Ekom	8	2	1	5	6	11	5	5	7
Enga Royals	8	1	1	6	9	14	5	5	3
Tn Club	8	1	1	6	6	26	-18	-18	3

Note\* Points deducted for player not cleared

#### Junia Man.

Buresong	8	6	2	0	18	5	13	14	14
Teachcom	8	5	1	2	10	3	7	7	11
Tarakum	8	4	2	2	14	10	4	4	10
Moku	7	2	3	2	7	5	2	2	7
Amagan	7	1	5	1	6	6	0	0	7
Kumuls	8	2	1	5	7	13	-6	-6	5
Tn Club	8	0	2	6	3	17	-14	-14	2

#### Wimen

Teachcom	9	6	2	1	22	5	18	14	14
Yea East	9	6	2	1	19	7	12	12	14
United	9	4	2	3	13	8	5	5	10
Moku	9	5	2	2	10	7	3	3	12
Amagan	9	4	3	2	15	7	8	8	11
Kumuls	9	3	3	3	7	10	3	3	9
Tapi	9	2	2	6	7	14	-7	-7	6
Buresong	9	1	3	5	5	19	-14	-14	5
Tn Club	9	1	3	5	5	19	-14	-14	5
Tarakum	9	1	1	7	6	12	6	6	3

## Goroka winim Sullivan Kap long poin

GOROKA em i nupela sempion nau bilong Hailans rijon. Em i winim dispela taitel bihain long em i autim Sullivan Kap insait long Hailans rijonal soka sempionsip.

Sempionsip ya i bin kamap long Hagen long las wiken. Na Hagen Soka Asosiesen i lukautim dispela bikpela kik.

Dispela sempionsip i bihainim raun robin stail. Dispela i min olsem tim husat i go pas long lata bihain long resis bai i win. Goroka i bin go pas long poin lata wantaim 7-pela poin, we em i skorim 24 gol na 5-pela tasol em ol birua i kikim egensim em.

Gem Kodineta bilong Goroka Soka Asosiesen, Mathew Waram i tok Hagen i bin ran wankain long lata wantaim Goroka. Tupela wantaim i gat 7-pela poin.

Tasol Goroka i gat gutpela gol averes. Bikos em i kikim planti gol, na ol birua i kikim wan wan tasol egensim em. Olsem na Goroka i winim dispela taitel.

Mathew Waram i tok nogat planti senta insait long Hailans rijon i bin kamap long dispela sempionsip. Ol 5-pela senta husat i bin kamap em Goroka, Simbu, Banz, Hagen na Wabeg.

Mathew Waram i tok long lukluk bilong gem, Goroka i bin wanpela strongpela sait long dispela tonamen. Planti pilaia bilong Goroka em ol yangpela pilaia. Olsem na ol i pilaim gutpela na strong-

pela gem stret.

I no gat prais bilong "Man-of-the-Match". Dispela em pilaia husat i pilai gut tru long tonamen. Tasol Noel Tamsen bilong Guria klap long Goroka i winim prais bilong pilaia husat i skoarim moa gol long tonamen.

Noel Tamsen em wanpela olupela pilaia bilong nem soka klap long kantri, Mosbi Guria. Tasol em i stap long Goroka. Olsem na em i save pilai wantaim Guria klap long Goroka.

Insait long dispela tonamen, ol opisal i makim ol top pilaila bilong redim wanpela tim. Dispela tim bai i pilaim PNG nesenel trening tim long Lae. Dispela em long taim nesenel tim i bung long namba tu trening kem, em bai i kamap long Jun, 1991.

Long ol 5-pela senta husat i kamap long tonamen, 8-pela pilaia i kam long Goroka, tupela i kam long Simbu, 4-pela i kam long Banz, na 4-pela long Wabeg. Hia em nem bilong ol pilaia:

Hagen: Clement Anison, Dick Sombe, Kureng Bulu, Muruta Maoen, Peter Muruva, Indi Geana, Rodger Undipe, Kevin Danny. Goroka: Peter Kombani, Willie Bero, Noel Tamsen, Raoly Bori, Dita Francis, Seti Zavi, Topa Sumale, Ipa None. Simbu: Kale Kua, Charles Dickson. Banz: Tom Niko. Enga: Reuben Paul, James Tapi, na John Winas. Kosa bilong tim em Indris Kumbruwah. Namba tu kosa em Augustine Tom.



# Golo bai go aut long pretim Yunivesiti

## YAKAM KELO I raitim

YUNIVESITI i no ken westim taim long skoa taim em i bungim Golo long strongpela primia gem bilong Mosbi soka long wiken. Bikos pawa bilong Golo i wok long kirap nau long stapim ol strongpela tim long win.

Namba tu raun bilong Mosbi soka i stat nau. Na dispela strongpela kik bai i kamap long Sande 2 Jun, 1991 long 2 klok apinun (2.00pm). Dispela

em bipo long bikipela gem namel long Sobou na Morobe Yunaitet.

Long kik bilong las wiken, Golo i bin stapim gut tru Rapatona long skoa insait long 45 minit gem. Intanesenel straiika bilong Rapatona, Paschalis Atalou i mekim kain trik long beklain bilong Golo. Olsem na Rapatona i no skoa inap gem i pinis.

Kosa pilaia bilong Yunivesiti, Joe Turia i mas luksave long dispela na tokim ol manki bilong em long sanapim strongpela banis. Na tu ol straiika i

mas wok strong long brukim banis bilong Golo. Bikos Golo em wanpela bilong ol tim husat i gat strongpela banis stret long beklain.

Tasol long poin lata em ol birua i kikim 19 gol tasol long 12-pela gem bilong namba wan raun.

Tupela intanesenel straiika bilong Yunivesiti, Steven Mune na Noel Vaia i mas wok bung wantaim long skoa. Las wiken straiika Mune na Joe Turia i no wok bung gut tumas. Long dispela as na Mune i abrusim planti gutpela gol egensim Kurti Andra.

Smuk balus winga bilong Yuni, Kawetan Pam-buai bai i mekim ol pilaia bilong Golo i kirap nogut. Dispela em sapos Golo i no makim em gut. Kawetan i bin kamapim win bilong Yunivesiti long las wiken wantaim wanpela gol we em i givim bal na Noel i skoarim. Dispela gol tasol i mekim na Yuni i winim Kurti Andra. Olsem na ol pilaia bilong Golo i mas banisim gut Kawetan.

Long poin lata nau em Yunivesiti i go pas tru long ol arapela tim wantaim 26 poin. Bihain long Yunivesiti em GFC wantaim 24 poin, Morobe Yunaitet wantaim 23 poin, Guria wantaim 19 poin, na Rapatona wantaim 18 poin. Sobou wantaim Golo i ran bihain.

Golo wantaim Sobou i mas pait strong nau long winim wanpela bilong top 5 posisen bipo kik bilong fainal i kamap.

GFC bai i holim pasim Yunivesiti long poin lata sapos em i winim Rapatona long dispela wiken. GFC na Rapatona bai i bung long bikipela gem bilong Sande 2 Jun, 1991 long 4 klok (4.00pm) apinun.

GFC i gat bikipela laik long winim dispela gem. Bikos em i ran namba tu long Yuni long poin. Sapos GFC i laik win, em i mas stapim Danny Mota wantaim Paschalis Atalou long fowat bilong Rapatona.

Paul Ananias i kam bek na joinim ol manki bilong em long Difens nau. Em bai i holim gen wok bilong em olsem komanda, na skelim bal long ol manki bilong em. Olsem na Westpac i mas strong long stapim Difens long dispela gem.

## LAE SOKA LATA

### LIG DIVISEN:

Mitif .....	12
Morobe Utd ....	12
Goro.....	11
Guria .....	11
Blu Kumul .....	11
Katolik Yut .....	9
Sobou .....	8
Mopi .....	8
PTC .....	7
Sasalu .....	7
Jaura .....	6
Gaziga .....	4

### WIMENS DIVISEN:

Guria .....	12
Yunivesiti .....	12
Bara .....	12
Katolik Yut .....	10
Blu Kumul .....	10
Borabora .....	9
Waliya .....	9
Poro .....	9
Gaziga .....	8
Faze .....	7
Mopi .....	7
Medics .....	6
Goro .....	6
Westpac .....	4

## "Maski tingim yu yet"




• Midfil pilaia bilong Golo i laik tasim bal long bros na salim long wan pilaia long primia kik bilong Mosbi las wiken. Tasol intanesenel straiika bilong Rapatona, Paschalis Atalou i ran bihain long stapim em. Tupela tim wantaim i strong na dro 0-0. Poto Ivan Bayagau.

## LAE SOKA DRO - PES 2

### INSAIT

#### SOFBAL RIPOT - PES 20

- Yangpela Alice autim Malangan taitel
- Las wik bilong Wewak Medics nau long baim fain ..... p21
- Kimbe/De bilong Lae Bisket Kap kik i senis ..... p21
- Hagen i redi long autim wimens taitel ..... p22
- Goroka winim Hailans taitel .... p23
- Gol bilong Betty Ronuc i daunim Golo long Lae ..... p23



- P22

- Ol meri Madang i trening nau .. p23



### MOSBI SOKA ASOSIESEN DRO

#### RAUN 2: WIK 2

Sarere 1 Jun, 1991.

Taim	Divisen	Graun	Pilai	
9.00	Ris	B1	Kurti Andra	v Verave
10.30	2nd	B1	Bao Mitas	v Mt. Obree
12.30	1st	B1	Tarangau	v Nali
2.00	1st	B1	S.T.C.	v Air Niugini
4.00	1st	B1	Maset	v Buresong
9.00	2nd	B2	Oruka	v Amazon Bay
10.30	Women	B2	Sobou	v Amalpak
12.30	1st	B2	B.F.C.	v Wanzesi
2.00	Prem	B2	Westpac	v T. Defence
4.00	Prem	B2	Sobou	v Amalpak
10.00	U/19	G.F.C.	Westpac	v Golo
11.30	U/19	G.F.C.	Kurti Andra	v Guria
1.00	Women	G.F.C.	Guria	v B/Kumuls
2.30	2nd	G.F.C.	Gala United	v Elcom
4.00	2nd	G.F.C.	Losegu	v Mana
12.00	U/19	Defence	Rapatona	v University
1.30	Women	Defence	Milne Bay	v T/Defence
3.00	Res	Defence	Westpac	v T/Defence
4.30	Res	Defence	Sobou	v Amalpak

Sande 2 Jun, 1991.

Taim	Divisen	Graun	Pilai	
9.00	Res	B1	University	v Golo
10.30	Wom	B1	Wanzesi	v Kula
12.30	1st	B1	Kula	v Bao Mitas
2.00	Pre	B1	University	v Golo
4.00	Pre	B1	Kurti Andra	v Verave
9.00	2nd	B2	Buresong	v B/Kumuls
10.30	Wom	B2	Cloudy Bay	v T/Defence
12.35	1st	B2	Koupa	v G.F.C.
2.00	Pre	B2	Guria	v B/Kumuls
4.00	Pre	B2	Rapatona	v G.F.C.
10.00	U/19	G.F.C.	Bao Mitas	v B/Kumuls
11.30	U/19	G.F.C.	Buresong	v T/Defence
1.00	Wom	G.F.C.	Kurti Andra	v G.F.C.
2.30	Res	G.F.C.	Guria	v B/Kumuls
4.00	Res	G.F.C.	Rapatona	v G.F.C.
10.00	U/19	Defence	Sobou	v Verave
11.30	U/19	Defence	Amalpak	v G.F.C.
1.00	Women	Defence	University	v Koupa
2.30	2nd	Defence	Korion	v B.F.C.
4.00	2nd	Defence	Tarangau	v Wanzesi

Printed and published by Anna Bernadette Solomon, of Bitten Place, Gordons, at Allotment 2, Section 209, Hohola.



NO KEN SALIM



# RUGBY

Namba 16

Fonde 30 Me, 1991

## NIUS



BEK PES  
OL GAWI SOIM  
PES GEN

NAMBA TRI RAUN NAU  
VIPERS BAI BUNGIM GOROKA

- pes 3

### INSAIT

- Raiders gat sans long autim Panthers long Wau ..... p2
- De bilong Nesenel Anda 17 sempionsip i senis ..... p2

- Bikpela pait i stapim pilai long Morobe Lig ..... p2

### INTA SITI KAP RIPOT - PES 3

- Vipers bai bungim Lahanis
- Lae bai traim Mendi
- Hagen bai skelim Kundiawa

### PES 4 NA 5

- Dro, skoa, poin lata, na "Man-of-the-Match" ripot bilong 10-pela Winfield Lig senta.

### PES 6 NA 7-PROVINS RIPOT

- Panthers bungim Tarangau long Goroka
- Air Niugini autim Tigers long Madang
- Magani autim Hawks long Kainantu

# Winfield League '91

## Raiders gat sans long autim Panthers

WAU/BULOLO Lig insait long Morobe provins bai i go insait long namba tu gem bilong raun tu long dispela wiken. Na long bikpela gem bilong dispela wiken bai yu lukim Raiders wantaim Panthers i traim bun.

Long namba wan bung bilong tupela long namba wan raun, moa long 500 sapota i bin kamap na lukim Raiders i bagarapim sindaun bilong Panthers 26-20.

Nau yet bilip i stap olsem Panthers i gat bikpela tingting long bekim dispela dinau.

Dispela sisen Raiders i gat gutpela nem long pilaim gutpela bilong gem. Raiders bai i wok strong long holim pasim yet dispela gutpela nem.

Dispela wiken em bai i yusim ol wankain pilaia long daunim Panthers.

Ol pilaia husat bai i go pas long Raiders em Tau Meda "ain man" wantaim Julius Wani, na Krumba Binde.

Bikpela wok bai i stap long han bilong ol ful bek pilaia. Long namba wan bung, ol pilaia olsem John Sikari, Dimeri Arere na George Katua i bin pilaim gutpela gem long ful bek posisen. Dispela i helpim Raiders long autim Panthers.

Panthers bai i lukluk long ol nupela na olpela pilaia long stapim Raiders long skoarim moa trai.

Adam Hail bai i karim nem bilong Panthers i go pas long fil.

## De bilong Nesenel Anda 17 sempionsip i senis

PAPUA Niugini Ragbi Futbol Lig (PNGRFL) i senisim pinis de bilong Nesenel Pepsi Anda 17 Son sempionsip.

Sempionsip ya em ol i makim long kamap long Kwins Betde wiken long Jun. Tasol PNGRFL i skruim i go long pinis bilong mun Jun.

Edministreta bilong PNGRFL, Jack Metta i tokaut olsem ol eksekutiv bilong PNGRFL i mekim dispela tok orait long senisim de bikos sampela son i no redi gut yet.

Dispela senis bai i givim inap taim long ol dispela son long redim gut tim bilong ol. Na tu long wok bilong bungim mani long salim tim.

Nau yet em Noten Son tasol i makim pinis junia tim bilong em long pilai insait long sempionsip, em bai i kamap long namba 29 na 30 de bilong Jun, 1991.

Hailans Son bai i makim tim bilong em bihain long Anda 17 Junia resis em bai i kamap long Ban

Sempionsip long Ban bai i kamap long Kwins Betde wiken long nambna 8, 9 na 10 de bilong Jun, 1991.

Sauten Son bai i makim tim bilong em long tupela tim bilong ol Mosbi pilaia tasol. Tupela tim, Mosbi na Mosbi 2 em ol i makim pinis na i bin pilai long Trinde 28 Me, 1991 long 5 klok apinun long Lloyd Robson oval.

Bihain long disela gem ol opisal i bin makim fainal tim. Tasol RLN i no kisim nem bilong ol pilaia long fainal tim. Bikos pepa i kam aut bipo long ol opisal i tokaut long dispela.

Tasol hia em nem bilong ol pilaia long tupela tim em ol opisal i makim. Wanpela tim i gat 22 pilaia.

Niugini Ailan Son i mas mekim tok orait hariap long wanem kain we em bai i makim tim bilong em. Bikos nau yet em tupela senta tasol long rijon, Kavieng na Kimbe i gat Anda 17 resis.

## Pait i bruk long sait lain

MOROBE Kantri Ragbi Lig bai i wok strong nau long stapim pait pasin insait long fil. Dispela em bihain long wanpela pait em i bin kamap las wik taim Eels na BHP Titan West i bun bung long namba wan A gret gem bilong las Sande.

Ripot i tok dispela gem i no kamap gut. Bikos ol sapota bilong tupela tim ya i statim pait long ausait.

Ol eksekutiv bilong Morobe Kantri Lig bai i kibung long stretim dispela hevi. Bihain long dispela kibung bai Eels wantaim Wes i bung gen.

Lig presiden, Kuma Manova i tokim RLN olsem dispela em i namba wan taim bilong kain hevi i kamap. Na i makim olsem kain pasin bai i no inap long kamap moa. Bikos em bai i givim bikpela mekimsave long ol klap na pilaia.

Kuma Manova i tok moa olsem planti nupela pilaia i gat bilip long ol yet. Olsem na ol i soim pinis long namba wan raun pasin bilong pilaim gutpela futbol gem.

Nau yet em namba wan raun bilong sisen propa i pinis, na namba tu raun i kik op pinis. Na long bikpela gem bilong dispela wiken bai yu lukim Hawks i traim bun bilong Bulldogs.

Kuma Manova i bilip olsem ol sapota bilong Hawks na Bulldogs bai i no inap long bihainim pasin bilong ol sapota bilong Eels na Wes. Bikos long dispela gem Hawks bai i lukluk long ol fowat pilaia bilong em olsem Wilson Bayo, Brian Ipaie, Siome Mone, na ol arapela gutpela pilaia husat i bin pilaim gutpela gem lono disoela sisen.

## Mendi Muruks i paia .....

i kam long pes 8

long bihain.

Tupela minit bihain gem Warriors i skruim skoa i go 12-6 wantaim wanpela trai bilong winga Leo Ongan. Dispela trai i bin kamap bihain long ausait senta, Noah Kool i brukim gut banis bilong Muruks na givim bal i go long Leo Ongan.

Samting olsem 17 minit i stap yet na ausait senta bilong Warriors, Noah Kool i no tromoi bal gut na winga bilong Muruks, Francis Afa i kisim na sisti i go skoarim namba tu trai bilong Muruks. Kik bilong tupela poin i no karim kaikai na Muruks i ran bihain 12-10.

Orait bihain long kik op, Muruks i bringim pilai i kam bek long sait bilong Warriors. Bihain long namba tri takol, insait senta Anton Malangen i tromoi wanpela gutpela bal i go long winga Joe Rema, husat i senisim nara-pela winga.

Joe Rema i spit olsem smok balus na abrusim gut ol Warriors. Em i go stret na skoa aninit long tupela pos. Malan-

gen i kikim gut kik bilong tupela poin, na Muruks i abrusim Warriors 16-12.

Bihain long kik op, lok Moses Kiru i tromoi wanpela gutpela bal i go long Joe Rema. Rema i stap stret long mak bilong skoarim moa trai. Em i "sait step" na abrusim ful bek bilong Warriors, na sisti i go skoarim namba tu trai bilong em.

Malangen i kikim gut kik bilong gol na Muruks i skruim skoa i go 22-12.

Samting olsem 5-pela minit i stap yet na Muruks i stat long lukautim pilai nau. Ol pilaia bilong Warriors i wok long takol tasol long banisim trai lain bilong ol.

Wanpela minit tasol i stap na Muruks i holim yet bal. Ol i pasim bal i go i kam long olgeta pilaia, na i no longtaim kepten Kore Seeto i karamapim 15 mita samting wantaim strongpela ran bilong em, na skoa long kona.

Kik bilong gol i no karim kaikai na Muruks i winim dispela gem 26-12.



Ol Magan i pilaia i laik memelm stret Thomas Toivita bilong Paga Panthers. Dispela em long taim tupela tim i bung long bikpela A gret gem bilong Mosbi Winfield Lig las wiken. Ol Panthers i winim dispela gem. Poto Ivan Bayagau.

WAGAMBIE'S

WHIP



Vipers noken strong long wan wan pilaia

I GUTPELA long lukim olsem olpela sempion bilong SP Inta Siti resis, Mosbi Vipers i paia gen na autim Lae Bombers las wiken long Lae. Tasol i gat longpela rot yet long pait i go long gren fainal.

Olgeta taim mi save tokim ol pilaia bilong mi, "Tenkyu tru long winim dispela gem, tasol tingim, mipela i no winim gren fainal yet."

Goroka Lahanis i soim pinis olsem ol bai i kamap bikpela birua long Inta Siti salens bilong dispela yia.

Ol i winim tupela namba wan gem wantaim tupela gutpela win pinis. Tupela gem ya em ol i winim long bikpela skoa stret.

Las wiken ol i autim Hagen Eagles long Hagen, na las wiken tru ol i autim Mendi Muruks long Goroka.

Eagles i autim olpela sempion, Vipers na mipela i ting ol i mas wanpela gutpela strongpela tim stret. Tasol Goroka Lahanis i autim tiket bilong ol long las wiken.

Olsem na Goroka Lahanis i mas wanpela gutpela strongpela tim stret.

I gutpela long mipela i harim olsem Tuyo Evei i go pas long ol Lahanis wantaim gutpela sapot bilong Leslie Hoffman.

Tuyo em wanpela pilaia husat i soim pinis long bipo olsem em i ken brukim strongpela banis bilong birua, olsem em i bin soim egensim Nu Silan Kiwis na Britis Lions.

Em i kisim inap sapot long ol arapela Kumul pilaia long tim. Mi bilip em i mas putim moa taim long trening long dispela yia. Bikos em bai i gat bikpela wok nau long lukautim fowat lain bilong Kumul.

Les Hoffman em wanpela yangpela man husat i mekim nem nau long ragbi lig.

Les i save pilai long senta posisen bilong Kone Tigers hia long Mosbi Siti. Tasol nau em i go long as taun bilong em stret, Goroka. Long Goroka em i save pilai long lok posisen.

Dispela yangpela man em i wanpela gutpela ragbi pilaia. Em i save pilaim strongpela gutpela na klipela gem.

Yu i no inap tru long lukim Les i pilai nambaut long fil we em bai i tromol han long narapela pilaia. Em i soim pasin bilong gutpela yangpela ragbi pilaia.

Dispela wiken, Vipers tim bilong Mosbi bai flai i go long Nokondi Kantri long pilaim Goroka Lahanis. I gat bilip olsem dispela bai i wanpela gutpela strongpela gem long lukim.

Las yia, Mosbi Vipers i bin winim Lahanis long ai bilong ol sapota bilong em. Mi bilip dispela gem i mas kamap gut, we trabel bilong las yia i noken kamap gen.

Sapos Vipers i laik winim moa gem, em i mas ogenaisim em yet nau. Nau yet i nogat wanpela tim plen we ol pilaia i ken bungim stall na pilai olsem wanpela tim.

Mi mas tok gen olsem wanpela tim i no inap strong tasol long save bilong wan wan pilaia. Dispela pasin i bin kamap long tupela namba wan gem pinis. Olsem wanem sapos ol dispela wan wan pilaia i kisim bagarap?

Mendi Muruks i stat isi tru tasol em i winim Sika Kundiawa Warriors bilong Simbu wantaim gutpela strongpela gem long namba tu hap.

Dispela skoa egensim Goroka Lahanis i soim olsem Mendi Muruks i no wanpela isi tim tu long bungim. Tasol long las minit ol i nogat moa strong na Goroka Lahanis i winim ol.

Mi bai sapotim ol Muruks ong autim tiket bilong Lae Siti Bombers.

Hagen Eagles bai i bungim Kundiawa Warriors.

I tru olsem Eagles bai i pilai long Lae we ol bai i nogat gutpela sapot long winim dispela gem. Tasol mi ting olsem Eagles i gat gutpela stall long winim dispela gem.

Goroka laik winim namba 3 gem

LEO WAFIWA i raltim

GOROKA Nokondi i redi nau long winim namba tri gem bilong 1991 SP Inta Siti Kap long dispela wiken egensim olpela sempion, Mosbi Vipers.

Tasol em bai i bungim strongpela salens tru. Bikos Mosbi Vipers i no wanpela isi tim long winim.

Bihain long namba tri raun long dispela wiken, bai i gat 7-pekla moa raun i stap yet. Nau yet Goroka Lahanis i go pas long poin lata wantaim 4-pela poin.

Long namba wan raun Lahanis i winim Mendi Muruks long Goroka 41-26, na long namba tu raun em i autim tiket bilong Wamp Nga Hagen Eagles 40-18 long Hagen.

Lahanis i gat ol pilaia husat i ken bagarapim sindaun bilong ol arapela tim long dispela strongpela resis.

Olsem na ol bai i pre-tim stret Vipers long dispela wiken, taim tupela i bung long Goroka.

Kumul ful bek, Ipisa Wanega, senta Paul Gela, Tuyo Evei em ol strongpela pilaia stret. Ol bai i givim bikpela hetpen long Vipers.

Vipers i lainim pinis asua bilong ol long namba wan gem egensim Eagles. Kosa Sam Kaia i stretim dispela asua, na las wiken ol i autim Lae Siti Bombers 26-14 long Lae.

Ol Lahanis bai i pilai long fil bilong ol yet, na bai i laki long kisim gutpela sapot. Tasol las yia Mosbi Vipers i winim ol long Goroka aninit long lukaut bilong kosa John Wagambie.

Vipers i mekim strongpela trening long dispela wik, bihain long ol i kam bek long Lae. Na i redi tasol long autim Lahanis long graun bilong ol yet.

Kepten na hep bek Stanley Haru bai i lukautim pilai long

skram wantaim helpim bilong wantok bilongem, faiv eit Tuksy Karu. Karu i mas mekim ol longpela kik bilong em long helpim Vipers i go pilai long mak bilong Lahanis tasol.

Winga Kini "smok balus" Tani em bai i namba wan taim bilong em long bungim ol Hailans pilaia. Bikpela birua bilong Herbert Pokana.

Pokana i bilong Kere-ma, tasol em i kamap bikpela long Goroka. Pait long sailtan bai i kamap namel long Pokana wantaim Kani na Joshua Kouoru.

Lahanis i i gat sans liklik long ol bikpela hevi fowwat pilaia long franlain. Tasol Vipers

bai i laki liklik long beklain wantaim ol gutpela pilaia olsem Stanley Haru, Tuksy Karu, ausait senta Philip Boge, insait senta Richard Wagambie, na tupela winga, Kini na Kouoru.

Gutpela nius em strongpela fowat pilaia bilong Fairstar Tarangau, James Naipao i stap insait nau long Vipers tim long bungim Goroka. Dispela sentis i kamap bikos Weka Lae i kisim bagarap liklik.

Kosa bilong Vipers, Sam Kaia i tok long Lae las wiken olsem Vipers bai i autim gen SP Kap long namba tu taim. Em i mekim dispela tok bihain long ol i autim Lae Bombers.

MOSBI VIPERS LAIP AP

1. John Oeka
2. Kini Tani
3. Richard Wagambie
4. Philip Boge
5. Joshua Kouoru
6. Tuksy Karu
7. Stanley Haru
8. Joe Gispe
9. Danny Moi
10. James Naipao
11. Johannes Kola
12. Kes Paglipari
13. Joe Gispe
- Risev:
14. Eri Emei
15. Sauna Babago

Kosa: Sam Kaia  
Trena: Jamuga Stone  
Tim Menesa: Peter Banaga



Mosbi/Arua Ben Moide bilong Paga Panthers i sambai long pinisim dispela Magani pilaia long bikpela A gret gem las wiken.

Robin bai kosim Kimbe tim long sempionsip

OLPELA Niugini Ailan ragbi lig tim trena, John Robin bai i kosim Kimbe tim long bikpela Intra Ailan Son sempionsip. John Robin i bilong Manus Ailan.

Seketeri bilong Kimbe Lig, Joe Tepp i bin tokaut long dispela long dispela wik. Em i tokaut tu long nem bilong ol pilaia insait long Kimbe tim.

Tupela kepten bilong tupela klap insait long resis em ol i makim tupela tu olsem trena. Nem bilong tupela em Joe Baki bilong Talasea Norths, na Ben Emban bilong Umboili Raiders.

Tepp i tok Kimbe tim i gat planti pilaia husat i gat inap ekspiens. Sampela bilong ol dispela pilaia i bin makim Niugini Ailan rijon long bipo.

Nem bilong ol em Joe Baki, Ben Emban, Jacob Rova, Nason Lavat na Mek Teine. "Sapos ol dispela pilaia i bungim wantaim stail bilong ol long sempionsip, ol bai i givim strongpela hetpen stret long ol arapela Niugini Ailan tim," em i tok.

Tepp i tok ol i lukim long stail bilong ol pilaia na makim. Olsem na ol i no mekim wantok sistem. Hia em nem bilong ol pilaia insait long ful tim:

Steven Baki, Jacob Rova, Henry Hiroy, Mathew Frank na Joe Baki (Norths), Anton Nuli, Ben Emban, Nason Lavat, Mek Teine (Raiders), Gabriel Dambui, James Meninga, Nick Umari na Joe Kamsie (Tarangau), Ben Kinkin, Francis Paul, Gimai Tukai, Joe Kale na Jacob Patore (Royals) wantaim Isaac Gladwin na Christ Lagisa bilong STX Bullets.

1991 SP INTA SITI KAP  
SKOA BILONG NAMBA TU RAUN

Mosbi Vipers def Lae Bombers 26-14  
Goroka Lahanis def Hagen Eagles 40-18  
Mendi Muruks def Kundiawa Warriors 26-12

PROGRESIV POIN LATA

Goroka Lahanis	4
Mosbi Vipers	2
Kundiawa Warriors	2
Hagen Eagles	2
Mendi Muruks	2
Lae Bombers	0

SP INTA SITI KAP  
DRO  
(TIM HUSAT BAI I PILAI LONG SENTA BILONG EM  
YET EM NEM BILONG EM I KAMAP PAS LONG DRO)

<del>WEEK 1 - SUNDAY 19TH MAY</del>	<del>Port Moresby Vipers vs Wamp Nga Mt Hagen Eagles</del>	<del>Collings &amp; Leahy Goroka Lahanis vs Curtain Star Mendi Muruks</del>	<del>Sika Kundiawa Warriors vs LBC Lae City Bombers</del>
<del>WEEK 2 - SUNDAY 26TH MAY</del>	<del>Curtain Star Mendi Muruks vs Sika Kundiawa Warriors</del>	<del>Wamp Nga Mt Hagen Eagles vs Collings &amp; Leahy Goroka Lahanis</del>	<del>LBC Lae City Bombers vs Port Moresby Vipers</del>
WEEK 3 - SUNDAY 2ND JUNE	LBC Lae City Bombers vs Curtain Star Mendi Muruks	Collings & Leahy Goroka Lahanis vs Port Moresby Vipers	Sika Kundiawa Warriors vs Wamp Nga Mt Hagen Eagles
WEEK 4 - SUNDAY 9TH JUNE	Wamp Nga Mt Hagen Eagles vs Curtain Star Mendi Muruks	Port Moresby Vipers vs Sika Kundiawa Warriors	Collings & Leahy Goroka Lahanis vs LBC Lae City Bombers
WEEK 5 - SUNDAY 16TH JUNE	Curtain Star Mendi Muruks vs Port Moresby Vipers	Sika Kundiawa Warriors vs Collings & Leahy Goroka Lahanis	LBC Lae City Bombers vs Wamp Nga Mt Hagen Eagles
WEEK 6 - SUNDAY 23RD JUNE	Wamp Nga Mt Hagen Eagles vs Port Moresby Vipers	Curtain Star Mendi Muruks vs Collings & Leahy Goroka Lahanis	LBC Lae City Bombers vs Sika Kundiawa Warriors
WEEK 7 - SUNDAY 30TH JUNE	Sika Kundiawa Warriors vs Curtain Star Mendi Muruks	Collings & Leahy Goroka Lahanis vs Wamp Nga Mt Hagen Eagles	Port Moresby Vipers vs LBC Lae City Bombers
(N. B. PNG	VS FRANCE)		
WEEK 8 - SUNDAY 14TH JULY	Curtain Star Mendi Muruks vs LBC Lae City Bombers	Port Moresby Vipers vs Collings & Leahy Goroka Lahanis	Wamp Nga Mt Hagen Eagles vs Sika Kundiawa Warriors
WEEK 9 - SUNDAY 21ST JULY	Curtain Star Mendi Muruks vs Wamp Nga Mt Hagen Eagles	Sika Kundiawa Warriors vs Port Moresby Vipers	LBC Lae City Bombers vs Collings & Leahy Goroka Lahanis
WEEK 10 - SUNDAY 28TH JULY	Port Moresby Vipers vs Curtain Star Mendi Muruks	Collings & Leahy Goroka Lahanis vs Sika Kundiawa Warriors	Wamp Nga Mt Hagen Eagles vs LBC Lae City Bombers
PRELIMINARY FINAL - 4 AUGUST - VENUE T B A			
FINAL - 11 AUGUST - PORT MORESBY			



# Royals i tekova long poin lata

## MENDI RIPOT

**MOXIE YORE i raitim**

ROYALS i bosim nau A gret poin lata bilong Mendi Winfield Lig resis. Dispela em bihain long em i winim Bulldogs 26-16 long las wiken.

Las wiken ol pilaia bilong Royals i binm pilaim wangepela gutpela strongpela "difensiv" gem we ol i banisim gut trai lain bilong ol.

Ol i bin pilai strong taim gem i stat i go inap gem i pinis long kamap wina.

Bipo long las wiken, ol i putim kamap wankain strongpela gem na winim Brothers.

Long gem bilong las wiken, kepten Steven Sosi, hap bek Andrew Kengi, prop Johnson Mapi, na insait senta Paul "Slippery" Pora husat i bin putim kamap gutpela gem long daunim Bulldogs. Ol i bung gut stail na pretim stret Bulldogs kiostu long pilai i laik pinis.

Olpela ful bek bilong Hawks, Micheal Kapou i bin pilai strong tru long ful posisen bilong Bulldogs. Tasol olgeta strong bilong em i no inap, bikos em i bin malolo long 4-pela wik samting.

Tasol em i pilaim gutpela gem long ful bek, na bungim gut stail wantaim ol beklain pilaia. Na i kamapim sam-

pela gutpela sans bilong Terry Pima na Nabi Yasi long skoarim 4-pela trai bilong Bulldogs.

Tasol wangepela samting em ol i mekim planti asua tumas. Olsem na ol Royals pilaia i yusim dispela sans long skoarim tripela bilong 5-pela trai long winim dispela gem.

Long ol arapela A gret gem bilong wiken, Brothers na Hawks i dro 10-10. Dispela i bin wangepela gutpela gem tu.

Hawks i kisim fil wantaim ol nem pilaia bilong em olsem William Amos, James Jomoro na Joseph long fran lain. Long beklain em ol nem pilaia olsem John Nane, Francis Mokomne, Mark Orilla na, Bobby i lukautim. Tasol ol i painim hat tru long brukim strongpela banis bilong Brothers.

Hep bek bilong Brothers, Tommy Kerok i lukautim pilai gut tru, na bungim stail wantaim o beklain pilaia bilong em.

Ol pilaia bilong tupela tim wantaim i bin putim kamap gutpela gem, na skoarim trai long hat wok bilong wan wan pilaia. Tasol dispela i bin wangepela gutpela gem tumas.

Magani na Tarangau i bin pilaim wangepela gutpela gem long Sande apinun. Long dispela gem Magani i bagarapim stret sindaun bilong Tarangau 16-12.

# Brothers bai i stapim win bilong North Raiders

MOA long 500 sapota bai i kamap long Rabaul Ragbi Lig oval long lukim bikpela gem bilong dispela wiken. Bikpela gem bai i kamap namel long Brothers na North Raiders.

Raiders i no bin lusim wangepela gem taim sisen propa resis i bin stat i kam inap nau. Bihain long 8-pela raun nau, Raiders i gat strongpela tingting yet long nolim pasim kain stail na strong.

Las wiken Raiders i daunim olpela nem nesenel sempion klap, NGIP Muruks 25-14 long ai bilong planti sapota. Dispela wiken ol bai i kamapim wankain pilai gen long daunim strong bilong Brothers.

Tasol ol pilaia bilong Brothers tu i gat gutpela nem ya. Las wiken ol i bagarapim stret sindaun bilong Bala 28-12.

Dispela wiken Brothers bai i putim ai long Paul Willy wantaim Antony Sine, na ol arapela yangpela pilaia long strongim banis bilong ol long beklain.

Na tu ol i mas putim han, tingting na pilai olsem wangepela tim sapos ol i laik winim Raiders.

Bikos Raiders tu bai i yusim ol nem pilaia bilong em olsem Steven Kapan, Russel Barry, na Langer Willy long winim dispela gem. Ol dispela pilaia na planti moa i no save pilai kaskas long taim bilong gem.

Na tu Raiders i bin soim gutpela gem pinis long ol sapota bilong em. Na planti manmeri bai i kamap long fil long lukim wankain pilai gen.

Long ol arapela A gret gem bilong dispela wiken bai yu lukim Muruks i traim bun bilong Bala.

# Kainantu makim pinis tim bilong Noten Sonsempionsip

MOA long 3,000 manmeri i bin kamap long Kainantu Ragbi Lig Oval las wiken long lukim bikpela A gret gem namel long Hawks na Magani. Dispela gem em Magani i winim 26-14.

Taim gem i kik op, tupela tim wantaim i putim kamap strongpela gem. Tasol taim Magani i painim wangepela spes, faiv eit Terry Les i kamapim gutpela stail na givim bal long Dufe Tiwai long skoarim namba wan trai aninit long tupela gol pos bilong Hawks.

Mike Les i kisim taim long kikim kik bilong tupela poin, na bringim skoa i goap long 6-0. Dispela skoa i kamap long namba wan kwata bilong gem.

Magani strongim banis yet na salim fowat pilaia, Kori i go brukim banis bilong Hawks, na salim yangpela pilaia, Mike Les i skoarim namba tu trai aninit long tupela gol pos bilong Hawks.

Manti Mon i kikim gut kik bilong tupela poin gen na skruim skoa i go 12-0 bipo long hap taim.

Magani i bin lukautim olgeta kona long namba wan hap bilong gem.

Taim Hawks i kam bek gen long namba tu hap, em i no westim taim long skoa. Ol pilaia bilong Hawks i sanapim strongpela banis na salim Alwin Yapai i go skoarim namba wan trai bilong ol. Yapai yet i kikim gut kik bilong tupela poin, na ol i ran bihain 12-6.

Dispela skoa i strongim tingting bilong Hawks long skoarim moa trai insait long namba tu hap. Tasol Magani i no inap long sanap na lukim Hawks i skoarim moa trai long bungim em.

Ful bek Jonah Okuk i bin brukim banis bilong Hawks na skoarim namba tri trai bilong Magani.

Ol Magani pilaia i putim kamap gutpela gem. Bikos Tufe Tive yet wantaim ol arapela yangpela pilaia olsem Romeles Damfabi, Jonah Okuk na Romsly Linguna i givim bikpela han long winim dispela gem.

Bihain long dispela trai, Hawks i no gat strong moa long skruim poin bilong em. Bikos ol pilaia bilong Magani i strong yet long takol. Na i no larim liklik wangepela Hawks pilaia long skoa.



• Ol Paga Panthers pilaia i karakum stret long Magani pilaia long bikpela A gret gem bilong Mosbi Winfield Lig las long Sande. Panthers i winim dispela gem 32-14. Poto Ivan Bayagau.



• Kin Gau bilong DCA (Namba 3) i givim sistl long takolim faiv eit pilaia bilong Difens long wansait A gret gem bilong Mosbi Lig las wiken. Difens i pala stret na waraim DCA 68-16.



• Arua Molde bilong Paga Panthers i laik takolim pilala bilong Magani wantaim bal. Dispela em long taim tupela tim i bung long bikpela A gret gem bilong Mosbi Lig las wiken. Paga i win 32-14. Poto Ivan Bayagau.

# Tigers i apil egensim las minit trai

## MADANG RIPOT

### SAM YAKAM I raitim

LAS wik Madang Winfield Lig i bin putim kamap sampela gutpela gem we ol sapota i amamas long lukim. Bikpela A gret gem i bin kamap namel long Tigers na Air Niugini. Dispela gem em Air Niugini i autim tiket bilong Tigers 18-16.

Ol opisal bilong Tigers klap i raitim wanpela bilong Tigers klap i apil i go pinis long ol eksekutiv bilong Madang Lig. Bikpela as bilong dispela em ol i no amamas long dispela win.

Olsem na Air Niugini bai i lusim dispela tupela poin sapos apil o komplèn bilong Tigers i karim kaikai.

Ol opisal bilong Tigers klap i raitim wanpela

komplèn pas i go long ol eksekutiv bilong Madang Winfield Lig. Ol i bilip olsem taim referi i makim wantaim tok orait long dispela gem i no stret long ai bilong ol.

Air Niugini i bin skoarim wanpela trai bihain long Tigers i mekim wanpela asua insait long gol mak bilong em yet. Dispela i givim gutpela taim long Air Niugini long skoarim las trai bilong winim dispela.

Tasol long lukluk bilong ol opisal bilong Tigers, referi i blowim wisil bihain long wanpela pilaia bilong Air Niugini i no holim gut bal, na bal i pundaun.

Ol i komplèn olsem dispela bal mas i go long han bilong ol Tigers pilaia. Bikos pilaia bilong Air Niugini i mekim asua long i no holim gut bal, na bal i pundaun taim em i laik putim trai.

Tasol dispela i bin wanpela gutpela

strongpela gem stret we ol sapota i amamas tru long lukim. Ol pilaia bilong tupela tim wantaim i givim ol strongpela takol stret.

Na tu long mekim ol strongpela ran long brukim banis bilong birua na kamapim sans bilong skoarim trai.

Gem va i mekim na

olgeta sapota i sanap long lek long lukim husat bai i winim dispela gem long las minit.

Gem i stap long sait bilong Tigers, tasol Air Niugini i no givim wanpela sans long Tigers long skoa.

Kepten Joe Tonar yet i bin go pas long ol ara-

pela yangpela pilaia bilong Air Niugini, na stapim ol pilaia bilong Tigers long skoa.

Long ol arapela A gret gem em Panthers husat i bin i go pas long lata i lus long han bilong Brothers. Na Tarangau i bin bagarapim sindaun bilong Hawks.

## Panthers laik winim namba tu gem

## GOROKA RIPOT

GOROKA Winfield Lig bai i pilaim namba 9 gem bilong sisen propa resis long dispela wiken. Na Siane Panthers bai i traim bun wantaim Tarangau long wanpela strongpela A gret gem bilong wiken.

Las wik Siane Panthers i winim namba wan gem bilong sisen propa resis long han bilong United 20-11. Dispela wiken ol bai i traim long putim kamap wankain strong na stail long winim Tarangau.

Tasol Tarangau i gat bikpela tingting i stap long bringim em yet i goap moa long poin lata bipo fainal i stat. Olsem na ol pilaia bilong em bai i no inap pilai kaskas long Panthers.

Las wik Tarangau i bagarapim sindaun bilong Royals 34-2. Wankain mekimsave bai i kamap sapos Panthers i no putim ol wankain pilaia long strongim gem bilong dispela wiken.

Panthers bai i lukluk long ol kain pilaia olsem Eddie Mana, Sipa Osapage na ol arapela yangpela pilaia husat i bin putim kamap strongpela gem las wik long daunim United.

United i bin pilaim 8-pela gem pinis, na i winim tupela tasol. Panthers i bin pilai 7-pela gem na i winim wanpela tasol long las wiken egensim unit-ed.

Nau yet Panthers i gat bikpela bilip long ol yet long winim dispela gem egensim Tarangau. Olsem na dispela wiken, olgeta 13 pilaia bilong em bai i go aut long winim dispela gem.

Tasol ol i mas sambai gut. Bikos Tarangau i gat gutpela nem long Goroka Winfield Lig resis.

Olsem na planti sapota i gat bikpela bilip olsem Tarangau bai i winim dispela gem isi tasol long han bilong Panthers. Tasol planti taim stori i no save kamap olsem ol pipel i bilip long en, o Panthers i ken tanim tebol long Tarangau.

Tarangau i no inap long kisim kain tingting long winim Panthers isi tasol. Bikos Panthers olsem ol arapela tim i gat laik long goap i go moa long lata.

Bikos planti taim tim husat i stap daunbilo i save tanim tabel long ol gutpela tim long las minit. Dispela i kamap klia nau long planti Winfield Lig resis insait long kantri long Lae na Mosbi.

Narapela gutpela A gret gem bai i kamap namel long Tigers na Hawks.

Tupela tim wantaim i gat nem long Goroka long planti yia i go pinis. Tasol nau yet tupela bai i traim long holim pasim dispela gutpela nem.

Las wik Tigers i lusim gem long Brothers, na Hawks i bagarapim sindaun bilong Darno.

Na Royals wantaim Country bai i traim bun gen. I gat bikpela bilip olsem Royals bai i winim Country.



• Strongpela fowat pilaia bilong Magani, Tom James i sisti wantaim ba, l na Paga Panthers pilaia i laik takolim em long bikpela A gret gem bilong Mosbi Lig resis las wiken. Panthers i winim dispela gem 32-14.

## Spiders na Tigers lusim poin long kik bilong gol

## LAE RIPOT



• Ol DCA pilaia i karakum stret long Difens pilaia long wanpela wansait gem las wiken. Tasol ol soldia i strong na waraim ol bol Porebada 68-16. Poto Ivan Bayagau.

KIK bilong gol i no karim kaikai na Lae Bisket Spiders wantaim Morobe Wopa Tigers i lusim tupela poin long Lae winfield Lig lata. Dispela em long taim tupela i bung las Sande long A gret gem bilong namba wan raun na i dro 12-12 long wanpela strongpela gem.

Senta bilong Spiders husat i save kisim kik bilong tupela poin, Charlie Vee i kikim wanpela penelti kik bihain long referi i givim penelti.

Dispela penelti i kamap bihain long seken row bilong Tigers, Yankee Gadafi i mekim wanpela "paul" takol klostu long tupela gol pos. Tasol kik bilong tupela isi poin i go long sait.

Kumul lok, Mathew Elara i senisim Tigers kepten Alphonse Malala long kikim ol penelti na kik bilong tupela poin. Tasol ol i senisim em bikos em i kisim bagarap long lep han bilong em.

Mathew Elara i winim "Man of the Match" prais long dispela gem. Tasol em i abrusim wanpela tra na penelti kik.

Olpela Noten Son winga na senta, Eric Kuman helpim Spiders i go pas long skoa taim em i kikim bal i go long gol eria bilong Tigers na skoarim.

Em yet i kisim kik bilong gol na Spiders i go pas 6-0.

Tigers i paia na ran i bihain 6-2. Dispela tupela poin i kam bihain long gutpela penelti kik bilong Alphonse Malala.

I no longtaim Tigers i skoarim wanpela trai bihain long gutpela beklain pilai wantaim sapot bilong Mathew Elara. Mathew i salim bal i go long faiv eit Keith Fameso husat i salim wanpela insait pas go insait senta Peter Kone long skoa.

Kik bilong gol i karim kaikai na Tigers i abrusim Spiders 8-6.

Tasol ol Tigers pilaia i bin opitait na referi i givim penelti long Spiders. Charlie Vee i kikim tupela penelti poin, na ol i ran wantaim long skoa 8-8 inap hap taim.

Tupela pait i go na nogat skoa i kamap inap fu taim we tupela i dro 12-12.

## Mendi muruks i paia bihain long autim Kundiawa Warriors

### MOXIE YORE i raitim

MENDI Muruks i gat tupela poin nau long lata bihain long em i autim Sika Kundiawa

Warriors 26-12. Dispela em long taim tupela i bung long namba tu raun bilong 1991 SP Inta Siti Kap resis long Mendi las wiken.

Deputi Primia bilong Sauten Hailans i bin kikim op dispela gem, we ol sampela provin-sal na nesenel lida tu i kamap long lukim. Tende ragbi lig oval i

bin pulap long samting olsem 6,000 manmeri stret. Fil i no inap long pulmapim olgeta sapota. Olsem na sampela i sanap arere long ol liklik maunten long

lukim dispela bikpela gem.

Gutpela sapot bilong ol sapota tu i helpim Mendi Muruks winim dispela gem.

Ol pilaia bilong Mendi

Muruks wantaim go pas bilong kepten Kore Seeto i pilaim gutpela gem stret. Olgeta pilaia i bungim wantaim stail na pilai olsem wanpela tim. Olsem na ol i winim dispela gem.

Long stat bilong pilai, tupela tim wantaim i yusim planti kik long pulim pilai i go long sait bilong birua.

Senta Bal Numapo na Bal Misheal i kikim ol bal i go daunbilo tru long mak bilong Muruks planti taim. Tasol Peter Nane wantaim Anton Malangen i bekim kik kbilong tupela.

Ausait senta bilong Muruks, James "Sinclare" Sikai i skoarim namba wan trai bilong gem. Dispela trai i bin kamap bihain long gutpela beklain pilaia.

Olgeta 13 pilaia i holim dispela bal bihain faiv eit Wari Segiso i mekim gutpela "sait step" na givim bal long Sikai husat i ran bihain long em, na skoa klostu long tupela pos.

Huka Koni Keri i kikim gut kik bilong gol na Muruks i go pas long skoa 6-0.

Bihain long dispela trai ol pilaia bilong Mendi Muruks wantaim go pas bilong kepten Kore Seeto i mekim ol strongpela ran stret. Kore Seeto em olgeta taim em i kisim bal, em bai i karamapim 10 i go inap long 15 mita. Em i kisim gutpela sapot long ol arapela pilaia olsem tupela seken rowa, Mathias Kombrana na John Togola wan-

taim lok pilaia, Moses Kiru.

Tasol ol Warriors tu i strong na sanapim strongpela banis stret. Kepten Bal Numapo i mekim ol strongpela kik, na pulim pilai i go bek long eria bilong Muruks planti taim.

Warriors i bin skoarim namba wan trai bilong ol bihain long wanpela bilong ol dispela kik bilong Numapo.

Ol Muruks pilaia i kisim wanpela "bom" Numapo i kikim na ran i kamap. Tasol ol i lusim na yangpela lok fowat bilong Warriors, Chans Frank i bihainim bal i go daun long trai lain na pundaun antap long skoarim dispela namba wan traibilong gem.

Numapo i kikim gut kik bilong tupela poin na tupela tim i dro 6-6. Dispela skoa i bin stap olsem inap hap taim.

Long namba tu hap, pilai i kamap strong long tupela sait wantaim. Tupela senta bilong Warriors, Bal Numapo long insait (Namba 4) na Noah Kool long ausait (Namba 3) i givim hetpen stret long ol Muruks. Tasol Muruks i banisim tupla gut.

Sampela minit bihain Warriors i go pas long skoa 8-6 wantaim tupela penelti poin em referi Alphonse Pu i givim. Dispela penelti i bin kamap bihain long Warriors winga Peter Davies i laik kisim wanpela "lus" bal, tasol Ruben Rop i pulim em

i go moa long pes 2



• Ol DCA na Difens fowat i bung long bikpela A gret gem bilong Mosbi Winfield Lig long las wiken. Difens i strong tru na i winim dispela gem 68-16. Poto Ivan Bayagau.

## Ol Gawi soim pes gen long Noten Son

BIKPELA pilai bilong Noten Son sempionsip bai i kamap long namba 8, 9 na 10 de bilong mun Jun, 1991 long Kainantu. Na Wewak bai i soim pes gen bihain long tripela yia.

Long 1984 Wewak i gat nem long pretim ol arapela Noten Son senta olsem Lae na Madang. Long dispela taim, Kainantu i bin stap aninit long Hailans Son, na i no kam aninit long Noten Son yet.

Ol biknem pilaia long dispela taim em Robert Jakis, Bob Tolick,

Paul Lapu, Peter Niaga, Roy Heni, Alex Anis, Peter Peni, Terence Moka, na Gerry Augwi.

Ol i makim Wewak olsem ol "wooden spooners". Tasol ol i go insait long gren fainal na autim Lae.

Tripela bilong ol dispela, Roy Heni, Bob Tolick na Robert Jakis i pilai nau long Mosbi. Ol i bin winim spes insait long Noten Son tim, na go insait olgeta long PNG Kumul tim.

Nau yet Robert Jakis i save pilai

wantaim Paga Panthers, Roy Heni i save pilai na kosim Fairdeal Wes, na Bob Tolick i save ran long sait lain bilong Hugo Air Niugini.

Tripela yia bihain long Wewak i mekim nem, edministresen wok i bagarap. Orait long 1988, 1989 na 1990 nogat pilai i bin kamap. Bikpela gras i kamap na karamapim Pora Oval, we bipo i save pulap long nais bilong ol sapota long olgeta wiken.

Dispela yia tasol wantaim go

pas bilong presiden, Joe Mande, Wewak bai i soim pes gen long Noten Son sempionsip bihain long 5-pela yia samting.

Las wik tasol ol opisal i tokaut long 20 pilaia tim wantaim opisal bilong go long Kainantu.

Wewak bai i salensim 4-pela senta, Vanimo, Madang, Lae na Kainantu. I tru olsem em bai i bungim strongpela salens, tasol em bai i traim long mekim nem gen olsem presiden Mande i tok, "Mipela i save olsem i gat strong-

pela salens bilong bungim. Tasol wantaim 8-pela nem pilaia, na sampela nupela gutpela pilaia, mipela bai i traim long daunim dispela salens."

Sampela bilong ol dispela 8-pela pilaia em Peter Niaga, Alex Anis, Paul Lapu na Christ Mek.

Tim bai i kisim sip na lusim Wewak bris long Fraide 31 Me, 1991 na kamap long Madang. Long Madang bai ol i kisim PMV i go kamap long Kainantu.

# Winfield League '91



NAI EM GO LONG HAUS NA SILIP LONG VERANDA NA WETIM OL...

"MI SILIP NA WETIM OL... SKIN BILONG MI I LES TRU, YA!"



TARANGU, HENRI I SILIP IGO TRAIPELA NAIT TRU...

OOH... HEY! OL LAIN INO KAM YET?... MI LES LONG WET, YA!



NAI EM KIRAP NA BRUKIM LOK BILONG DUA NA GO INSAIT...

KAUNSOL

HA! HA! HA!... EM STAIL BILONG MI LONG BOGENVIL, YA.. BRUKIM OL HAUS BILONG OL BIRUA!



EM GO INSAIT... TANIM LAIT I ON NA TANIM T.V. TU I ON... EM SINDAUN LUKIM T.V. NA AI BILONG EMI SILIP...

222  
22



INO LONG TAIM NA KAUNSOL WANTAIM MERI BILONG EM KAMAP...

HEY, MAIK.. LUKIM LAIT LONG HAUS I ON YA!.. YU TANIM ON, O?

NOGAT YA! MI NO SAVE! ATING OL FRASKOL!



ISI TRU NA TUPELA GO INSAIT...

222  
222

AIYAA! EM SIN-DAUN LONG SEA BI-LONG MI!

SSH! NOGUT EM HARIM YU YA!

# PERSONAL LOANS

Husat i halivim yu long kisim ol samting yu laikim tru?

Sapos yu laikim nupela ka o ol samting bilong haus, PNGBC ken givim yu dinau long baim ol dispela samting.

Yu mas gat gutpela wok na sampela seving long haus moni. Na i no hat tumas long bekim dispela dinau.

Askim long haus moni bilong PNGBC Bai mipela halivim yu long kisim ol samting yu laikim emi tru!



OFFICIAL AGENT



# REBO na AUDA

TASOL TAIM REBO KAMAUT, ... OLGETA TU I PLAI I GO INSAIT LONG WARA ...



REBO WANTAIM OL MANGI PILAI RAGBI I STAP NA EMILY GO LONG BIG ROOSTER STUA NA BAIM KAIKAI, ... EM SINGAUTIM OL...



REBO INO WET... EM LUSIM OL MANGI NA RON I GO ...



OLGETA RON I GO NA KISIM SEA BILONG OL NA KAIKAI... REBO TOK PIL I LONG AUDA ...



OL I KAIKAI I STAP NA LUS TINGTING LONG BAL... SOLWARA KARIM I GO ...




TAIM OL I LAIK GO BEK LONG HAUS NA REBO TINGIM BAL ...




OL SAVEMAN BILONG BISNIS YUSIM OL!


**Lister**




LTI 5 KVA  
 • TOTALLY PORTABLE ENERGY SOURCE  
 • IDEAL UNIT FOR VILLAGE LOCATIONS



TS2 8.5 KVA  
 • 3 PHASE OR SINGLE PHASE POWER  
 • COMPACT AND EFFICIENT



HR3 26.25 KVA  
 • IDEAL COMMERCIAL BACKUP SYSTEM




CS6 58 KVA  
 • INDUSTRIAL CAPACITY  
 • WILL HANDLE MAXIMUM DEMAND FOR POWER ANYTIME

**Brian Bell Stores**

• BOROKO — 25 5411  
 • LAE — 42 3377  
 • GOROKA — 72 1098

• MT. HAGEN — 52 1999  
 • RABAU — 92 1966

# Phantom





# BENSON and HEDGES

## WEWAK/SEPIK OPEN - GOLF

1/2 JUNE 1991

### OFFICIAL DRAW

8.00 a.m.	B. BARBER HGN 13	(M)	B. ROBERTSON HGN 8	(M)	J. SIMITAB (M) WWK 16	
8.06 a.m.	F. JOHNSON WWK 25	(M)	T. COLEMAN POM 10*	(M)	T. TARA WWK 17	(M)
8.12 a.m.	R. DENN HGN 27	(M)	T. KENNEDY LAE 14*	(M)	J. MAREE WWK 17	(M)
8.18 a.m.	J. COLMAN HGN 25	(M)	E. TANG WWK 21	(M)	R. MONAGI POM 11*	(M)
8.24 a.m.	C. VOLLMER HGN 21	(J)	R. EMBEL POM 14	(M)	G. KELL POM 29*	(M)
8.30 a.m.	A. JOLLEY WWK 19	(M)	W. RIDEOUT LAE 8	(M)	S. SAMSUN WWK 24	(M)
8.36 a.m.	A. GILLING WWK 27	(M)	D. SPEARMAN LAE 23	(M)	G. FIELD LAE 18	(M)
8.42 a.m.	R. TATENGA WWK 27/30	(M)	M. TJEONG WWK 27/32	(M)	S. SAFAMO WWK 25	(M)
8.48 a.m.	C. ROBERTSON HGN 31	(A)	B. HAYWARD WWK 32/36	(A)	J. VOLLMER HGN 32/36	(A)
8.54 a.m.	C. BARTLE HGN 32/36	(A)	G. SPEARMAN LAE 32/36	(A)	N. BARBER HGN 28	(A)
9.00 a.m.	J. VANDERLIST HGN 8	(A)	T. PILAMP HGN 13		M. MOKA HGN 13	(A)

11.48 a.m.	N. MULLINS HGN SCRATCH	(PRO)	M. WALKER C. MAHER	(M)	R. LEONG WWK 16	(M)
11.54 a.m.	D. IDZAKOWSKI WWK 23	(M)	WWK 13 J. PATRICK	(M)	G. BROKENSHIRE LAE 19	(M)
12.00 noon	D. CHEONG WWK 26	(M)	MAD* D. THOMAS	(M)	C. ANDRIKONIS LAE 21	(M)
12.06 p.m.	F. MATHESON WWK 32/27	(M)	LAE S. BROWN	(M)	P. WHITTON LAE*	(M)
12.12 p.m.	P. HANLEY WWK 22	(M)	LAE 26 J. MOKA	(M)		
12.18 p.m.	A. YERE HGN 7	(M)	HGN 4 P. KOIM	(M)		
1.00 p.m.	A. SEETO WWK 10	(M)	HGN 4 D. YERE	(M)	S. WAIYA HGN 2	(M)
1.06 p.m.	C. JOHANNSEN HGN (8)	(M)	HGN 3		B. STOLZ HGN 22	(M)

**Golfers please note:** FRIDAY 31st May 1991  
 Course closed 4.00 p.m.  
 Registration 5.00 p.m. onwards  
 Bubbly, Cheese, sandwiches, other beverages 5.00 p.m. onwards  
 Breakfast available Saturday and Sunday 7.00 a.m.

Any problems please phone Peter Hanley on Phone Numbers: 86 2150 B/H  
 86 2715 A/H



# BENSON and HEDGES

# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.